

682.82
082
14

豫河志

于廷鑑署



豫河志卷十四 經費一

順治初年定經徵河銀三百兩以上歲內全完者紀錄一次

順治初年定河工歲修錢糧先給一半餘俟物料交完方准找給

順治十一年戶部給事中蘇文樞題陳中州苦累三事其言黃河衝決日近閱撫臣吳按臣王疊報河口衝決疏比前歲之決爲患更大則首當議估計之事初估即打算成局即動費巨萬亦必以實入告儻工難遽成不妨再估以請若一估不敢再估恐後此之費不止如朱源之口使百姓賠累至六十萬兩而猶不可言也次當議派夫之事地分遠近難以一例糾集況既行估計何如發官錢一概招募即不然而近縣輪夫令遠縣按夫徵銀亦免往來道路之煩更絕包攬私折之弊至分買物料而借名多派運納柳梢而抑勒稽延稽察工程而濫委多人是又在管河大臣嚴行察禁者也

順治十二年定令河臣嚴查河工官吏折扣夫食以蘇民困

康熙十二年正月河南巡撫佟鳳彩疏稱河夫之偏累宜通變也臣查修築黃河每歲用夫或萬餘或七八千名自二三月起直至十月終止俱按畝起派似乎公矣其實弊竇有

不可勝言者如狡猾之徒將自己田地飛灑於人勢豪之家將他人地畝包攬於己甚至紳衿衙役借題優免加以不肖有司或礙於情面不能秉公持正以致懦弱鄉愚愈累愈貧每月或三四兩不等方能僱夫一名即以初僱每月三四兩而言以一歲萬夫計之每年費至三四十萬矣在上止知河有歲修而不知歲修之夫費百姓如許之金銀爲今之計莫如官僱一策查舊例河工夫役管河道每歲預估用人夫若干方行各州縣按地起派若官僱每夫每月僱價二兩足矣每歲上工九個月每夫止用僱價一十八兩即以萬夫計之止用一十八萬較百姓之自僱每歲三四十萬不啻天淵矣其每歲僱夫若干該銀若干除歲徵河銀外不足者於河南八府一州地畝分別等則每畝派銀若干算明刊於由單內出納亦照地丁錢糧年終河臣奏銷儻有餘剩留爲下年之用如是民知有定額不但狡猾之徒勢豪之家紳衿衙役不能影射幸免即河棍夫頭管工官役輩亦無所施其巧矣臣入境時體訪輿情無不以官僱稱便儻謂我朝制度凡錢糧俱照萬歷年間則例徵收此項銀兩似屬加派不知派銀派夫均出於民而派夫較之派銀所費不啻數倍曷若稍一更變每畝不過加之毫釐俾得安心於畝畝併不知有河夫之擾不亦大便

於民乎疏下九卿科道會議派夫派銀仍屬累民應將豫省河夫停其僉派如遇歲修工程仍動河道錢糧僱覓夫役每夫一名月給銀二兩若錢糧不敷該撫應動某項錢糧具題可也

康熙十六年題准河南省募夫每名每月給銀一兩二錢照江南省例按日散給

康熙三十二年奉旨河庫錢糧著照盤查州縣錢糧例行

康熙三十七年題准大工歲修錢糧均交與總河自行經管

康熙三十九年議准嗣後侵帑誤工如分管微員照例懲處其現任河官及在工効力旗員卽行題參革職

康熙三十九年議准嗣後呈報險工該道親行察勘確實卽令動帑搶修一面估計申報總河察覈如係假捏卽以誑報題參該道徇隱一併參處

康熙四十年議准河工夫役工成之日內有民夫各給印票該地方官查驗免其雜項差徭

康熙四十年河南巡撫徐潮山東巡撫王國昌疏稱會勘河南考城北岸隄工五千餘丈

換歸曹縣就近修防歷今十有餘年深有益於運道民生應仍遵照改換之成規但查曹縣換歸隄工考邑已協夫五十名茲再議於南北兩岸各縣鄉堡夫內抽撥夫四十名共工食銀一百四十四兩移解曹縣僱夫

康熙四十二年諭河工官員領正項錢糧修築隄岸被水衝決應賠還者照例追賠其自捐修隄完工之後被水衝決或因地勢難築竣工無期若仍責令賠修甚屬可憫著總河查明具題免其賠補

康熙四十四年部議河南巡撫趙宏燮疏奏回回寨與韓羅灣一帶乃祥符陳留蘭陽三縣之連界地勢極卑後有大隄一道卑矮單薄並無重隄可恃今估築加幫接高長二千一百三丈連填墊河形共計土工夫工銀一萬三千三百四十六兩應如所題

康熙四十七年諭河工動用錢糧輒以數萬數十萬計河官當估計之時先故浮估以爲日後節省之地此皆河工積弊嗣後凡有修理工程河道總督務親詣察勘確估具奏不可一任河官浮冒估計

康熙五十二年議嗣後河南河庫每年令該撫盤查出具並無虧空印結送部存案出結

後有虧空者除責令賠補外仍將該撫照徇庇例議處

康熙五十二年覆准嗣後一應歲修搶修工程均令河道總督親勘以杜冒銷之弊

康熙五十九年覆准嗣後一應購買物料嚴飭河官協同地方官親身赴買仍取具地方官並無累民等弊印結送部如被累之百姓具呈出首許該地方官詳報總河督撫據實題參

康熙六十年覆准各河道扣過建曠銀嗣後務於本年年終即行起解不得遲延

雍正元年四月添設千總二員兵夫二百名建蓋堡房三十三座令其駐防巡護遇有緊急均許調撥應役所食俸餉在河庫支領按月給發

雍正二年正月奏准抽調江南河兵應給糧餉即於河南藩庫支給將江南河庫兵餉開除

雍正二年議准嗣後歲修工程於本年十月內題估次年四月內題銷逾限不銷者令授受各官賠償工費至搶工修程將衝決丈尺動用何項錢糧報部工完之日彙冊題銷遲至次年四月不題銷者如前賠償其歲修及別項大工動用何項錢糧於題估日一併聲

雍正二年覆准豫省修理工程河庫錢糧或有不敷於布政使司庫內撥解就近支給

雍正二年五月河南巡撫石文焯奏稱五月十一日接到發來條奏河工夫料二款一查河南河工所需草束甚多俱派各縣辦運每草一斤間銷正項一釐再各縣採買價值以及運送脚費大約秫秸穀草一斤需費三四釐不等合計每縣一年辦草數次每次不下三十萬觔除正項外每運約賠五六百金統計一年約賠數千金承辦州縣先猶挪動庫銀再圖彌補今則正項隨徵隨解火耗亦解補虧空無項可挪不得不按派里民押令辦運此買草之一累也一查河工搶險幫隄築壩捲掃在在需人上司按府分派州縣州縣派之里民約計每邑派夫八九百名不等貧民在工力作露宿風餐每夫四名掘土方一塊定價一錢二分除節省外只給九分六釐計每名每日所得不過二分四釐一人赴工除起身路費鐵筐衣服州縣捐助外家中日食俱本地協助河工之需夫日衆里下之派累日深此派夫之一累也伏查豫省河工捲掃與護隄防風全賴秫秸穀草皆需車運民間所用四輪車止可運八九百觔最多不過千觔故用車甚多難以覓僱不得不借民力

運送相沿已久臣到任後以運料一事累適民值備料防護秦家廠等處工程臣卽發銀委員就近收買每秫稽百觔照時價給銀二錢民無運送之累及十里店等處漫口分頭堵築需料甚多因秋收豐稔秫稽穀草在在皆有每百觔時價不過一錢外加運費三四分不等委員自行收買毋許派累小民祇因需料數千萬之多附近俱已買完而堵築工程亟須上緊告竣始發價與開歸河懷四府屬之相近州縣辦買濟用卽少借民力亦出於萬不得已時值豐收之際辦買物料源源濟用以是各處漫口得於數月之內相繼堵築完工目下惟歲修搶修需用物料無多當此豐年就近預先收買不須運送更無累民之處至於做工夫役豫省向例皆接地應夫興修大工各縣接濟每夫日給工食外里民尙有幫貼因本省並無應募之人也今加幫兩岸隄工估計土方銀四十九萬有奇沿河各縣皆有隄工每土一方向例定價銀一錢二分除加一節省并行礮澆水做邊等費外實給銀九分六釐江南每日二人做土一方每人約得銀五分乃豫省之人習慣不肯力作每日三四人方能做土一方故所得之價比江南較少若變通其法按夫日給工價夫役甚衆難以稽查督率勢必乘間偷安以至遲延糜費不得不仍照舊例按方給價此里

下所以有幫貼食用之事也臣已與嵇曾筠田文鏡共商召募力作之人給以估價但沿河各州縣在在興修所僱之夫百不及一惟有一面盡力雇募一面仍用里夫俟漸募漸多則里夫自可漸省矣

雍正二年五月河南布政使田文鏡奏稱雍正二年五月十三日撫臣石文焯傳臣至署捧出硃批諭旨臣跪讀之下慚悚無地伏查河工所需草束人夫臣於本年三月內赴任路由工所隨留心逐細察訪知每草稽一觔原議開銷正項銀一釐祇因從前年歲歉收草價昂貴加之運脚每斤實至三四釐之費迨至去秋收成大有每斤止費至二厘許今年歲百姓多有自運到工所售賣者每斤草價仍止二厘此運運脚均在其內值今二麥豐收秋成可望每觔一厘儘可買備而輓運轉輸自不得不稍借民力條奏內所陳每縣一年統計約賠數千金承辦州縣先猶挪動庫銀再圖彌補今則正項隨征隨解火耗亦解補虧空無項可挪不得不按派里民押令辦運等因臣查先前草束檄發附近各州縣探買州縣轉發里民辦運已經數載並非因火耗起解而始令里民辦買亦非通省百姓均有派運之事蓋緣草束糶稽俱係產自民間既將銀兩發與州縣承辦州縣勢必散之里

下豈有舍現在物料而另向他處購求者乎又查河工夫役工價原估乾土每方一錢二分扣存加一節省暨夯礮盤辦等項共銀二分四釐外每方應領銀九分六釐又原估水工每方一錢六分扣存加一節省暨夯礮盤辦等項共銀三分二釐外每方應領銀一錢二分八釐至於需用人夫分派附近州縣州縣按照百姓地畝或頃半或二頃出夫一名論方做工正與紳衿里民一例當差之例符合臣訪聞南河每土一方工半可以做就每日每名可得工銀五六分竟有謀之而不能遵得者其如豫省之民向稱懶惰偷安且不諳做法以致每方竟有做至四五工者其工價之多寡皆由勤惰而分則又非州縣派撥之過也況做工者俱係地多之戶不能親自赴工即僱覓貧民代往除工價之外尚有幫貼是無地貧民正可藉此以資衣食原非苦累之事且豫省隄工從前俱係里民自行修築連年以來不惜數百萬金錢興工築隄下埽堵塞特設副總河以專其任又設河員弁目分理其事遂使黃童白叟共享昇年之福而富民貧戶均各保其土地全其家室是雖有運送草束之勞亦屬分所當然況古來國家凡有工役差徭動煩民力我朝百姓除完正項錢糧之外毫無一事較之往古勞逸不啻天淵相隔目下因興大工兼之伏秋在即

難於備覓如此之多因而責之州縣領帑給發暫撥一時若至隄成工竣而地方百姓卽貽子孫千百年無窮之利是名雖爲國所以爲民豈可遽謂之累也 按田疏較石疏尤詳故並錄

雍正二年五月副總河兵部左侍郎稱曾筠奏稱雍正二年五月十七日撫臣石文焯差齋欽奉硃批條議辦料募夫奏摺諭旨有人奏此一二事覽之不勝駭異朕如此推心置腹任用爾等凡有累民之舉槩令據實入告而爾等竟若罔聞政令乖方一至於此朕惟仰天淚下亦無言可諭爾等也石文焯稱曾筠田文鏡同看欽此臣伏查豫省河工料物向例每觔給價一盤大半車運交工不比江南有官造浚船河兵撐駕之便所給料價未免不敷祇緣奏銷漕規遵行已久臣初到工不敢遽更成例每見各屬採運艱難是以上年於預備料物奏摺內請量給車價以資運送現今各州縣承辦歲搶修料物卽於本境採買運送猶爲省力惟武陟中牟二縣工程需料較多臣會同撫臣細加商酌若盡於鄰邑附近購辦恐滋擾累故一面委員照時價自行採買按地遠近量給車脚無致派累里民復思柳多可以省料現在官柳次第採取竝飭沿隄密種以備將來之需又購覓山柴

荻草以代秬稭非若從前辦料專責成於州縣也臣謹仰體聖懷悉心籌畫以紓民力嗣後辦料總在價賤時委員多購設廠堆貯況目下二麥豐登雨澤均調將來秋禾成熟沿河州縣料物自可早辦無庸取給他境而里民辦運之弊不禁自除矣再查上年漫口工程緊急用夫衆多不得不賴鄰邑協濟今加幫大隄各州縣祇用本境人夫臣已諄飭印河各縣槩行召募不得擅派里下內有汛長工險之處所募夫役無多汛水將至必資里夫搶築有田之家僱覓充應除所挑之方價領去外仍要田戶按日幫貼查應募之夫自食其力不憚勤勞每日二名可挑土一方里下之夫強弱不齊希圖幫貼每日四名始挑土一方人數既多則方價自覺其少臣請嗣後凡用夫役總以僱募爲準如工程險要不
得已按地起夫務擇年力精壯之人與其人多而力惰毋寧人少而力勤如此則幫貼之費鮮而修築亦易見功矣至土方因取土遠近分別估計有二錢四分一錢二分之不等除司庫照例扣存加一節省外該州縣領帑築隄有照方全給者有因係水方並節省銀兩悉行借給而工猶未完者有原係旱方先發九分六釐餘一分二釐爲行礮澆水做邊並雨淋塌卸修補殘缺之用者總緣千里長隄土性不同地形迥別自難一律

雍正二年十一月副總河兵部左侍郎稽曾筠奏謹陳管見一查豫省修築隄工之定例每土一方給銀一錢二分內除加一節省外實給銀一錢零八釐臣恪遵定例批令管河道照數給發但細加採訪平易工程每方九分六釐可以敷用似應於扣存加一節省之外再扣加一節省留存河庫作正項支銷儻有難做之工及取土甚遠并買土搶險者責令管河道親加察核酌量加增庶帑項不致虛糜而工程亦免誤累矣一河工錢糧不比州縣黃流泛漲呼吸變遷有昔險今平今平忽險者有突遇危急所用銀兩浮於原估之數者亦有不及題估而急需趨做難緩時刻者事當倉猝勢如救焚不得不多用料物金錢移緩就急竭力搶護以保運道民生若執一而不變通則該管各官恐有賠累或致臨時畏縮貽誤非小臣愚以爲凡一切工程或有昔險今平者據實扣除或有今平忽險及水勢洶湧搶救銀兩浮於原估者據實題銷如有緊急險工難緩時刻者一面題估一面通融接應惟在臨時相機修防管河道嚴加察核毋許冒濫庶緊急工程不致坐失機宜

矣

裁種荻柳添開南兵兩條見工程門

雍正二年十二月河南巡撫田文鏡奏稱竊查豫省南北兩岸隄工仰蒙特發帑銀四十

九萬八千三百餘兩以資興築今據管河道陳世倬具奏每土一方除部議加一節省並支給工價銀九分六釐外尙餘銀一分二釐通省合算應共該再扣加一銀四萬餘兩另行題請以爲各工補修補築等項之用轉傳硃批諭旨命臣酌量或題或行等因欽此臣遵即悉心諮訪原估乾土一方工價銀一錢二分除扣存加一節省應給銀一錢零八釐今止給銀九分六釐者蓋因河工錢糧實與州縣不同水勢變遷事在呼吸有昔平而今險者亦有昔險而今平者是無論通省之工程多有難易即一人承築之工亦各有平有險在印河各官自不得不相度水勢之大小工程之難易被長補短隨時變通方克有濟若膠執一定不特錢糧糜費抑且苦樂不均官民畏縮難免貽誤臣查平易之工每土一方即給銀九分六釐或八分上下一應修邊打硪製辦繩索買土廂墊拖腳等項均可在內如遇昔平今險取土甚遠難做工程即給至一錢二三分外尙需斧硪盤纏等物銀兩至於水工一項有照原估一錢六分扣存如一節省再扣加一節省已數所用者亦有帶水泥土挑運路遠難做易塌之工竟有給至一錢七八分至二錢三四分不等者則是前項再扣加一之銀原非盡爲部費而設也若夫奏銷各項錢糧在部胥不能枵腹辦事歷

來各省皆有發給飯食之陋例臣訪聞南河工程凡遇奏銷每開銷銀一兩支給部胥飯倉銀自五分起至七分止今豫省此案大隄動用正項錢糧至四十九萬餘兩冊籍繁多奏銷核算需時給發些須飯食亦似不可少缺茲臣逐細察訪查據兩岸隄工尙可再扣存銀二萬五千餘兩並令管河道陳世倅再將難易工程暨別案隄工有無一例節省并節省若干之處確查詳報一併具題所有此案隄工除原議加一節省銀兩應聽副總河臣嵇曾筠查有應行補修補築之工題請酌量通融支給仍飭管河道嚴加察核毋許冒濫庶難做工程不致偏累貽誤而帑項絲毫均得實用矣

雍正三年議准嗣後豫省修築平易隄工每土一方給銀九分六釐永爲定例其險工取土較遠者該道察覈酌增不得浮冒如不肖河官以近土作遠土捏飾冒銷者題參

雍正三年三月河南巡撫田文鏡奏稱雍正三年三月初一日接准部咨據副總河臣嵇曾筠具奏管河道陳世倅不發錢糧預備物料一案欽奉硃批諭旨該部嚴察議奏速行文與田文鏡動河南司庫錢糧五萬兩交與嵇曾筠速速相機料理俟鎮調補管河道陳世倅問田文鏡如可用調補南汝道如無可取發回交部嚴加議處隄岸少有疏虞將嵇

曾筠亦議重處欽此轉奉到臣除遵即檄飭布政使楊文乾將司庫錢糧動撥銀五萬兩解交副總河臣稽會筠作速相機料理外臣伏查豫省今歲桃汛較之去年雖屬稍大隄工俱各平穩而加幫大隄工程合計已完九分之數其餘未完一分於四月初旬俱可告竣至於豫省歲搶修工程例由河臣於年內秋汛後勘查確估會同撫臣具題預辦料物貯工俟題准部覆至日動支司庫錢糧移交河道今雍正三年歲搶各工錢糧經副總河題請於司庫內先行撥銀五萬兩及時分發備料臣於雍正二年十月二十七日准副總河移咨到臣或飭令河道先於河庫銀內借支或將加幫大隄銀兩通融給發臣隨咨覆副總河令其轉飭河道先於河庫銀內查係何項可以借支酌量給發并檄飭陳世倅先行通融動支而陳世倅過於慎重不肯一起給發臣恐貽誤當經屢次而諭令其速發續據陳世倅冊報於雍正二年冬間連前署道楊守知任內暨該道接任後共先發過歲搶修銀二萬二千六百六十七兩零又於雍正三年正月起到二月二十六日止共陸續發過本年歲搶修銀二萬三千五百五十六兩零其餘銀兩向例留爲夫工土方之用俟各屬開工之日再行發給等情到臣據此臣查此案應需銀兩已發過四萬六千二百二十

三兩有零矣至陳世倬招怨之處因伊前奏加幫陽武大隄等工加一節省之外不用部費應再扣加一節省存貯道庫以備急需而從前印河各官做過工程銀兩並未扣存陳世倬欲急於歸公完伊奏請之案將從前已發者樂行嚴催因各屬未據解交將現在未發銀兩竟行扣存以致沿河州縣紛紛具詳臣因此項銀兩只可催追不便扣除如徑行扣降恐承築各官藉詞不敷貽誤工程關係重大隨經嚴行批飭并面諭該道令其如數給發俟工完查明之日如有應追之項另行催追仍移咨副總河臣嵇曾筠轉飭并檄飭布政使楊文乾嚴查在案而陳世倬又見前署道楊守知任內錢糧東挪西扯紛雜混亂竟致無可交代業經臣批飭嚴查另揭參追陳世倬以爲前車之鑒亟欲徹底清釐絲毫不肯苟且寬容大招衆怨此副總河嵇曾筠所以有道員掣肘偏執乖張之奏也

雍正三年五月副總河兵部左侍郎嵇曾筠奏稱竊臣因慎重錢糧細如採訪知平易工程每土一方給銀九分六釐可以敷用前經奏明在案令於五月初二日接准部文欽奉諭旨嗣後豫省工程每土一方給銀九分六釐以爲定例其難做險工取土甚遠者於估計之時責令管河道親加查核酌量加增不得浮冒外但臣查從前雍正二年加幫隄工

雖據領帑陸續報完內有平易之工亦應追繳加二節省現在檄飭管河道逐細查勘分別難易凡有應扣加二節省之處嚴行扣追繳庫以清帑項

雍正五年二月諸王大學士會議得嵇曾筠奏豫省大工以及搶修埽料秬稽俱係臨時濟急購運艱難每百觔實銷銀九分並穀草椿蔴萬難議減俱毋庸議外其歲修所用秬稽應如所請行令副總河於雍正五年承辦六年歲修其所用秬稽酌定足用數目務於八月內動支道庫銀兩給發各廳勒限十月內照額辦足責令管河道查驗如有限內不完將承辦之員參處俟工完之日將用過數目核實每百觔卽照七分報銷又議建造堡房每座約銀三兩卽於節省項內動支報銷

雍正五年覆准各河同知轉發各官承辦物料取具分辦人員照數領足價值印甘各結申送查核如無各結卽將該同知侵扣短少之處參究分辦之官不能如數交完物料者一併題參分別治罪

雍正五年覆准豫省河工歲修所用秬稽定於八月內動支道庫銀分給各廳限十月照額辦足仍令管河道查驗如限內不能辦完及有短少者指明題參工竣覈實每百觔以七

分報銷

雍正五年覆准嗣後豫省採買歲修搶修物料廳汛各官互相秤收印官分辦者亦令廳官秤收取具並無短少印甘各結存案如有徇隱即將該廳汛官題參加倍治罪

雍正五年准覆豫省預備物料堆儲險工上游編立字號每堆以五萬斤爲率倘有徵爛虧空情弊即將該廳汛各官題參著落賠補

雍正五年議准開濬河道濬河之土四面各闊一丈高一尺爲一方給銀九分積高一丈爲一大方給銀九錢

雍正十年奏准總河所轄各廳所出河租麻絲若干官柳若干兵採草若干每歲造冊報部

雍正十年議定豫省河工歲修稽料每埭重五萬觔每觔價銀九毫按畝派民自行交工雍正十一年議准豫省上南河下南河上北河下北河黃河歸河沁河等七廳需用土方無論水旱每方價銀自八分一釐至二錢一分六釐杉木椿料圍圓一尺一寸至三尺每根價銀自一錢七分至七錢永爲定例

雍正十三年議准豫省河工每年搶修所有穉穉先期酌定數用之數與歲修同時發帑於十一月內一同照數辦足運存工所價值亦照歲修之例每百斤以七分報銷永成定規

雍正十三年議准豫省需用楊椿上北上南二廳在洛陽濟源等縣採辦洛陽與濟源相對運至上北河廳屬原武汛以百五十里爲則陽武汛以二百里爲則封邱汛以二百五十里爲則運至上南河廳屬滎澤汛以百五十里爲則鄭州汛以二百里爲則陽武汛南岸隄工在中牟縣工段之內以二百五十里爲則下北下南二廳在鞏孟孟津等縣採辦孟津與孟縣斜對在洛陽縣之下運至下南二廳屬祥符汛以二百五十里爲則陳留汛以三百里爲則自陳留至蘭陽河道無多亦以三百里爲則儀封汛以三百五十里爲則沁河黃河歸河三廳在溫假師等縣採辦假師與溫縣相對在鞏孟之下運至沁河黃河二廳屬武陟汛以五十里爲則運至黃河廳滎澤汛北岸以百里爲則運至歸河廳屬考城汛以三百里爲則商邱汛以三百五十里爲則虞城汛以四百里爲則自四百里至五百里照加一腳價扣算以次遞減每根圍圓自一尺至五尺長自一丈三尺至五丈三尺

購辦在四百里者每根價銀六分至三兩四錢五分遞減至五十里者每根銀二分九釐至二兩三錢四分三釐五毫膠價在內

雍正十三年議准河工幫貼銀照淮徐等倉錢糧之例分作十分核算經徽州縣衛所等官初參欠不及一分者停升督催欠一分者罰俸六月欠二分者罰俸一年欠三分者降俸一級欠四分者降俸二級欠五分者降職一級欠六分者降職二級欠七分者降職三級欠八分者降職四級以上皆令戴罪徵收停其升轉完日開復欠九分者皆革職經營督催之司道府直隸州知州欠不及一分者停升督催欠一分者罰俸三月欠二分者罰俸六月欠三分者罰俸一年欠四分者降俸一級欠五分者降俸二級欠六分者降職一級欠七分者降職二級欠八分者降職三級欠九分者降職四級以上皆令戴罪督催停其升轉完日開復欠十分者革職督撫欠不及一分者停升督催欠一分二分者罰俸三月欠三分者罰俸六月欠四分者罰俸一年欠五分者降俸一級欠六分者降俸二級欠七分者降職一級欠八分以上者降職二級以上皆令戴罪督催停其升轉完日開復署印官欠一分二分者罰俸三月欠三分四分者罰俸六月欠五分六分者罰俸九月欠七

分八分者罰俸一年欠九分十分者降一級調用欠不及一分者署印不及一月者免議其被參後州縣衛所等官限一年內全完如不全完原欠不及一分者罰俸一年欠一分二分者降三級調用欠三分四分者降四級調用欠五分六分者降五級調用欠七分八分者革職經營督催之司道知府直隸州知州限一年半全完如不全完原欠不及一分者罰俸一年欠一分二分者降三級調用欠三分四分者降四級調用欠五分六分者降五級調用欠七分八分以上者革職督撫限二年全完如不全完原欠不及一分者罰俸一年欠一分二分者降二級調用欠三分四分者降三級調用欠五分六分者降四級調用欠七分八分者降五級調用欠九分十分者革職其接徵接催官均以到任之日爲始接徵州縣衛所等官亦限一年接催布政使司道府直隸州知州亦限年半接催督撫亦限二年如不能完題參照現在未完分數以初參例議處至帶徵積年拖欠之大小各官限二年全完如不能全完皆依定例照職任處分如有徵解不前者該撫照例題參

雍正十三年十一月諭河防隄岸埝壩等項工程有關運道民生者定例皆動正項錢糧乃各省竟有於田畝派捐者豈皆出自小民之願大都上司因節省錢糧起見授意屬員

爲粉飾之計相沿日久官吏藉端苛索民間所費必至數倍不特苦累民生亦於國計無補於乾隆元年爲始一概革除仍嚴飭所屬官吏毋得私行征派以爲民困

乾隆元年奏准豫省原撥辦料銀一萬兩尙覺不敷應再撥銀二千兩一併採辦

乾隆元年奏准歲修搶修廂墊工程需用土方令於估銷冊內據實造報不必入於埽料內銷算

乾隆元年正月奉上諭河南孟縣地方有小金隄一道捍禦黃河向係民築民修朕思民力不齊工料欠缺則修築多不堅固即使果能堅固而每歲攤派銀錢亦未免竭蹶著河東總河將此項隄工確實勘估委員承修其需用銀兩統於歲搶項下動支報銷毋得絲毫派累欽此隨經估修防風長五十丈歷年備料廂修至乾隆十九年河溜下移情形平穩總河白鐘山奏明停止動帑仍歸百姓自行修防

乾隆元年二月諭河南武陟縣木藥店沁河隄工關係居民廬舍每年定爲民夫修築以防水患里民按畝攤錢計二千四百餘兩頗爲地方之累若設立長夫三十名歲支工食銀三百六十兩即可省民間二千餘金之幫貼著該部傳諭河南總河白鐘山照此辦理

其設立長夫應領工食即動豫省存公銀兩不得絲毫累民永著爲例

乾隆元年覆准豫省河工每年歲修搶修銀分儲庫內遇有險工詳明動支

乾隆元年議准嗣後豫省北岸黃河歲修搶修等工需用各項錢糧並懷河營官兵俸餉銀該布政使司徑發河北道收支估修報銷文冊照南河淮揚淮徐二道例徑送該督察核堡夫工食兵丁生息銀緡河北道所屬者就近解交將收支出數目造冊送核年終盤查

乾隆元年覆准河南省孟縣小金隄工程歲撥銀四千兩辦料供歲修搶修之用至十九年河溜下移情形平穩總河白鍾山奏明停止動帑仍歸百姓自行修防

乾隆元年議准豫省濬柳船六十二隻向撥河兵看守今河兵各歸本汛巡守應募長夫六十二名每名歲給銀八兩運料之時加募水手濬船三名柳船五名每名日給銀五分
乾隆二年覆准河南省孟縣小金隄設樁掃夫四十名每名歲給銀十二兩遇閏加增一兩

乾隆二年定豫省歲修搶修之柴每觔價值概給九毫○按以前搶修九毫歲修六毫至

是經欽差條奏允行

乾隆三年議准豫省河工需用物料險要工程隨時交收其每年所備歲修搶修物料均於八月以前布政使司照額撥銀移解道庫該道於八月內給廳印各官分投採辦承辦之官務於十二月內全數交工備用遲誤者參劾嚴加議處

乾隆三年奏准豫省南北兩岸黃沁兩河歲修搶修工程每年豫撥銀七萬兩永爲定額乾隆八年議准豫省山稍草每束重三十觔給價銀二分七厘蘆根每束重七觔價銀五釐四毫草每束重七觔雇夫採割給刀工銀一毫六釐阮塘窪地所栽葦草每束重二十觔僱人採割並運送到工腳價共給刀工銀六釐

乾隆十年覆准河南每年協濟江南河工銀停止撥解留充本省河工之用

乾隆十二年議准自乾隆七年起新舊編紮木龍用過木植工料銀照各廳每年報銷歲修搶修工程之例核明實用數目按年按工造冊估銷

乾隆二十年議准嗣後如遇偏災蠲緩將河工歲夫銀兩一例扣緩登除分數河銀考成案內據實聲明具題查核其撥補蠲緩歲夫銀兩倘本邑應征錢糧不敷撥補准於司庫

地丁銀內撥給

乾隆二十三年諭豫省河工埽料於沿河州縣採買舊例每草十觔爲一束官價九釐乾隆四年因歲歉昂貴每束增銀五釐今豫省當積歉之餘採辦恐有不敷著仍照乾隆四年之例增銀五釐俾官民不致墊累

乾隆二十五年九月部覆總河張師載奏稱豫東黃河大隄堡房責令州縣官修理因循日久難免坍塌不堪居住者有之雖屢次嚴飭究因向無額定歲修銀兩延挨觀望難收實效請照東省運河堡房之例每座給歲修銀五錢等語應如所奏豫東黃河堡房准其自乾隆二十六年爲始照例每座給歲修銀五錢以資修葺所需銀兩准其在於藩庫存公耗羨銀內動支給發仍令該撫將每年動給銀兩數目於歲底造入存公冊內報明戶部查核仍令該管河道不時查看飭令州縣官修葺堅固入冊交代儻有坍塌傾圮不堪棲止者除責令賠修完固外仍照例查參議處并於每年年底將修過堡房座數支過銀兩報明戶工二部查核如有節省留爲下年之用

乾隆二十八年奏准歲修工程除與常年報銷銀數不相上下者照常辦理外該年需費

倍加應令該督撫將該年必需倍費情形專摺奏請

乾隆三十年六月工部奏准都水清吏司案呈內閣抄出河南巡撫阿思哈奏前事一摺
乾隆三十年五月十八日奉硃批所奏是該部議奏欽此欽遵於本月二十一日抄出到
部該臣等議得河南巡撫阿思哈奏稱竊照豫省逼近黃河河工物料例應沿河三十二
州縣按地派買以資修防此係保護民生之事原屬分所應辦乃臣到任以來隨地諮訪
皆以民間辦料爲累惟是地方官與河員各存意見恐出泛泛之論未敢輕信第念辦料
爲河工要務歲所常有隨細加體察始知百姓於此實有苦累者深求其隱蓋在運料交
料兩端所謂運料之累者業戶地畝多寡不同出料因之各異在大戶料多猶有力能自
運者若零星小戶出料有限離工路遠必須僱車裝載人工飯食牲口喂養沿途既須盤
攬到次又有守候在在在多費曠業費時遂有一種無籍之人名曰料頭出而包辦講定料
價運價并一切使費層層折乾何啻數倍而百姓較之自行運交究爲省使以致甘心喫
虧向年俱經屢禁無如別無良法奸民得志遂爾公行無忌臣思料頭既能就近買交民
間何難照辦祇因業戶不齊誰肯秉公出頭即使肯辦有人保無侵蝕仍如料頭者臣輟

轉籌畫擬官爲倡導先行試辦動給司庫無礙公項於秋成後物料價平之時查明不能自運之戶選委佐雜幹員領銀就近採買代辦運交工所事畢確加核算除應給官價外不敷若干令各業戶繳解司庫歸款較之料頭包辦必然大減如果試行有效卽飭各州縣每年慎選地方公正之人備領銀兩遵照章程督率辦理則運料之苦可以漸免臣現在督同司道府縣熟籌妥辦俟有就緒另行奏報所謂交料之累者河工收料堆貯日久難保不無折耗秤收未免稍高乃因此有加三四者甚有加七八者農民辛苦運來已經狼狽乃復重秤虛喝爲累益深臣細詢河員與該司道再三講求始知多收實自有故緣每年秋汛河道總督赴豫防範約需三月所帶官弁兵役以及隨工道員以下不止一二百人每日米薪菜蔬燈燭鋪墊以及夫馬等項皆係管河之廳員伺應雖亦酌量發價工所地方偏小向無市賣多係廳員由他處買運常川伺候其隨從兵役各有規費相沿已久不知起自何年費用浩繁難以悉數河員賠墊既多不免浮收物料以圖抵補職此之故伏思屬員供應上司久奉例禁河臣身受重恩及監司大員斷無不知自愛惟家人兵役以及標弁人等罔識事體視爲成例任意索求不以爲怪正恐涓流不止甚至有誤工

侵帑之事所關甚鉅但積弊相沿非自今始合無仰懇特降諭旨嚴加飭禁不咎既往杜其將來俾河員得免供應之繁無所藉口不致再有浮收倘或故違立予糾參重治其罪則交料之苦亦可永除吏治更得肅清豫省官民共沐皇仁於無既等因具奏前來查河工預辦料物以備修防自應官爲經理不誤工而亦不累民豫東二省河工物料先于乾隆三年據原任河東河道總督白鍾山會同河南山東巡撫奏稱每年預備歲搶修料物俱於八月內發給廳印各官分投採辦十二月內全數辦齊交工又管河廳官係收料物之員難保其不暗加多收應派委附近不管河工之同知道判等官監收等因經臣部議覆准行在案嗣於乾隆二十九年據原任河東河道總督葉存仁請將豫東廳縣辦料交工責成道員查驗其每年派委丞倅監收之例應行停止等因奏准咨明臣部亦在案是豫東二省採辦物料并監收查驗各事宜久經議定章程原屬官爲經理至民間運交物料係地方各官自行按畝派買今據該撫體察民間運料實有苦累以至一種無籍之人出而承攬公行無忌自不可不籌代辦之法俾奸民不能漁利而貧民亦不致受累據奏稱請令官爲倡導先行試辦動給司庫無礙公項於秋成後物料價平之時查明不能自

運之戶選委佐雜幹員領銀就近採買代辦運交工所事畢確加核算除應給官價外不敷若干令各業戶繳解司庫歸款如果試行有效即飭各州縣每年慎選地方公正之人借領銀兩遵照章程督率辦理俟有就緒另行奏報等語應如所奏先行試辦仍俟試行有效體察民間果不致有受累之處議定章程再行據實奏聞至奏稱交料之累係每年河道總督赴豫防汛管河之廳員何應雖亦酌量發價而隨從兵役各有規費賠墊既多不無浮收物料以圖抵補等語查河工監收物料奏定以十六兩準秤秤收至屬員供應上司屢奉嚴禁河臣因公防汛自應輕騎減從自給資斧不令屬員供應豈可令其浮收物料以爲彌補之地也亦應如該撫所奏行令河道總督凡有巡查公出將家人兵役標弁人等加意查察嚴加約束如有仍前需索將官弁立即參處家人兵役人等從重治罪并飭該管道員於查驗物料之時照依奏定準秤秤收倘各員仍暗地浮收察出立即糾參治罪恭俟命下臣部行文該督撫遵照可也奉旨依議欽此

乾隆三十年定准豫省河工歲料官爲代辦每斤幫給運銀一盞幫價於沿河三十二廳州縣按糧攤征還款嗣又改爲通省攤征

乾隆三十年議准各省建修一切工程動支各項存公銀兩數在千兩以上者照正項錢糧之例由該督撫具題請銷其用銀數百兩至數十兩不等者照舊例咨銷

乾隆三十年十二月河南巡撫阿思哈奏稱竊照豫省河工料物例應沿河州縣領帑按地派買緣工次遠近不等業戶大小不齊載運既屬艱難而工員又不無浮收之弊遂有料頭出而包辦重疊折乾何啻什倍民間深以爲累臣察知顛末設法剔釐隨經恭摺奏明借動閒款官爲試辦代買代交如運費不敷事竣核實征還等因仰蒙特恩允准臣卽與該司道商酌借動司庫閒款銀兩於七八月間新料未登之際選委現任試用佐雜能員按照歷年應辦物料數目分赴附近出產地方照依時價公平採買預給現銀約定臨期收取絲毫不許尅扣賣料之民見價無短少無不踴躍願售并發十六兩官秤至十月內各工開廠臣又分委佐雜人員赴彼監同交兌惟恐仍有偏枯復委承倅大員來往督察各河員俱凜遵功令隨到隨收不敢稍有浮重而承辦之員得以隨時運交事半功倍今於十一月內業已全數交完隨查買價與額定之價不相上下惟盤運人工車腳等項費用並新料虛鬆酌加折耗共計每稽料一觔除官價九毫外糧戶應貼運費錢一文除

五錢以上糧戶不派外其有銀糧一兩者止貼運費錢六十九文較之往年不及十分之一且又無需自辦坐享其逸欣喜逾常感戴皇仁歡聲徧地不數日間盡將貼費如數完納已飭解司歸款物料現經告竣比向年民辦又早月餘實已著有成效抑臣更有請者辦料爲百姓分內之事祇因運交滋累是以官爲代辦但恐行之日久民間忘其原委反視民事爲官事殊失代辦本意而河務緩急不常民辦舊規豈可遽謔應請嗣後每年酌借司庫閒欸委員代民辦理悉照現行章程外仍令該地方公舉正直老成紳士隨同委員辦理俾知其故以示至公庶名實相副而豫中億萬生民咸沾聖德永永無既矣

乾隆三十一年諭漫口需用工料自當按照工程確核估計以濟急需則鄰省辦運既易爲力而事後亦不致籌畫周章豈可多備少用令協濟省分徒費採買辦運若復將原料給還令其繳價歸欸則一出一入耗損必多所有豫省停運工料除留該省修用外并可酌撥山東河工儲爲來年之用如再有多餘仍著解運江省備工概不必給還民戶以示體恤閭閻之意嗣後凡有採買物料官用有餘者均照此辦理著爲令

乾隆三十九年諭漫工所用錢糧河工成例係准銷六分應賠四分此等應賠之項在道

府等廉俸較厚完繳尙易爲力至文員廳佐以下及武職各員均屬俸薄力微若賠數過多完繳未免拮据著按例查明妥辦該部即遵諭行欽此遵旨議定嗣後遇有隄岸保固限外陡被衝決查明該管各員實係防守謹慎並無疏虞懈弛者將用過錢糧除照例准銷十分之六外其餘應賠四分銀兩按其責任重輕酌定應賠多寡總分作十成計算河臣總理河務一切董率機宜是其專責應著賠二成督撫兼管河防責成綦重應著賠一成河道係專司河務大員修防乃其職守應著賠二成廳員駐紮河干工程錢糧皆所經手應著賠一成知府州縣均係地方正印官員例有協守之責應分賠二成參遊專司估計督率防護守備協辦工程應分賠一成半文武汛員駐工防守責亦難辭應分賠半成如無兼管督撫及額設參遊等官省分即將應賠銀兩在總河以下文武各官名下按照應賠成數分別攤賠

乾隆四十年諭嗣後河工歲報錢糧俱著次年全數查明於第三年正月開印後具題如有逾期該部即查明參奏

乾隆四十三年諭豫省儀封考城一帶黃河漫口奪溜被災較重朕心深爲軫惻現在要

工需用料物甚急雖令未被災之各州縣辦運但念昨秋今夏俱係歉收幸六月得雨後補種秋禾而七月內陰雨連綿收成又不免稍減若照定例給價購辦尙恐不敷著再加恩將所辦料物無論道路遠近於正價之外每百觔加價銀五分小民自必踴躍趨事可期迅速厥工該撫務須督率所屬實力妥辦期民間均沾實惠毋使吏胥侵肥中飽副朕軫念窮黎之意

乾隆四十四年奏准豫省歲修搶修稽料麻觔於例價之外分別加增稽每觔加銀一釐四毫麻每觔加銀二分二釐

乾隆四十五年二月堵築儀封決口合龍共用帑銀五百餘萬兩奉諭此次漫工若照向例糜費工銀應著落在事大小官員賠補但此番辦理情形實非從前漫決可比阿桂等悉心經理亦不遺餘力所有用過工料銀兩俱著准其奏銷毋庸議賠惟決口究因平時防護不慎所致從前河臣姚立德撫臣徐績實難辭咎著阿桂查明伊二人任內所辦隄工歲修等項分別著落賠補以示懲儆

乾隆四十八年五月諭據李世傑奏豫省堵築青龍崗漫工及築隄濬渠歷次酌增夫料

價值銀九百四十五萬三千九百餘兩請分作三十年攤征以紓民力一摺豫省自辦理大工以來歷次部撥及動用司庫銀千餘萬兩無非爲百姓保護田廬輯寧家室所有採辦料物僱募人夫俱於例價之外寬裕給值俾小民踴躍趨事以期迅速成工其例價外酌增銀兩自應分年均攤帶征還款在百姓等依限輸將亦屬分內之事但此次爲數甚多而上次漫工案內又尙有攤征未完銀九十餘萬兩若按年帶征民力未免拮据朕自御極以來勤恤民依覃敷愷澤普免天下地丁錢糧者三普免各省漕糧者二不惜萬萬兩帑金俾閭閻共臻康阜又何靳此千餘萬庫項而令小民於每年正賦之外多此征輸耶况現在仰荷上天孚佑大工告成自應廣澤推仁與斯民咸慶盈寧所有該撫等所請分年攤征銀九百四十五萬三千九百二十餘兩以及上次攤征未完銀九十四萬五千餘兩俱著加恩普行豁免以仰答昊蒼嘉貺並示朕惠愛黎元爲民藏富至意

乾隆四十九年諭本年豫省睢州下汛二堡漫口築壩挑河工程現在奏報合龍但念夫料加價爲數自多分年攤扣民力究恐拮据方今部帑充盈朕爲捍衛民生起見從不靳惜帑金俾閭閻共享盈寧之福從前青龍崗加價銀兩既降旨寬免此次漫工所用加價

銀兩事同一律亦著加恩一體免徵該撫出示曉諭咸使聞知以副惠愛黎元有加無已之至意

乾隆五十一年奏准豫省黃河大隄內外灘地招墾征租解交河庫以俾工用

乾隆五十三年覆准豫省新建兵堡三年後每年每座歲修銀五錢彙入夫堡歲修案內報部核銷

乾隆五十七年奉旨豫省河工幫價銀兩從前於通省地糧內一律攤征辦理即屬非是黃河遇有應辦工程在沿河各州縣均資保障護衛田廬爲閭閻生計攸聞如偶值工程緊要採買物料例價不敷不得不量爲幫貼於沿河州縣內按數攤征尙屬近理至與河隔遠全與河工無涉亦令一體均攤揆之事理未爲允協所有此項攤征積久未完銀兩著悉心籌酌當仍攤歸沿河州縣爲是至河工採辦物料雖時值貴賤不齊然各省情形大概相仿即如江南山東均有河務俱須採辦物料並未聞有例價不敷加增攤派之事况河工偶遇險要鉅工或需用物料緊急價值較昂於例價之外稍有如增致須幫價尙爲情理所有若歲修則係每年常辦工程乃亦藉口物價昂貴輒議增添竟至作爲定額

年復一年伊於胡底以小民之脂膏徒爲不肖官吏影射侵漁地步尤非朕軫恤民隨之意此項歲修每年率議幫價起於何時所有該省初議幫價及歷任踵行各巡撫俱著該部查明同此次奏請之巡撫一併嚴加議處

乾隆五十七年奉旨河南河工每歲幫價銀兩前經降旨概行停止此項河工歲需料物固由各州縣採購交工而辦理工程開銷料物皆係河員經手尤應責成總河隨時稽察務令實用實銷毋任承辦之員仍前冒濫而採買之各地方官亦當按照例價購辦不得絲毫派累民間如河工地方官再有前項弊端則惟該總河巡撫是問決不稍爲寬貸

豫河志卷十五 經費二

嘉慶四年六月諭戶部議駁吳璣等奏請攤征河工稽料運費銀兩一摺部駁甚是著依議行河工需用料物價值例有正項開銷豈容輕議加增況自睢汛大工合龍穩固後並無搶險之事不過歲修常辦工程乃該督等以籌備幫價爲詞請於地糧內按年攤征銀十四五萬兩使豫省羣黎均受其累爲民上者豈忍出此雖所稱酌添運費每稽一舫止係五毫而一經州縣吏胥之手則層層加派所征必不止於此數且議加之後不能復減非暫時藉資民力竟永遠累及閭閻矣乾隆五十七年穆和藹曾爲此奏彼時欽奉諭旨以每年常辦之工動議增添年復一年伊於胡底疲小民之脂膏爲不肖官吏影射侵漁地步特將穆和藹及前任初議踵行各巡撫一併嚴加議處豫省豈無檔案可稽而敢踵爲此奏乎朕向聞河工積弊有溢用不能開銷之歎往往借他項彌縫該督等奏請加增運費大約不出乎此倭什布吳璣吳熊光俱著交部嚴加議處

嘉慶七年奏准直隸河南山東江南等省河工堵築事竣例應分賠銀兩數在三百兩以下者定限半年三百兩以上者定限一年數在千兩至五千兩者定限四年五千兩以上

者定限五年勒令完交若數至萬兩以上者以十分計算於五年限滿日完至七分者其餘照准未完銀數按例起限完交如限滿不完及萬兩以上限內完不及七分者即由該承追衙門查參現任人員停其升調效力人員停其補授勒限完納其應升調及補授各河員並曾任河工地方別經升調人員吏兵二部於題請到日移咨工部查明有無逾限未完欠項核覆辦理如有逾限不完之項該督撫率行題請升補者將督撫一併查參如係升調候補及丁憂告病人員通查原籍任所實無家產隱寄者准其於補官日完交如係革職及已故人員由該旗籍查明該員子孫並無服官實係家產盡絕別無隱寄者該旗籍及任所官出具印甘各結咨部年終彙題豁免不得率議分攤致滋擾累其或委辦工段草率偷減或購辦料物有侵蝕虧短損失燒毀等項情節專摺請旨勒限追交外該上司亦有僉委不愼之咎如本人無力完繳即著落該上司名下攤賠如攤賠之項上司別經事故查無家產者即著照例豁免不得輾轉分攤致違定例違者照例議處

嘉慶八年諭工部奏河道搶險工程請飭河臣於奏報情形摺內確計丈尺銀兩以昭核實係爲慎重錢糧起見但險要工程臨時急須搶護多係刻不容緩是以向來各該河臣

奏報情形均卽一面興修迨各處工竣分案造冊題估今若令其於估計後始行搶修轉致於河工有誤殊有關係惟是各該河督奏報摺內凡遇搶險處所往往用一帶等處字樣並不確指起止地名恐啓應汛各員影射浮開及事後增添情弊亦不可不防嗣後凡有添築埽壩等工如勘明實係緊要處所萬難稍緩者仍著各河臣一面上緊搶護一面於興工後卽將新工地名段落確實聲明並各工長寬高厚丈尺若干約需銀數若干逐一分開詳細具奏以便交部查核不得仍稱一帶等處語涉含混其尋常各工仍俟估報後再行興修庶於國帑工程均歸核實面杜浮冒

嘉慶八年十月以衡家樓河溢暫開衡工捐例

嘉慶九年諭豫省河防歲料向於新料登場後用例價採買今據奏稱沿河州縣上年本屬歉收而此次堵築衡工需料較多搜購殆盡此時設法辦理未免諸形昂貴自係實在情形著照所請將現在購料之上南等九廳各按距工遠近分別酌加價值迅行採買以備要需所有此項加價銀十九萬餘兩著卽於司庫墊撥仍照例攤徵歸款該河督等當飭令各廳員妥爲經理毋使稍有浮冒累民

嘉慶十年奏准豫省黃河每年豫籌銀三十萬兩於地丁項下提撥補本年搶險之用
嘉慶十一年奉旨河工歲辦穀麻向無幫價今查明原定例價實屬不敷所有穀麻一項
著准其照例價加增一倍採買報銷以歸核實

嘉慶十一年諭河工應用夫木土石等項向來因價值加增承辦廳員詳請加價該河督
即照時價批准復恐不能按例報銷遂任承辦之員虛估工段寬報丈尺以符部價是該
河督明知所報不實據冊咨部部中亦即照所開工段丈尺核銷竟係相率爲僞且廳員
等以報部工程俱係通融開報勢必藉稱例價不敷任意浮冒其弊將何所不至上下相
蒙不成政體著照戴均元所奏准其將應用物料按照時價實用實報不得稍有虛假仍
著將各項物料價值由地方官詳報督撫按月咨部存查至物價隨時長落原無一定近
日物料昂貴人所共知倘嗣後物價已就平減而報部之數仍按價貴時報銷則係承辦
之員蒙混侵蝕必當嚴參懲辦設將來物價較此時復有加增亦准其據實咨部該河督
等惟應督飭在工大小官員各矢天良確估核銷毋任絲毫浮冒

嘉慶十一年諭河工用費浩繁其弊混之處層出不窮不可不設法嚴杜前經降旨令將

河工報銷一事按照時價具報不准浮開工段以示核實復因例價係多年奉行時價係早晚更易若專憑時價核辦則部中竟無例可循亦滋流弊續經降旨於工程報銷時將定例准銷若干不敷若干應增時價若干隨案聲晰具奏但此事總在經管大員隨時實心查察認真辦理方於辦工無誤而用項不至虛銷京城辦理工程皆特派大員查驗收工鐵保僅請令州縣於工滿之日親赴查驗尙不足以昭鄭重嗣後竟當派司道府大員前往各工按原估工段丈尺逐加查勘並將河工例價應報若干現在因何不敷應加至幾倍方能辦理之處據實結報方准奏銷若查有偷工減料情節即嚴行揭參治罪以示懲儆倘司道府等瞻徇不舉別經發覺一併治罪不貸

嘉慶十四年築衡工大壩南面越埵挑壩土方銀二萬五千餘兩

嘉慶十四年諭黃河南北兩岸大隄關繫緊要自嘉慶八九兩年培築以來閱今數載節次盛漲漫灘隄根逐漸淤墊其隄身單薄處所自應擇要增培所有兩岸七廳隄壩估需土方銀五萬四千餘兩即於藩庫動撥責成該道廳於大汛以前一律趕辦完竣務期帑不虛糜工歸實用以資保衛

嘉慶十五年諭河工修防事宜首重歲修次則搶修如果認真經理自不應有另案之工從前例價不敷廳員等或借另案名目通融辦理乃自嘉慶十一年加價之後歲搶修二項價銀業已增至兩倍而另案工程仍不減少據工部摺內稱查核所奏各案其以舊埽朽腐沈陷蟄塌另案開報者竟有四分之一是明係歲修工程不能堅實甚或止將情形較輕處所略事補苴轉將實係沈蟄朽腐者留爲另案開銷地步亟須劃定限制應即照工部所請嗣後著該河督等將每年三汛內修過工段丈尺分次開單具奏再行彙案題估如有現在修防未經報明淤閉之工旋因舊埽空虛沈陷蟄塌另案奏報者將所需銀兩著落該道廳等官分別賠繳不准開銷並著該河督等將各廳汛新舊埽工開具地名起止段落丈尺某段業經淤閉某段現在修防造具總冊送部其每年增入修防及續經淤閉者再於秋汛後專案另報以憑查核

嘉慶十六年諭李亨特等奏沿河稽束歉收購運歲料懇恩暫增價值一摺本年黃河異漲河南沿河灘地被淹稽束歉收且江境興舉鉅工料價騰貴該省豫辦歲料例幫二價不敷購運自係實在情形著照所請將河南歲料價值於例價幫價外每觔增銀五毫每

柴五萬觔增銀二十五兩並例幫二價共銀九十五兩所有本年應辦十七年歲料著即照加價辦理俟來年稽束有收即行停止其河南增價銀兩即著於十七年減辦稽束節省例幫二價及十五六兩年捐廉項下節省銀兩並開歸河北道庫備防稽料價銀欸內動用

嘉慶十七年奏准衡家樓大工案內原撥粵海關銀一百萬兩作爲豫省歲料幫價成本交兩淮長蘆各商每月一分生息以爲歲料之用自二十三年停止攤廉提用息銀

嘉慶十七年議准豫省採辦歲料每柴除例銀四十五兩外再加幫價二十五兩共例幫價銀七十兩不得以五六七八等月新舊不接工用較繁於幫價之外復行議增

嘉慶十七年議准豫省採辦歲麻每觔除例價銀一分四釐四毫外再加幫價銀兩一分四釐四毫共例幫價銀二分八釐八毫其搶險添辦麻觔照歲麻價值採辦不得於幫價之外再請加增至隔河運送麻觔如南北兩岸有應量爲調劑之處即於所加幫價銀內酌籌辦理亦不得於幫價之外再請增加

嘉慶十七年議准河工報銷按束核觔按觔核價以符定例

嘉慶十七年議准查驗拆出微爛不適工用之料不及一成及抽秤舫重有一處不足者將承辦之廳員革去頂戴戴罪賠補全完開復一成以上至二成及舫重有二處不足者承辦之員降三級調用仍押令賠補二成以上至三成以外及舫重有三處不足者承辦之員革職賠補如無力賠補責成該管道員照數賠繳該管道員如先行查出揭報免議其失察者一併分別議處

嘉慶十七年議准各省河工豫辦歲料及備防料物該督撫於採辦完竣時將各廳實買料物若干先行造冊送部年終再行造具舊管新收開除實存四柱清冊送部備查並於修工案內將動用何項料物若干數目詳細聲明以憑查核

嘉慶十八年議准下南河廳祥符上汛黑堽一工兩面均有積水阮塘土方例價不敷每方暫加價至八分四釐及一錢三分四釐不等嗣後不得援以爲例

嘉慶十九年諭吳璫等奏酌定料物土方價值一摺豫省今歲兩水霑足新稽新穀現已漸次刈穫俱屬豐稔該河督等覈減料價酌較上年所定稽料每垛減去銀五十兩麻每斛減去銀五釐所辦甚屬覈實其土方每方於例幫價三錢外酌加幫價一錢亦著照

所請辦理

嘉慶十九年奏准河南省黃河兩岸防險工程在司庫存公銀內動支銀一萬兩以五千兩分儲南岸鄭州並歸德府庫餘五千兩另儲武陟封邱二縣庫

嘉慶十九年命河東副總河歲支養廉銀四千兩

嘉慶二十年奏准豫省河工歲料不敷搶險之用於五千垛之外每年添購二千餘垛例幫價銀全行作正開銷

嘉慶二十年諭吳璣等奏請酌加歲料津貼銀兩彙入大工案內攤征歸款一摺豫省值與辦大工之後存料較少例價不敷若責令照舊購買恐廳員等藉詞賠墊貽誤工需加恩著照所請將附近睢工購料最難之儀曹考下北三廳每觔加銀五毫距工稍遠之蘭儀下南商虞祥河四廳每觔加銀四毫距工較遠之中河上南歸河衛糧黃沁五廳每觔加銀三毫並收買柳枝雜草搭配稽料所有乙亥年歲料四千五百垛共加價銀八萬七千餘兩著由司庫墊發即照例統入大工案內攤征歸款

嘉慶二十一年諭方受疇奏籌撥河工搶險銀兩一摺豫省河工每年於藩庫地丁內撥

銀三十萬兩另欸存儲以爲搶險之用所有上冬支發豫買稽料銀十四萬兩著毋庸扣除仍照向例儲備其臨時添撥銀兩若於具奏後給領實恐緩不濟急嗣後如遇歲定搶險銀三十萬兩將次用完着該河督察看情形應需添撥若干會同該撫覈明一面具奏一面行司提取備用俟霜降後如有餘存仍奏明歸還原款覈實報銷毋稍浮冒

嘉慶二十一年議准河南省黃河搶修每年不得過二十三萬兩

嘉慶二十一年奏定東南兩河每年另案用過銀數令該河督將一年統用銀數彙奏一次並將上三年用銀多寡比較以備查覈

嘉慶二十二年奏准增培黃河南北隄壩津貼銀十二萬三百餘兩在司庫內籌撥

嘉慶二十三年諭吳璣等奏稽料運費繁重例幫二價不敷抽挑河渠人夫口食維艱著照所請准其每稽一舳給銀二盞每土一方給銀三錢工竣覈實報銷

嘉慶二十四年諭吳璣等另摺所奏採辦稽麻興挑土方例價不敷請照歷次辦理大工酌增例價幫銀著照所請梳稽一項每舳准給例價幫銀四盞燈麻一項每舳於例幫價銀四分之外准其再加二盞挑挖引河及抽溝土方價值准其每方給幫價銀四錢其壩

頭各項土工仍照向例每方給銀三錢所需例幫價銀俟工竣之日仍照例分別銷賠攤
征

嘉慶二十四年十月諭吳璣等奏從前歷屆大工均有投効之例或認辦工段或交納捐
資此次武陟大工請援照成例准令各省投効人員赴工捐輸交納豫省藩庫除准分發
四省三河外其連界之山西陝西安徽湖北浙江等省並准分發自道員至佐雜分別授
職等語見在武陟大工需費浩繁著照所請准令各省人員投効其如何按捐輸之多寡
分別授職及分發之處仍著吳璣等查照上屆成例妥議具奏

嘉慶二十四年十月諭本年豫省武陟興辦大工節據吳璣等奏請撥解工需銀九百六
十萬兩連次奏報止於勘定壩基尙未興工進占昨又據奏請暫開投効事例亦准其所
請合計給發工銀幾及千萬又有投効人員捐資儘足敷大工之用將來如有贏餘工竣
仍當覈實奏繳不准再請分毫慎之朕聞向來興舉大工每於工次搭蓋館舍並開廛列
肆玉器鐘表紬緞皮衣無物不備市僧人等趨之若鶩且有娼妓優伶爭投覓利其所取
給者悉皆工員揮霍之費而工員財賄無非由侵漁帑項而得此種惡習歷次皆有惟十

九年隴工較爲慎約此次吳璫等務當嚴禁浮靡將所發帑項實歸工用不特吳璫那彥寶李鴻賓琦善四人應一塵不染所有在工文武員弁俱當嚴行約束勿以國家重大工程爲伊等漁利行樂之地如有違背小者柳示大者正法法在必行朕言不再此時工需銀兩計已陸續到工吳璫等着即尅期興工進占定於明年桃汛前合龍如屆期不能贖事亦必將吳璫等治罪不貸將此諭令辦工大小官吏知之

嘉慶二十四年十月諭李鴻賓著給予郎中銜留於河南專司大工錢糧伊曾任大員儻工需內有冒濫支應之處准其直揭部科如果慎司出納辦理核實工竣時交吏部帶領引見候朕施恩若不認真稽覈定行治罪不貸

嘉慶二十五年諭吳璫等奏馬營壩工續請加價銀兩懇請前後統計增給等語前據吳璫等奏馬營壩大工承辦稽料土方因道遠雪大每料一觔請加銀一釐共銀五釐每土方一畝請加銀一錢共銀五錢當經降旨准其自奉旨之日爲始併入攤徵茲復據奏稱此次購料運工至五六百里以外挑河集夫至四五十萬之多承辦各員賠累過甚所增之價實係前後牽算酌加津貼所奏尙屬實在情形著照所請准其前後牽算統計增給併

入攤征項下歸款

嘉慶二十五年諭張文浩等奏酌議儀封料土價值一摺著照所請每料一垛給銀一百八十兩每綠麻一筋給銀四分其挑河抽溝土方每方給例加價銀五錢壩工及各項土工每方給例加價銀三錢例價照銷加幫各價攤征還欸

嘉慶二十五年奏准儀封漫口工程內有土性沙鬆必須包築淤土工段每土一方酌加津貼銀一錢八分四釐

嘉慶二十五年八月以儀封漫口准准商捐銀一百萬兩豫備工需

嘉慶二十五年奏准儀工善後工程按儀封酌減稽料每筋給銀二釐四毫麻每筋給銀三分二釐其取土最遠及水中澆築者土每方給銀四錢其次給銀三錢近者仍照例價作正開銷幫價攤征還欸

嘉慶二十五年諭姚祖同奏酌議修理省垣護城大隄一摺河南省城濱臨黃河舊有護城大隄備黑堦等處險工上年祥符上汛六堡漫溢以致殘缺多處亟應繕完以資保障據該撫委員勘估共土三十三萬五千二百五十九方零需銀六萬四千三百六十九兩

零請於通省攤捐養廉先借庫款興修分年接扣歸款豫省官員歷年攤扣款項較多再加攤此項隄工銀兩恐辦公不免拮据著加恩賞給銀三萬兩以爲工費准其作正報銷其餘銀三萬四千三百六十九兩零在豫省各官養廉內公同攤扣並准其先於司庫動撥嘉慶二十六年暫將該省衛案軍需二成養廉停扣此二年中將此項隄工銀三萬四千餘兩全行扣完再扣衛案以示體恤

道光元年諭豫省連年黃河漫溢被水各州縣小民失業者衆其未經被災之區亦因歷次河工加價攤徵款項積累繁多民力不免支絀宜緩催科俾資休息著加恩將該省衝工隄工加價及陶北河沁河賈魯河並各處隄工一切應行攤徵銀兩均展緩三年再令接續完納其馬工儀工加價及沁河等項攤徵銀兩並著緩至三年後再行奏明起限

道光二年諭河南儀工奏銷開報有以少報多之稽料引河等款即有以多報少之夫工雜料等欸據玉麟等查明該省歷經辦有成案委無含混支飾著即令覈實報銷惟夫工項下誤列銀十萬二千二百七十六兩零例應剔出歸入該省原奏二兩經費項下支撥如或不敷按照原奏於通工河撫司道及知縣以上攤捐不准正項開銷其提扣八子錢

文雖係以公濟公而浮支濫用誠所不免除提入藩庫銀五千兩外計覈實銀四萬二千七百七十九兩零姚祖同既未奏明自認賠繳著即罰賠歸欵計長支料價之邵彙等十一員未繳銀十萬九千六百二十四兩零並吳錫寬買草未繳銀五千九百六十兩照例於原歸銷數內以六成准其開銷以四成劃出著落該撫司道分賠二成料員各賠二成原歸銷數之四成即行扣出不准列入開銷其扣出之誤列銀著罰賠八子錢及分賠料價各項共合銀十九萬一千二百九十兩零統令解貯藩庫河工歲修項下備撥

道光二年諭各省河道歲修搶修工程均有定額其另案工程動用在五百兩上下者分別奏明咨部所以昭覈實而重帑項也乃本年豫省河工另案動撥銀至一百餘萬兩之多如果工程盡歸覈實錢糧何致逐漸遞增河工情形隨時不同其工用既有增加之年即應有減少之年若每歲有增無減伊於胡底國家經費有常該河督並不加意撙節殊負朕委任之意嗣後遇有應辦工程著該河督隨時實力稽察毋得率聽屬員慫恿致滋浮冒如有多開工段寬估虛報等弊即行嚴參懲辦

道光二年奉旨戶部議覆署河東河道總督嚴烜等奏請於例撥防險銀兩外循例添撥

銀三十萬兩以裕工需著照所議准其在河南藩庫徵存地丁項下動撥銀三十萬兩另款存貯備用至此項豫備搶險銀兩嘉慶二十三年以前均添撥銀二十萬兩自二十四年續請添撥之後即每年撥以爲例概請添撥銀三十萬兩黃河水勢長落靡常原應察看情形預爲籌備然需用之數亦當歲有贏絀何以增添之後輒卽作爲常額其奏請添撥摺內僅稱例撥銀兩將次用罄並未將動用數目切實聲明恐啓浮冒之漸著該署河督等將預撥帑項樽節動用嚴飭廳員覈實支銷總期工歸實用帑不虛糜嗣後請撥工需摺內務將已用銀數切實聲叙以憑稽覈

道光二年奏准河南省武陟縣堵合沁河南岸韓卹民堰漫溢各工仿古樊卹漫工成案稽料每觔共例加價銀二釐糞麻每觔共例加價銀二分八釐八毫挑河幫戩還隄各土工每土一方共例加價銀三錢由司庫借撥照例攤徵還款

道光三年奏准河南省武陟縣堵築小劉卹及原馬柵漫口需用稽料每觔給價銀二釐挑土每方給例加價銀三錢例價作正開銷加價攤徵還款

道光五年諭程祖洛奏察看豫省攤徵加價積欠一摺前據奏籌議接征河工加價等款

曾經降旨令將嘉慶十八年至二十五年積欠等項暫緩一年察看情形據實具奏茲據該撫查明前項積欠本係該省查豁項內因年款較近劃出從前延欠多係被災窮民嗣因災積壓欠戶半非原業且又有遞年應攤款項若新舊並征民力不免拮据自係實在情形所有嘉慶十八年至二十五年積欠加價攤征等款共八十二萬七千二百四十兩零除蘭陽因災已豁各加價銀九千四百二十九兩零尙應征銀八十一萬八千二百十兩零著加恩概予豁免此係朕軫念窮黎恩施格外經此次蠲免之後民力自可展舒嗣後該省應完現年丁耗並應攤加價及帶征歷年錢漕征款該撫務當嚴飭各屬實力征催年清年款毋得藉口積逋妄生冀幸該撫亦不得冒昧再行奏請國家經費有常曠典不可屢邀也

道光八年奉旨工部議覆嚴琅奏豫東黃河兩岸各廳隄堰壩等工所開丈尺土方銀數單內土方價銀二錢一分六釐至三四錢不等並未將例價津貼各若干分晰聲叙著該河督即飭該道於估銷冊內分別開明具題核辦至例價外津貼一項原係偶爾請加乃自嘉慶十九年以後除二十年及二十四五等年照例開報外其餘各年俱請加津貼

援以爲常年復一年何所底止嗣後該河督務當覈實估計力求樽節不得任聽工員率請津貼致滋糜費前經工部奏定章程令河督將一年統用銀數彙奏一次並將上三年用銀多寡比較以備查覈乃該河督每年總未將增培隄工銀數列入彙奏單內率以奏撥之項非常年例辦銀款爲辭試思隄工年年增培自應統入比較著河督嗣後彙奏單內除歲搶修定額外凡一年另案工程俱併入單內開明並將上三年用過銀數聲明比較毋得稍涉含混致干重咎

道光八年諭河工需費爲度支之大端近年例撥歲修搶修銀兩外復有另案工程名目惟常年所撥例項原爲修防搶險而設若一切修治得宜則不應險工新工層見疊出雖據該河督等於請帑摺內聲稱如有節省存爲下年工用亦不見實有節省向來河工積弊廳汛員弁總利於辦工即如黃河坐灣迎溜之處時而濬做埽段固有不得不然之勢然其間有不應庸而妄施工段者尙不知其凡幾總不過爲開銷錢糧地步甚至溜隨埽斜對岸生險險生而工費迄無已時迨至失事則又指爲無工處所冀圖影射規避縱有應行賠修工段亦止先以帑項興辦賠項終無繳期在該河督等受恩深重具有天良或

不致稍爲濡染豈能保工員之必無浮冒國家經費有常斷不容以如許帑藏供此漏卮前經降旨不得藉口另案名目任意虛糜嗣後該河督等務將年例撥解工需加意撙節如有應辦之工不能不假手應汛員弁然總須責成該管河道各矢天良認真督辦有犯必懲該河督等亦應破除情面時加查察稍有偷減虛冒等弊該道徇隱不揭一併嚴參懲辦以期力挽錮習工歸實用經此次飭諭之後無論歲修搶修及隨時興舉要工仍不能工堅料實致令帑項虛糜或經朕訪聞或被人糾參定將工員河道及該河督等一併執法嚴懲不稍寬貸

道光九年奏准嗣後彙奏一年另案銀數單內除歲修搶修定額外如實係興舉大工應於摺內奏明不入比較其餘常年奏明另案工程均令併人單內開明將上三年用過銀數聲明比較毋得另立專案辦理名目

道光九年奏准豫省北岸曹考廳應拋碎石水程較遠照例如增運腳每方銀十兩二錢六分六釐

道光十二年河東河道總督林則徐奏查核東河碎石工程情形疏曰竊臣於上年十一

月內在江南途次承准軍機大臣字寄道光十一年十一月初二日奉上諭本日嚴烜奏豫省上南中河曹考三廳險工酌拋碎石一摺已明降諭旨准於豫省藩庫照數撥發趕緊採運矣此項碎石工程起於南河道光七年九月間始據嚴烜奏蘭儀廳柴壩十八埽以上已將碎石蓋護化險爲平十八埽以下及下北十一堡廂修歲無慮日此後年復一年更恐危險堪虞現飭各道仿照柴壩碎石成案分別估辦以爲固工節費之計等語是年蘭儀下北兩廳當經降旨准行即用碎石拋護則歲料防險等項自應節省乃歷年以來碎石工程無歲無之而其採辦來年歲料及請撥防險銀兩并未節省絲毫究竟此項碎石工程是否於黃有益如果有益何以歲料並不見節省徒添出碎石一項費用林則徐係朕特簡甫經到任無所用其迴護此時亦不必亟亟著明查暗訪悉心體察情形據實覈奏將此諭令知之欽此當經臣臚片陳明俟到東河訪察情形再行覆奏在案自到任以來將碎石檔冊逐一檢查從前豫東黃河本無拋護成案因道光元年前兩江督臣孫玉庭南河河臣黎世序會奏以碎石工程實資鞏固並無流弊東河從前未拋碎石是以漫決頻仍請飭一體照辦卽創始之初多費數十萬金而日後工固濶安不惟節省費實

可利民等語旋奉諭旨飭令仿照兼辦二年春間前河臣嚴烜覆奏請於北岸黃沁廳馬營挑壩酌量試拋繼因河勢不定僅拋兩段而止迨五年間調任河臣張井以南岸蘭儀廳柴壩工程險要議辦碎石兩次奏准拋護一萬四千八百餘方該處險工因成平穩迨後北岸之下北祥河曹考南岸之中河下南等廳先後仿照請辦經嚴烜節次奏准在案查此項動用錢糧除馬營壩拋試兩段不計外自道光五年至十一年已拋碎石共用銀六十五萬餘兩上冬估辦之上南等三廳方價七萬四千餘兩尙不在此數之內核之歷年採辦歲料及請撥防險銀兩均未減少誠如聖諭碎石工程如果有益何以歲料並不見節省隨於兩次上隄周歷查訪並詢之年老兵民咸謂未辦碎石以前誠不知其有濟與否既辦之後每遇險工緊急潰埽壩隄力加拋護即不致於潰塌功效甚著等語惟何以未能省料之故詰詢員弁兵夫或謂拋石本在埽前祇能保埽段之不外游而不能禁舊埽之不下墊故雖有石之埽仍不免擇要加廂惟較諸未經拋石之埽需料自然大減但統計兩岸隄工長至二十餘萬丈而隄前之有埽者六千八百餘丈埽前之有石者甫及二百七十餘丈豫東河面寬闊溜勢時有變遷此工閉而彼工生購料防險諸費卽難

概省等語臣核其所言似亦近理然思用料之節省與否天事居其半人事亦居其半譬如極險之工忽然淤閉平緩之處忽又生工每非恆情所能測度工生則料費工閉則料省此存乎天事也亦有出於人爲者如順隄廟埽費料實多惟溜到隄根即不能不資以搶護而工非自閉亦不能不逐歲加廟若工員果悉機宜善揣溜勢則於工之將生未生豫築挑壩使之溜向外趨埽即可省蓋攙溜者埽而引溜者亦埽觀於埽前水深其故可想一壩得力可護數段之工則不須順隄廟埽而所省無算矣然若審勢未確挑護失宜壩守不住仍復退順隄廟埽則勞費更不啻什倍此又人事之難言者也總之有治人無治法在工人員果皆講明利弊自無枉費之工果能皆激發天良自無妄開之費至料物貯於隄上督道常川往來注目留心不徇情面似亦無可藏掩大抵覆實查驗即歲料與碎石並用未嘗無漸省之方如其不實則雖裁去碎石一項而他物稱是亦可藉端滋弊要在認真督察而已奉諭此項東河碎石工程起於道光二年嚴煇試辦僅拋兩段而止自道光五年至十一年已拋碎石共用銀六十五萬餘兩上冬估辦上南三廳方價七萬三千餘兩尙不在此數內核之歷年採辦歲料及請撥防險銀兩均未減少碎石既增歲

料自宜節省歲料不省碎石豈不虛糜吳邦慶並非河員出身無所用其回護著於交卸後迅赴新任與林則徐見面詳細詢問悉心體察情形如果估拋碎石化險爲平以後歲料漸可節省照運河各廳臨湖隄工兼用碎石歲銷錢糧無多豈不甚善若年復一年徒添出碎石費用則是於歲料外又增一項開銷國家經費有常豈能供此無底之橐至林則徐奏稱工員果悉機宜善揣溜勢則於工之將生未生預築挑壩使溜向外趨掃即可省一壩得力可護數段之工所省無算所奏不爲無見著吳邦慶於到任後實心實力講求利弊破除情面不可任聽工員致滋浮冒總期無枉費之工無妄開之費方爲不負委任道光十二年諭吳邦慶奏籌議估拋碎石並酌改舊章一摺前因東河碎石工程遞年加增降旨交吳邦慶詳查核減茲據該河督查明豫東兩省濱黃各廳除歲購料無從增減外所有本年添辦防料共需銀十三萬六千兩著照所請改爲四成辦料六成辦石其無須貯石之廳六成銀兩歸併他廳辦石俟各廳存石二三千方即將每年專案請石逐漸核減該河督務嚴飭各廳此後發辦碎石無論爲專案爲六成統限伏汛以前全數堆貯該河督親往查驗廳拋工段由該河督暨該管各道勘定後方准動用儻有遲延偷減並

擅用石方者據實參處毋稍姑容

道光十五年奉旨工部奏核議另案工程銀數不能核實請飭令該河督分析具奏並嚴定章程以杜浮冒一摺河工不外歲修另案及興舉大工三項除歲修工程銀有定額興舉大工事非常有均照舊不入比較外其另案工程銀無定額工無定處影射浮開及事後增添情弊不可不防是以向來辦理例案有興工之段落而後可以彙奏清單有清單之數目而後可以比較多寡茲據該部查核東河十四年分未奏清單先入比較之銀二十七萬三千餘兩前後數目不符奏報不遵例限已辦之工部中無案已動之帑估銷無期比較單內不過虛名節省其豫報浮數未奏清單及專案數目已出比較之外者更不難事後增添巧爲湊合且搶險防汛已完之工易於核計尤非懸估未辦者可比所有此次查出指明各數著該河督逐款分析速行具奏以憑查核嗣後每年彙奏清單務遵奏定限期無論奏咨各案彙爲一冊其比較上三年之數原從清單而出毋庸分爲兩事致滋歧異著該河督附摺聲明比較另立一單具奏後飭部查核覆奏如有遺漏續報之案或藉詞延玩先入比較後補清單即照搶險工程估銷逾限著落賠還之例不准開銷其

專案名目永遠革除以歸畫一而杜浮冒

道光十五年三月諭山東巡撫鍾祥河南巡撫桂良有人奏東河南北廳屬動用銀兩吳邦慶上年安瀾摺內稱各員撙節省錢糧埽工碎石兩項省銀三十餘萬兩而十月報銷摺內則云比十三年省銀十二萬餘兩其碎石留存可值十五萬兩前後所奏數目不符且碎石乃例應籌備之項今年仍應開銷不得謂之節省東河自道光元年至十年每年動用正項錢糧多至一百萬兩以內其用至百萬以外者不過二三年惟十一年搶辦險工用銀一百四十萬今吳邦慶任內十二年十三年十四年俱用至一百十萬兩以外較之十年以前有多無少是所謂撙節錢糧一語不過爲屬員升官考語按之實際仍屬子虛未免意存隱飾河工正項動支之外尙有找補不敷銀兩此三年中多找銀二三十萬兩即係多支銀兩之證等語該撫與吳邦慶駐紮不遠見聞必確著詳晰查明其錢糧撙節數目是否與原奏相符據實迅速具奏○按此係給事中金應麟參摺中動撥較多一款於五月經大學士文孚會同山東巡撫鍾祥查明報銷案內所稱省銀十二萬餘兩係專指節省埽工而言安瀾摺內所稱約省銀三十餘萬兩係將節省埽工並存廢碎石及

下年緩辦埽工合計而言前後牽湊錢糧尙無浮冒其保舉過濫一欵未錄

道光十六年四月河東河道總督栗毓美奏稱竊照豫東黃河兩岸歷係以隄束水以埽護隄近年又以石護埽原無用磚之案上年秋間北岸原武兩汛串溝分溜刷成支河上下四十餘里沿隄節節喫重因係無工處所向未儲備料石維時放價收買民磚或用以拋壩挑溜或用以護坦防風隄身不致冲刷化險爲平本年二月因陽武三堡支河分爲兩股北股距隄較近設法堵截亦係先用磚石築壩後用料土加戩得以挽歸南股工程極爲穩固然究係支河分溜恐磚塊形質較輕於大河未能得力茲又於黃沁廳攔黃埧接築壩工下南廳祥符上汛十九堡黑堽工迎溜喫重之處拋壩挑溜臣週歷兩岸查驗工料凡見有河水漫及隄根飭令試拋攏護卽可不至生工免致廂埽引溜實已屢試屢驗頗有成效查豫東黃河大隄除蘭儀九堡與曹考十二堡對岸相距僅三四里其餘各廳自七八里至二三十里不等灘面極爲寬闊汎水既長落靡常溜勢亦提坐無定近年埽段愈廂愈多不免工繁費鉅此後隨處試辦少添新埽未始非節省經費之一端惟須定以價值庶可隨案報銷查例載河磚每塊寬五寸厚三寸三分長一尺二寸價銀二分

六釐四毫又大料河磚每塊寬七寸五分厚四寸一分長一尺二寸價銀四分九釐二毫八絲現在收買民磚大小厚薄不等每塊牽寬五寸厚二寸長一尺價銀六釐足抵河磚過半之用牽算每千塊可堆一方緣豫東碎石成規係照道路遠近按廳定價惟有距山最近之黃沁一廳每方銀五兩二錢七分一釐及五兩七錢九分六釐其餘各廳每方自六兩九錢九分六釐至十三兩二錢九分六釐不等今磚價合計每方需銀六兩較之碎石所省已多且碎石必須濟源鞏縣開山採辦春杪夏初始能運工磚塊則隨地隨時皆可收買毋庸分別遠近應請一律每塊作銀六釐合無仰懇俯准照數報銷以昭核實臣當通飭各廳量爲購貯以備工程緩急之需俟經伏秋大汛實可抵禦盛漲再於添料項下將料石磚三項酌定成數奏明分別購辦無須另請錢糧以歸節省

道光十七年諭栗毓美奏試辦磚工確有成效請豫提銀欸先事籌辦一摺河南省黃沁各工收買民磚拋壩擋護化險爲平屢著成效該河督請撥銀兩先期籌辦著照所請准其於戊戌年春伏兩汛例撥備防銀三十萬兩內由河南藩庫豫提銀十萬兩分派各廳多添審座先時燒造惟磚料體質堅鬆迥異必須工堅料實方能經久該河督務當先期

飭知廳員認真監造臨時該河督親往驗收儻有草率偷減等弊卽行嚴參懲辦其所提銀款著與歲稽麻石統歸來年報銷

道光十七年諭敬徵栗毓美奏酌擬改辦碎石章程一摺東河試辦磚工現據敬徵查勘明確議請分別存貯暫停燒造自廳以預辦碎石爲急務著照所請所有本年五月間奏准豫提戊戌年例撥防險銀十萬兩准其儘數改辦碎石其置窑燒磚卽行停止並著酌定各廳用石多寡分派卽時開採限於明年桃汛前先完一半伏汛前全數運工由該河督覈實驗收指示拋辦儻有藉詞延緩限內運不足數者卽行參處其例辦六成碎石仍照常於霜降後扣明添料存數再行發辦此後每年查勘情形酌覈增減於七月內奏明豫提銀數發廳備辦以期源源接濟工用不匱

道光十七年諭東南兩河每歲另案工程奏銷銀數曾降旨飭工部按照開報銷冊逐款鉤稽開具簡明總數於年終彙奏一次該河督自應遵照辦理茲據該部查明東河原陽兩汛動用本款銀四萬四千三百八十八兩零未_曾列入比較辦理殊未畫一嗣後無論動用何款著一律歸入比較其廢餘防料如來年本工動用卽行報部查覈毋得含混參

差以照數實

道光十九年諭栗毓美奏預籌儲備工需以防串溝隱患一摺又另片奏磚工得力省費情形等語著照所請准其於北岸黃沁廳屬之馬營榮原兩隄南岸下南廳屬之祥符下汛陳留汛每廳各購磚五千方於情形險要之處酌量多寡分段堆貯備用凡所築土壩飭令工員用磚擇要包砌此項磚價先由道庫墊發俟於秋間奏請購石項下撥還歸欸此外祥河曹考上南商虞各廳應先事豫防者仍著該河督隨時督率道廳妥商辦理並於查驗工料時認真稽查如工員購磚不實即行嚴參著賠以重工需至用磚搶辦險工較廂埽更爲便捷且較石價多寡懸殊錢糧節省又所占河面無幾不至有與水爭地之虞該河督既確有把握朕卽責成辦理總期行之無弊方爲不負委任其應貯磚塊仍令向民間收買不必廳員設窯燒造之處亦著照所議辦理

道光十九年奏准河南省各廳縣捐銀一萬兩發商按月一分生息作爲武陟縣沁河兩岸隄工經費

道光十九年五月吏部工部會奏稱道光十九年二月二十日奉上諭本日據御史蔡家

玆覆奏河工賠項處分寬縱著吏部工部會同悉心核議具奏欽此欽遵抄出到部臣等查河工賠項名目本非一端有所用工料與原奏不符及與例浮多名爲核減者有領銀未辦或辦料未足名爲溢領者此外有堵築漫工准其銷六賠四謂之分賠有辦工之員已故責令子孫賠繳謂之代賠或上司代屬員賠繳謂之攤賠或貽誤情事較重奉旨著追謂之特旨嚴追之欸情節既有重輕處分亦應有等差今該御史奏內稱工部舊例數百兩賠項逾限不完已有革職監追及查封家產之條今吏部所載十萬兩以上者其處分不過降調相去大相懸殊又稱河工賠項總以銀數之多寡爲處分之輕重若以官職之大小爲處分之輕重窒礙難行百弊叢生等語臣等查河工賠項若不按其情節概以銀數之多寡定處分之輕重核與緣情定例之義亦有未協即如工部則例內稱河工堵築漫口准其銷六賠四銀兩按作十成分派總河賠銀二成兼管之督撫賠銀一成河道賠銀二成廳員賠銀一成府州縣賠銀二成參遊守備賠銀一成半文武汛員賠銀半成等語在總河督撫或統轄全省或兼轄兩省無論何處漫口統責令總河督撫分賠其河道廳員以下等官必分別某處漫口方責令某處專管兼管之員分賠是總河督撫之分

賠不分畛域廳員之分賠則各分畛域情節既有不同處分不能不有區別至特旨嚴追之款係辦公貽誤情節較重雖較之核減等款尙無浮冒情事惟因辦理不善以致帑項虛糜究與分賠代賠攤賠者有間亦未便與分賠等款一律辦理以致輕重失當惟此等賠項工部舊例並無分限吏部舊例亦無處分即十三十四兩年所議統限分限處分亦與督撫尋常分賠等款無別臣等公同酌議凡特旨著追銀兩應從重另議專條其督撫尋常分賠等款應仍遵十三年欽奉諭旨遵行再該御史所奏吏部新定處分過於寬縱係專就銀數多寡督撫屬員處分應歸一轍而言而於各項賠款之情節及各項應完銀兩只有統限未有分限之處未爲詳悉今奉旨交臣等悉心核議自應酌核情節分晰名目始能歷久奉行以歸允當如溢領銀兩跡涉侵蝕前於十四年經工部奏交吏部議定照核減銀兩逾限不完亦議以革職監追又於十六年經工部奏明此等款項係領庫項入己與分賠代賠因公核減者尤屬有間請旨飭下河督查明以前此項未完銀兩其現任河工者立即追繳業已去任者即著落上司攤賠亦不得列入分賠以致懸宕各在案惟從前並未立有分限既不按限查催仍屬有名無實應請一體酌定期限其尋常分賠

代賠攤賠之款本員並無浮冒侵蝕情事若於核減溢領並歸一例亦不足昭持法之平自應將吏工兩部則例互相核對逐條分晰庶免轉轅查吏部則例河工核減與河工分賠銀兩分作二條核減銀兩逾限不完革職監追分賠銀兩逾限不完應行降調而工部則例河工應賠銀兩三百兩以上三百兩以下係合核減分賠兩項作爲一條逾限不完統係革職監追未免牽混且河工分賠銀兩未完吏部則例內稱照戶屬項下分賠代賠例議處皆有分限每限不完皆有應得處分如統限完不足數降一級調用而工部則例河員應賠銀兩只載統限並無分限吏部則例河員只有五千兩以上逾限不完處分至萬兩以上并無作何議處明文應照五千兩以上之案遞如處分始爲周備以上各款臣等悉心核議於吏部例內所未備者應行添入工部例內所牽混者應行畫出務使款目分明處分允當以期奉行無弊所有現擬各條另繕清單

特旨嚴追銀兩未完現擬

銀數自一千兩以下起至十萬兩以上止限期至勒限一年起至十五年止處分自罰俸二年起至革職止

查特旨嚴追銀兩未完情節較重未便照尋常分賠等款之例議處酌定期限遞加處分

謹擬特旨嚴追之款如數在一千兩以下之案於文到日起限一年完交初參不完罰俸

二年再限一年完交二參不完罰俸三年仍再限一年完交三參不完降二級留任另行起限仍令完納完日開復一千兩以上之案統作十分計算勒限四年分四限以一年爲一限每年能完至二分五釐者免其處分若完不及數初參罰俸二年二參罰俸三年三參降一級留任四年限滿能完至七分者將降留之案開復按其未完銀兩另作分數再行按年完納如不完及七分者四參降一級調用若完不及七分之半降二級調用五千兩以上之案統作十分計算勒限五年分四限以一年三個月爲一限每限能完至二分五釐者免其處分若完不及數初參罰俸二年二參降一級留任三參降二級留任五年限滿能完至七分者將降留之案開復按其未完銀兩另作分數再行按年完納如不完及七分者四參降二級調用若完不及七分之半降三級調用一萬兩以上之案統作十分計算勒限六年分四限以一年半爲一限每限能完至二分五釐者免其處分若完不及數初參降一級留任二參降二級留任三參降三級留任六年限滿能完至七分者將降留之案開復按其未完銀兩另作分數再行按年完納如不完及七分者四參降三級調用若完不及七分之半降四級調用五萬兩以上之案統作十分計算勒限十年分五

限以二年爲一限每限能完至二分者免其處分若完不及數初參降一級留任二參降二級留任三參降三級留任四參降四級留任十年限滿能完至七分者將降留之案開復按其未完銀兩另作分數再行按年完納如完不及七分者五參降四級調用若完不及七分之半降五級調用十萬兩以上之案統作十分計算勒限十五年分五限以三年爲一限每限能完至二分者免其處分若完不及數初參降二級留任二參降三級留任三參降四級留任四參降五級留任十五年限滿能完至七分者將降留之案開復按其未完銀兩另作分數再行按年完納如完不及七分者五參降五級調用俱另行起限仍令完納完日開復若完不及七分之半即行革職俱公罪仍勒限一年嚴追不得以家產盡絕率行咨部請免儻仍延不完交即從嚴參辦奏明請旨如革職後如數全完係廳員題請開復係督撫大員奏明請旨其子孫代賠如有未完亦照此辦理

河工核減銀兩未完

銀數在三百兩以下者統限一年零六個月三百兩以上者統限二年俱分三限處分自停降停補起至革職監追止

查河工核減銀兩未完吏部則例係專指河工核減工部則例凡河工核減分賠等項同係一律查核減銀兩以工料與原奏不符及與例浮多情近浮冒是以定例甚嚴至分賠

代賠攤賠等款並無浮冒情事若與核減銀兩一律辦理不足以示區別應將工部則例內核減分賠等項字樣改爲核減應繳銀兩再查吏部則例再限不完降一級留任工部則例再限不完現任人員暫行解任効力人員暫革職銜應照工例改正謹擬河工核減應繳銀兩以奉到咨文之日起扣如數在三百兩以下者勒限六個月完交限滿不完及完不足數係現任人員停其陞調効力者停其補授再限六個月完交限內全完准其開復如再不完現任人員暫行解任効力人員暫革職銜再限六個月完交限內全完准其開復儻仍不完革職監追罪公仍令完納全完開復數在三百兩以上者勒限一年完交限滿不完及完不足數將該員罰俸一年罪公係現任人員停其陞調効力者停其補授再限六個月完交限內全完准其開復如再不完現任人員暫行解任効力人員暫革職銜再限六個月完交限內全完准其開復儻仍不完革職監追罪公仍令完納全完開復其該管道員催追不力如本員應停陞停補者道員罰俸六個月本員應解任暫革職銜者道員罰俸一年本員應革職者道員降一級留任三年無過開復罪公

河工溢領銀兩未完現擬

銀數在三百兩以下者統限半年三百兩以上者統限一年俱分三限處分自停陞停補起至革職監追止

查河工溢領銀兩係領銀未辦或辦料未足前經吏部奏定照核減銀兩逾限不完亦議以革職監追惟此項銀兩未全較之核減尤重應照核減限期從嚴定議以昭慎重謹擬

河工溢領銀兩

係辦料未足領銀易錢未交或領銀未辦各款

以奉到咨文之日起扣如數在三百兩以下者勒

限三個月完交限滿不完及完不足數係現任人員停其陞調効力者停其補授再限兩

個月完交限內全完准其開復如再不完現任人員暫行解任効力人員暫革職銜再限

兩個月完交限內全完准其開復儻仍不完革職監追公罪仍令完納全完開復數在三百

兩以上者勒限四個月完交限滿不完及完不足數將該員罰俸一年公罪係現任人員停

其陞調効力者停其補授再限四個月完交限內全完准其開復如再不完現任人員暫

行解任効力人員暫革職銜再限四月完交限內全完准其開復儻仍不完革職監追公罪

仍令完納全完開復其該管道員催追不力如本員應停陞停補者道員罰俸六個月本

員應解任革職銜者道員罰俸一年本員應革職者道員降一級留任三年無過開復公罪

罪

河工溢領銀兩未交身故責令上司攤賠現擬

銀數自三百兩以下至三百兩以上限期自勒限六個月起至二年半止處分自罰俸一

年起至降二級調用止

查河工溢領銀兩未完離任者前經工部奏明此等欸項係領庫項入已與分賠代賠核減者尤屬有間請旨飭下河督查明業已去任者即著落上司攤賠應請一併酌定期限遞加處分謹擬河工溢領銀兩未交身故責令該管上司攤賠數在三百兩以下者限六個月完交初限不完罰俸一年再限一年完交二限不完降一級留任再限一年完交三限不完降一級調用俱公罪如數在三百兩以上者限六個月完交初限不完罰俸二年再限一年完交二限不完降二級留任再限一年完交三限不完降二級調用俱公罪若有級可抵不致離任之員另行起限仍令完納完日開復

督撫總河尋常分賠等欸銀兩未完

銀數自一千兩以下起至十萬兩以上止期限自勒限一年起至十五日止處分自罰俸九個月起至降

二級調用止

查道光十四年吏部按照工部奏定督撫總河應賠銀兩統限分限擬定處分自罰俸九個月起至降二級調用止奏准通行在案應請將督撫總河尋常分賠等欸即遵照此例辦理至罰俸處分有輕重並未畫一之處應一律酌改謹擬督撫總河河工分賠保第六賠四之數

代賠

係子孫代祖
父賠損之款
員賠 司代
交之款

攤賠

係上
等項銀兩未完以奉到咨文之日起加數在一千

兩以下之案於文到日起限一年完交初參不完罰俸九個月再限一年完交二參不完罰俸一年仍再限一年完交三參不完罰俸二年另行起限仍令完納一千兩以上之案統作十分計算勒限四年分四限以一年爲一限每年能完至二分五釐者免其處分若完不及數初參罰俸九個月二參罰俸一年三參罰俸二年四參降一級留任另行起限仍令完納完日開復五千兩以上之案統作十分計算勒限五年分五限以一年爲一限每年能完至二分者免其處分若完不及數初參罰俸九個月二參罰俸一年三參罰俸二年四參降一級留任五參降二級留任另行起限仍令完納完日開復一萬兩以上之案統作十分計算勒限六年分四限以一年半爲一限每限能完至二分五釐者免其處分若完不及數初參罰俸二年二參降一級留任三參降二級留任四參降三級留任另行起限仍令完納完日開復五萬兩以上之案統作十分計算勒限十年分五限以二年爲一限每限能完至二分者免其處分若完不及數初參罰俸二年二參降一級留任三參降二級留任四參降三級留任十年限滿能完至七分者將降留之案開復按其未完

銀兩另作分數再行按年完納如完不及七分者五參降一級調用十萬兩以上之案統作十分計算勒限十五年分五限以三年爲一限每限能完至二分者免其處分若完不及數初參降一級留任二參降二級留任三參降三級留任四參降四級留任十五年限滿能完至七分者將降留之案開復按其未完銀兩另作分數再行按年完納如完不及七分者五參降二級調用俱公罪俱勒限嚴追以上降調處分如係有級可抵不致離任之員另行起限仍令完納完日開復至子孫代祖父賠交之項如有未完無論其現在子孫官階之大小總以祖父係在何任內獲咎即照何例議處

河工屬員尋常分賠等欸銀兩未完現擬

銀數自一千兩以下起至十萬兩以上止限期自勒限一年起至十五年止處分自罰俸九個月起至降四級調用止

查河工屬員尋常分賠等欸銀兩未完吏部則例河工賠項照戶屬項下分賠代賠例議處數在五千萬兩以上限期五年處分降一級調用而止與工部例內五千萬兩以上銀數限期昭合惟吏部則例立有分限工部則例並無分限吏部則例河工賠項專指分賠係照戶屬項下代賠等項而言工部則例又統指核減分賠代賠攤賠而言殊欠明晰擬將工

部則例核減二字刪去亦照吏部則例註明分限每限不完即行查參其一萬兩以上至十餘萬兩之案工部定有限期吏部原例並未議及亦應照五千兩以上逾限不完降調

之例以次遞加至罰俸處分有輕重並未畫一之處應一律酌改謹擬河工屬員分賠

係銷

六賠四

代賠 係子孫代祖父賠交之款

等項銀兩未完數在一千兩以下之案於奉到咨文之日起限

一年完交初參不完罰俸九個月再限一年完交二參不完罰俸一年仍再限一年完交

三參不完降一級留任另行起限仍令完納完日開復一千兩以上之案統作十分計算

勒限四年分四限以一年爲一限每年能完至二分五釐者免其處分若完不及數初參

罰俸九個月二參罰俸一年三參罰俸二年四參降一級留任另行起限仍令完納完日

開復五千兩以上之案統作十分計算勒限五年分五限以一年爲一限每年能完至二

分者免其處分若完不及數初參罰俸九個月二參罰俸一年三參罰俸二年四參降一

級留任五年限滿能完至七分者將降留之案開復按其未完銀兩另作分數再行按年

完納如完不及七分者五參降一級調用一萬兩以上之案統作十分計算勒限六年分

四限以一年半爲一限每限能完至一分五釐者免其處分若完不及數初參罰俸二年

二參降一級留任三參降二級留任六年限滿能完至七分者將降留之案開復按其未完銀兩另作分數再行按年完納如完不及七分者四參降二級調用五萬兩以上之案統作十分計算勒限十年分五限以二年爲一限每限能完至二分者免其處分若完不及數初參罰俸二年二參降一級留任三參降二級留任四參降三級留任十年限滿能完至七分者將降留之案開復按其未完銀兩另作分數再行按年完納如完不及七分者五參降三級調用十萬兩以上之案統作十分計算勒限十五年分五限以三年爲一限每限能完至二分者免其處分若完不及數初參降一級留任二參降二級留任三參降三級留任四參降四級留任十五年限滿能完至七分者將降留之案開復按其未完銀兩另作分數再行按年完納如完不及七分者五參降四級調用俱公俱勒限嚴追以上降調處分如係有級可抵不致離任之員另行起限仍令完納完日開復至子孫代祖父賠繳之項如有未完無論其現在子孫官階之大小總以祖父係在何任內獲咎即照何例議處

道光二十一年諭朱襄奏各廳歲料請援案津貼一摺豫省各廳應辦歲料現因祥符興

辦大工購買較難例幫二價不敷自應酌加津貼著照所請所有本年下南一廳每觔酌加銀五毫距工最近之中河蘭儀衛糧下北五廳每觔酌加銀四毫次近之上南儀睢黃沁三廳每觔酌加銀三毫距工最遠之睢甯商虞曹考歸河四廳每觔酌加銀二毫計各廳應辦壬寅年歲料五千垛共加價銀八萬二千五百兩准其由司庫墊發統入祥符大工案內攤征歸欵該河督等仍嚴飭各該廳趕緊購辦於桃汛前堆足報驗毋誤工需

道光二十三年七月中河廳九堡漫口欽差協辦大學士尙書敬徵等奏盤築裹頭估辦攔黃壩計長二百三十四丈共估土方一萬三千八百餘方需銀三千五百八十九兩零道光二十三年七月欽差協辦大學士戶部尙書敬徵等奏稱臣敬徵臣何汝霖前於到工後查勘漫口情形寬深丈尺即約略估計工需錢糧須在六百萬兩之內奏明在案仰蒙飭部預爲籌畫連改撥南河之欸已足六百萬兩之數查歷來堵築決口必須相度河形繞越築壩以避口門寬深之勢又於大溜作灣之處上游築挑水壩下游開挖引河屆時啓放以便合龍前經臣等將築壩挑河事宜分派員弁逐項勘估嗣據估築壩工委員稟覆單開東西大壩及西挑水壩等項寬長丈尺計用稽料土方垛數及採辦穀草麻筋檣木根件共估需銀三百五十六萬四千五百三十六兩零而買辦竹纜光纜蒲包碎石雜料匠工俱不在內是以臣等復行揀員核實減估並親往工次詳細會勘悉心講求茲據該員等分晰欸項造具丈尺錢糧清冊呈遞前來臣等詳核估單併面詢一切據稱中河九堡地勢窪下土性沙鬆壩尾壩基須用淤土堅築方無他虞今擬就口門迤西舊有

順河埵一道作爲西壩尾因其土性業經蟄實只須幫寬壩基修補土工較新築省費可期合用而東壩基自應對峙西壩其尾段土工宜接大隄生根今估長一千二百八十丈係就老灘取土較易其兩壩基各長五十丈頂寬三十丈高一丈四尺內塘相距除將涸嫩灘不計外應估水中築埽工長三百六十丈正壩埽寬十五丈上邊埽寬七丈下邊埽寬六丈上下夾土壩各寬一丈又估計挑水壩長二百九十餘丈壩基長三十丈頂寬十丈高一丈四尺埽工寬八丈長二百八十丈前項應用稽料土方穀草麻筋檣木按丈尺遠近淺深例價幫價核計共估銀三百二十萬四千三百十五兩零較初次估數已節省銀三十六萬二百二十兩零等語臣等查勘水勢詳核工需情形其稽料每墩估銀一百八十兩係照歷次成案本年豫省雖收穫豐盈而附近州縣多被淹冲購辦物料運費途長難以酌減惟減半單長之土工及運料上壩每丈每墩俱係牽算用數較多仍須核實復行駁減一二成者數欸計銀七萬六千一百三十六兩零實估需銀三百十二萬八千一百七十九兩零又買辦竹纜光纜蒲包舊磚碎石雜料及匠工等項核實估計需銀二十三萬四千七百餘兩至挑挖引河工段綿長此次九堡漫口之後七月十四十五日上

游黃水驟長其時攔黃埦尙未築起漲入正河至將祥陳汛以上河槽復淤墊四五尺不
等且堵合口門全在引河得勢加以寬深吸溜歸槽合龍較易今據勘估引河長河委員
先後造具工段丈尺錢糧清冊前來臣等按勘過河頭及委司員等查過引河情形核實
減估除留引河頭五十丈俟開放時再行搶辦又逐段清水塘俟試開放時察看搶挑外計
自頭段引河起至閘河地方止估挑引河七十九段長二千二百四十三丈五尺口寬自
六十二丈四尺至十九丈八尺底寬自五十丈至十五丈深自三丈一尺至一丈二尺不
等又接前工閘河下首起至下北廳祥陳汛三堡止估挑引河五十一段長六千七百三
丈口寬自二十二丈四尺至十九丈底寬自十八丈至十五丈深一丈一尺至牽深一丈
不等共計引河一百三十段長八千九百四十六丈五尺共估土二百六十九萬三千三
百一十一方二分五釐需銀一百十八萬四千四十二兩零其祥陳三堡迤下至江南交界
計界長三百五十餘里河身彎曲閉段亦有水塘淤墊情形自七八尺至一二尺不等較
之上游受淤雖淺而工段過長若全估引河所費甚鉅應令逐段接挑通暢分別溝工溝
緣以期節省計估需銀三十五萬兩至搶挑河頭西口廳寬七十二丈四尺底寬六十丈

深三丈一尺及疏濬水塘上下等工估需銀二十萬兩留爲屆時搶辦以上挑河三項共實估銀一百七十三萬四百四十二兩零再查向遇大工大壩後身估築二壩以資擎托今估大壩已寬至三十丈可以減去二壩之料俾工員不致彼此推諉况查祥工未估二壩並非創減俟將來合龍後照祥工成案卽行接築圈埝以爲重門保障惟金門外積水深廣取土不易尙須填墊窪形計估圈埝土工長一千一百六十丈頂寬四丈底寬九丈高灘面一丈需銀八萬八千七百二十一兩零以上築壩挑河購辦正雜料物及匠夫等工通共實估需銀五百十八萬二千四十二兩零比較祥工用數實有節省惟是興工在邇購辦料物必須妥實合用勿任虛糜應請飭下督工大臣嚴查築壩料物革除挑河弊端挑出之土距隄較近者卽令加培大隄較遠者必須遵照成例運至引河口面三十丈之外以杜含混再此次估定之數與現撥之欸計尙有餘銀八十一萬七千九百五十七兩零查奏銀欸內有應徵地丁約徵關稅之銀并江西福建稍遠省分誠恐未能卽時解工更慮南河有留用之項而籌欸寬餘不難以先收之項隨時發卽用可指日興堵無停工待餉之虞將來儘數批解後所有前項餘銀應卽報部查核其合龍善後事宜補還大

隕等工亦可無須請帑即在餘存銀內奏明動支再餘銀兩報部撥用至辦理大工各款內價例不一有此贏彼絀之處亦惟於估定銀兩內截長補短變通辦理總當嚴飭工員節省浮費不得任意虛報多請開銷以重帑項而昭核實

道光二十三年七月敬徵等片奏稱查現經戶部奏准各省支發銀兩內有應行扣平之項均按庫平每兩扣平六分解部此次興築中河口門與別項工程不同查歷屆大工成案如僱用捆掃拖纜船隻兩壩馱運車騾添設遞文夫馬搭蓋物料棚廠發給彈壓兵弁及書役飯錢燈燭紙張等項用欸繁多向俱不准作正開銷均由撥欸項下扣平支用現在各省續撥欸項若照二兩平撥解則一切用項無欸可籌儻再議扣平恐買辦料物價必短絀於工作殊有關礙應請飭下戶部迅速行文各省所有應行撥解河南藩庫工需銀兩仍照舊章毋庸扣平以濟工需而節正項

道光二十三年七月諭敬徵等奏會勘估築中河漫口估計壩工挑河銀數一摺此次堵築漫口經敬徵等核實查勘所有築壩挑河購辦正雜物料及匠夫等工通共實估需銀五百十八萬二千四十二兩零著各該省督撫將撥解東河銀欸迅速委員解往以濟工

用惟興工購料必須妥實合用庶不虛糜帑項著廖鴻荃鍾祥嚴查逐壩料物革除挑河弊端認真督辦力求撙節並嚴飭工員等實用實銷不准絲毫冒濫至現在估定之數與現撥之欸計尙餘銀八十一萬七千九百五十七兩零俟儘數解工後仍報部查核毋稍含混又片奏戶部奏准各省支發銀兩內有應行扣平之項此次興築中河口門與別項工程不同請仍照舊章毋庸扣平等語著通飭各省將應行撥解河南藩庫工需銀兩毋庸扣平餘著照所議辦理

道光二十三年閏七月諭御史陳壇奏人工向係招商採買國因近地旱荒酌派外州縣協濟各該縣藉端滋擾或按畝科派或擇戶捐攤或封禁民柴或勒派車輛弊端百出易於激成事端本年黃河兩岸大秋茂盛除被沖決處所外其餘均已登塲即偶被雨水而糶料不損一二百里之內足用有餘等語鄰近辦料既預發給價銀本地既經足用自以招商採買爲正著廖鴻荃鍾祥於到工後會同鄂順安體察情形如何禁絕土棍把持委員需索之處即著悉心妥議務於國計民生兩有裨益方爲盡善

道光二十三年閏七月諭敬徵等奏豫省情形既准暫開捐輸難以兼開豫工二卯事例

一摺見在籌款興工之際自應分別緩急各官生等就近於河南捐輸可期踴躍著仍照戶部原議於東河暫開捐輸並准各省官紳士庶前往具呈輸忱自効以濟工用所有該尙書等前請移開豫工二卯事例之處著毋庸議

道光二十三年八月敬徵等奏會同核議御史李恩慶奏河工經費宜從變通製造紙鈔招募商民交錢給鈔疏曰查該御史原奏內稱河南興辦大工所撥款項皆係銀兩而工次一切用錢現當被水之後錢重難致舖戶因而居奇迨大工一興應用尤鉅向來每值工興之際紋銀一兩易錢不及一千文較諸平時市價幾至減半是撥銀百萬祇抵數十萬之用於帑項所損匪細查元明以來錢鈔並行其法至便擬請暫行倣照其法如現在籌撥銀六百萬照市價折成制錢九百萬串製造紙鈔鈐蓋部印編號上寫實收東河工餉制錢若干或百串爲一張或數百串爲一張發交工次出示招募商民交錢給鈔准其於現在捐例或赴京或在本省藩庫上兌每百五十串作銀百兩免其庫收加平等項以作運脚之費竊料河南富戶或自行上捐或稱貸他人必肯踴躍交易此鈔一經收回便可銷燬亦不致日久弊生至工需銀兩雖照舊籌撥既有現錢臨時變通應用自無由畸

輕畸重爲商賈居奇之地等語臣等伏查楮幣之法本於唐之飛券蓋執券以取錢而非以券爲錢也至宋元明始有交子會子寶鈔之制取方尺之紙印文其上自一貫至百千貫以代現錢之用宋臣張詠鎮蜀蜀人以鐵錢過重私相爲券後遂置交子務旋置旋罷前明洪武時鈔法通行其後以鈔之不利而並錢禁之奸僞雜出獄訟繁多不過數年其法寢壞此前代行鈔之大略也今該御史因堵築九堡漫口工用浩繁奏請製造紙鈔鈐蓋部印發交工次招募商民交錢給鈔准其於現在捐例以鈔上兌併稱一經收回便可銷燬以杜流弊原係利用變通一時權宜之計惟查辦理大工銀錢并用採辦物料均可合銀給發以期便捷匠夫工食隨時易錢散放以免堆積茲當工程伊始布置正須及時若待部頒印鈔招募商民交錢應用實有緩不濟急之勢且事涉創辦令難徧行溯查歷屆大工俱需銀數百萬兩錢價之貴賤亦無一定卽如祥工初開工時每銀一兩易錢不足千文而後來亦有換至一千三百文者是所稱較平時市價幾至減半亦不盡然况以銀錢輕重計之大相懸殊運錢百串之資卽爲攜銀千兩之費而轉令交錢到工持鈔上庫每百五十串作銀百兩再加運脚夫工折耗既多商民未必樂從若謂近來錢多於銀

而直省停鑄有年豈有制錢獨能增益查豫省上年漫口省會城垣貢院等工所費不貲均係士民捐資辦理現在元氣未復而瀕河州縣本年又被淹冲恐商民之力亦有不給且前已奏准捐輸該省如有就近捐錢者仍可彙入捐項一體請給議叙撥歸工用至直省捐生或來豫捐輸或赴京上兌豈肯易錢投交工次徒費周章臣等悉心籌商竊以窮變通久之義原貴因時制宜鈔法行之於平日或可權衡輕重冀其流通若用之以濟急需恐商民終成觀望徒費此舉該御史所奏工次暫行交錢易鈔報捐之處應毋庸議奉上諭該御史所奏著無庸議至現當興辦大工以銀易錢儻經市會從中把持任意擡減恐經費益形折耗著廖鴻荃鍾祥鄂順安嚴密訪查務令市價均平帑項均歸實用方爲有濟

道光二十三年九月廖鴻荃鍾祥奏查明排桌牌桶積弊擬辦理章程疏曰接奉廷寄給事中韓椿摺一件奉旨交廖鴻荃會同鍾祥查辦欽此臣等查原奏內稱東河歷來辦工兩壩設立排桌發給腳價每一桌派一員管理每日約發制錢一百餘千排桌委員往往從中偷漏每串官役人等代爲運歸私寓分肥大工需日甚久以每日每桌發項計之不

下百餘萬兩以每日每桌侵蝕之錢計之亦不下數十萬兩現在漫口將次興工如何革除積弊之處請即由該督悉心籌畫妥議章程具奏辦理等語臣等於到工後遵即詳查排桌一項爲散給夫價而設緣兩壩進占工程喫緊之際所需土料須用人夫往來跑運而人夫脚價均須開發現錢跑土夫錢向委佐雜跑料夫錢向委外委排桌分別率領跟役兵丁給發其給錢之法皆用排桶編列字號每桌各二個輪流赴周支領滿貯散錢零星發付發完方准再支並另委員稽查不許分文夾帶立法本爲周密然管理排桶之員弁賢愚不一難保不任聽跟役兵丁偷漏錢文有暗藏口袋乘間抓錢裝入者有勾串親朋藉擡土料爲名混雜其中將所偷錢文代爲帶出者有串通舖戶運錢易銀者有土料本少而遇商同夥竊之人則給錢轉多留爲俵分地步者在該員弁等或明知其弊而佯爲不覺藉償奔走之勞甚者暗與分肥恃爲腹心之寄因而轎夫衙役一切在官人等藉口捉弊要挾訛索硬取錢文凡此弊端難以枚舉但防弊之法必究其弊之所由生臣等復細加訪察蓋因佐雜平時所用跟役不過一三二人一經派司排桶非僱用八九人不敷照料勢必臨時添僱該員每日例給薪水銀祇一兩二錢爲數無幾既不足以養贍多

人而差事又極辛苦其樂於受僱者大抵皆利有偷錢之一術至外委例帶兵丁向有定額若輩素相爲伍既無名分之相臨惟利是圖安必清廉之共凜其偷錢之弊更甚於佐雜之跟役臣等公同商酌欲養其廉恥必先加給以薪銀欲禁其貪婪必先嚴定其賞罰查向來買土佐雜多用從九品未入流今擬用縣丞主簿等官除薪水銀兩照常發給外每員每日加給銀八錢其跟役定以八人每日每人給銀二錢五分計佐雜一員並所僱人每日共給銀四兩運料委員向多用額外記名外委今擬參用把總及經制外委舊例每日給額外外委飯錢二百五十文記名外委飯錢二百文兵丁飯錢一百五十文擬將每日每項加倍發給以職分大小分別飯錢多寡俾免缺乏所領銀錢均由總局逐日支發並嚴諭該員弁等約束跟役兵丁不得再沿陋習如果潔已奉公辦理妥協工完之後文員則存記獎勵武職則酌量賞拔儻或仍蹈前轍卽將該員弁從嚴參辦其跟役兵丁一併枷責斥革如此賞罰並行庶任事者有所勸懲於工程經費均有裨益至分派員弁已責成掌壩官慎爲選擇另委公正廳縣切實稽查如仍察有弊端該掌壩官與稽查官併予參處臣等亦親自常川到壩巡察務期力除積習以重工需奉上諭該文武員弁跟

役兵丁等加給薪銀原所以養其廉恥第恐議加之後積弊仍未能盡除稽查仍視爲具文是經費之支發徒增而官役之侵漁如故於核實整頓之道尙未能確有把握著廖鴻荃鍾祥鄂順安悉心籌畫再行妥議具奏

道光二十三年九月廖鴻荃鍾祥鄂順安奏敬徵等估册內開東西兩壩需用稽料九千七百六十六垛四分挑水壩需用稽料一千三百九十五垛二分每垛按照祥工給銀一百八十兩雜料除穀草概木藤纜磚石外以霖麻爲大宗册估需麻一千二百萬斤每斤價銀四分

道光二十三年九月廖鴻荃等奏妥議牌桶章程疏曰臣等查牌桶發錢時既迫促人復煩多且與負土抗料之夫肩摩背接差事極爲猥瑣計兩壩及挑水壩牌桶佐雜須用三十員武弁亦須三十名其所帶跟役兵丁太少又不敷用前議將佐雜每員需帶跟役八名共日給薪銀四兩每日計共應給銀一百二十兩武弁每名帶兵丁八名共日給飯錢二千九百文折銀二兩一錢四分八釐每日共應給銀六十四兩四錢四分自進占以至合龍以八十日計之兩項共應給銀一萬四千七百餘兩然除常例本應發給銀數外實

共加給銀九千二百九十餘兩遵復公同熟商此次管理牌桶先期責成掌壩官慎選廉幹員弁出具保結開單呈核其所帶跟役兵丁一併造具清冊上壩之時遂名查點並令同穿號衣書寫牌桶字樣於人夫稠雜之中易於分別如在壩往來頻數或與閑人交頭接耳或胸前高聳或衣袖沈重形跡稍有可疑不難登時搜檢查有弊竇立即嚴懲以警其餘所發牌桶亦大書某員弁姓名領錢散錢著掌壩稽查各員分投查驗至買土筐分大小每易爲奸今擬概用大筐價歸一律嚴禁小筐夾底凸心等弊責成稽查官抽查簽試有犯必懲抗料夫則每人以十束爲率每束以六觔爲率毋許以小束搪塞致價有參差發錢之人得以上下其手以每日所運之多寡計用錢之虛實似此層層防範偷漏之習或可革除等語奉上諭著照議責成麟魁等督飭掌壩等官隨時認真嚴查仍不時親往督視以期掃除積弊毋得視爲具文稍有疏懈

道光二十三年議准豫省各廳購辦甲辰年歲料因中牟興舉大工購辦較難中河廳每觔加銀五毫上南下南衛糧三廳每觔加銀四毫黃沁祥河下北蘭儀四廳每觔加銀三毫曹考儀睢甯商虞歸河五廳每觔加銀二毫歸入中牟大工攤徵歸欵

道光二十四年二月麟魁廖鴻荃鍾祥鄂順安會奏稱奉上諭麟魁等奏蟄失埽占自請治非當經降旨將麟魁等分別懲處現既仍令督辦若能相機廂築仍獲歲功尙可量加寬貸卽或情形險要一時未克施功亦當將已成埽占擇要加廂守護現在如何修守新工如何保守料物是否趕辦濟用原估銀兩之外計餘銀一百餘萬現存何處此時添給銀兩究竟合龍有無把握着體察情形酌量緩急迅卽據實具奏等因欽此竊中牟大工埽占蟄失後種種棘手臣等已將萬難補築情形縷晰陳明請援照成案暫行緩辦於二月十八日具奏在案原估壩工係長三百六十丈嗣因土性沙鬆經臣等奏明繞越廂做計截至二月初七日止兩壩已共做成四百二十餘丈較原估增長六十餘丈丈尺增則工料益增且所增之工俱係深水廂進需費更繁統查此次工需奉撥各省關解到餉銀五百一十九萬九千餘兩京餉銀一百五十萬兩又各員捐交麻概價銀三萬四千兩又借提開封府屬發當生息本銀九萬六千九百二十兩又收工員繳回買料節省銀二萬一千八百四十兩又收捐輸銀四千兩以上共收兩六百八十五萬五千七百餘兩又撥捐輸錢四十六萬千文除撥還墊辦盤築東西裹頭銀十二萬二千餘兩攔黃壩銀三千

六百餘兩係前任承辦工程應劃開不計外計臣等到工後實收到銀六百七十三萬餘兩錢四十六萬千文內除照原估銀五百一十八萬二千餘兩又經奏明添估引河銀十一萬二千餘兩又因料物不敷應用於十二月十七日奏明添辦稽料二千餘垛麻八百餘萬斤檣纜亦量爲增添又於正月十七日奏明於上次請添稽麻之外另爲酌量添購計續又添辦稽二千六百餘垛麻三百五十萬觔連添辦碎石檣纜及廂埽夫工又西壩接長土工一百丈並添築撐壩及挑水壩加築土戩引河頭新築攔黃壩等工俱係續添之款共又用銀一百五十八萬七千八百餘兩錢四十三萬餘千文內除剩存各項料物按價核銀二十二萬五百餘兩堪以作抵又現存銀六萬餘兩錢二萬八千餘千統計臣等所辦各工除動用捐輸錢文外實共用去正項銀六百四十四萬餘兩此外例扣市平部飯銀兩亦經動用無存又兩壩澆築後戩工程係應歸善後案內估報先於存款內墊支趕辦此大工存用各項之實在情形也

分見工程門

道光二十四年二月諭本日已明降詠旨將牛鑑釋放發往河南交鄂順安差委矣該革員前在河南巡撫任內頗得民心該省民情純樸上年興築省城捐輸踴躍並未動支帑

項甚屬好義急公此次中牟大工將次合龍忽遭風暴適蟄五占需用浩繁應如何設法籌辦之處牛鑑素爲該省士民所悅服經朕特加恩宥自當倍加黽勉實力妥籌以紓國計而蘇民困著俟牛鑑到省後卽將此旨發給閱看將此諭令鄂順安知之

道光二十四年七月鍾祥鄂順安奏預補築中牟壩工現在勘估情形並約須銀數疏曰竊照中牟大工本年春間埽占蟄失之後當因種種棘手奏准暫行緩辦在案惟口門一日不堵則下游三省災黎一日不安現在時逾立秋一切亟應預爲籌計俾大工早日興舉一氣告成惟該處土係純沙易於淘刷籌辦必須詳慎先經札飭開歸河北二道帶同熟諳工程文武員弁前往確切履勘樽節估計去後茲據稟稱大工堵築須屆霜清刻下秋汛甫交河勢未定原難預先揣擬適中其機惟興工以料物爲先辦料以及時爲貴且非估工無以知料數又非籌款無以備工需轉瞬新料即可登場應就現在情形先行勘估以便預請錢糧方免遲誤查該工河勢現於北首坐灣折而南向直由口門下注較前稍有變更查向來堵築漫口原宜擇老灘淤土處所築做壩工庶進占較有把握無如此次大工決口以外隨地純沙是以金門收窄水勢刷深至十丈餘尺而舍此並無另立壩

基之處且大壩原做長四百二十餘丈除量爲拆展外計東西仍存舊壩共二百餘丈就此繞越補築亦不過二百數十丈自較另行創築節省實多似以守舊爲是第金門原處前已刷有深塘不宜再於舊處堵合應由西壩迎向上水多進數占跟拋碎石蓋護舊金門而過東壩較前退後五十丈築做門占則堵合既可措手河勢亦能逼向東趨於引河更多裨益惟該工土性沙鬆即將金門向東圈移迨兩壩收窄水勢高下懸殊奔騰逼注必致逾刷逾深壩工仍虞喫重上冬曾由總局議請添築二壩祇因錢糧增重未經准行此時亟應估辦以資擎托擬於東西裹頭之北設立二壩壩基約圈築長八百餘丈兩灘仍用土築以期節省中間水面一律進占照依成法正壩寬五丈上邊埽寬三丈下水邊埽無須廂做俾歸撻節至引河頭現有灘面橫亘不能得勢挑壩亦不著力然大壩既就舊基河頭亦難遠徙今酌中定擬將河頭再向北首挪展數十丈以現在北唇作爲南唇並於下唇添築兜水壩擎托其挑水壩埽工原長二百八十丈現經大汛間有刷塌應於原長之外接長一百丈多用碎石逐占拋護俾挑溜益臻得力惟引河原估頭段挑深三丈一尺因大壩金門前曾刷深至十丈以外以至上游河身掣刷落底較上年加深丈餘

引河底現形高仰除河頭另行挪展外迤下長河均須展寬加深庶得建祇之勢以上各工約計估需銀六百三十餘萬兩並聲明將來河勢儻有變遷工程互有增減則錢糧自因之損益等情前來臣等復親往逐細確勘與所稟情形相同第所估銀數尙多當此籌款維艱之候自應力求撙節而形勢既尙未定又不便懸揣駁減致有藉詞惟念堵口以集料爲先集料以錢糧爲要指日新料登場必須預先購辦以免臨時居奇且引河溝工溝綫亦須展寬加深自下而上逐節挑挖試放清水遇有梗阻隨時收拾庶放河可得建砥之益亟應趕早派員挑辦而一經集夫興挑亦須欸項應手臣等亟知錢糧重大務須慎之又慎惟既不敢稍任浮估又不敢短減貽誤再四審度連日籌酌惟有仰懇勅部先於附近河南藩關各庫籌撥銀四百五十萬兩解工備用仍俟霜清水落勘定形勢確核估計實需銀數再當切實陳奏斷不任稍有浮估以重帑項

道光二十四年七月諭鍾祥等奏遵旨密籌中牟大工勢難緩辦一摺據稱體察現在情形通盤籌畫勢難緩辦者有四白應趕緊修築現在時交白露河勢不致大有變遷所有挑河築壩購料各事宜著卽尅日興舉前所請餉銀四百五十萬兩業經戶部如數籌撥

定可源源解工著即將此項樽節動支核實稽查斷不准辦料辦工之員稍有浮冒鍾祥鄂順安辦理大工責無旁貸惟當相度機宜實心經理於慎重之中力求妥速固不可草率從事尤不可遷延玩泄坐失事機是爲至要

道光二十四年九月鍾祥鄂順安奏稱竊臣等接准部咨道光二十四年三月十七日奉上諭上年中牟漫口特派麟魁廖鴻荃會同鐘祥鄂順安督率道將廳營辦理大工宜如何激發天良妥籌速辦乃毫無把握將次合龍之際被風蟄失五占以致水勢日增挽回無術將來續舉大工勢必多糜帑項辦理不善咎無可辭應如何分別罰賠之處著工部查議具奏等因欽此當經部臣查河工防守不力致被沖決者例准銷六賠四東河向作九成分賠今已革尙書麟魁廖鴻荃等辦理中牟大工未能趕緊堵築將次合龍之際被風蟄失五占多糜帑項自應欽遵諭旨罰令分賠惟檢查並無欽差大臣分賠成案擬請比照銷六賠四九成分賠之例辦理所有應賠銀兩劃作十成著令已革尙書麟魁廖鴻荃分賠一成臣鍾祥分賠二成臣鄂順安分賠一成承辦埽壩之廳營等共分賠六成以示懲儆此次工段銀數尙未據造報到部無憑核算應令迅將各員應賠分數照例查明

先行奏報等因具奏奉旨此次麟魁等督辦中牟大工未能堵合其應行罰賠銀兩著麟魁廖鴻芬各賠一成鍾祥分賠二成鄂順安分賠一成承辦埽壩之廳營等共分賠五成所有工段銀數著該河督等迅即查明奏報欽此移咨到臣臣等當即欽遵飭行該管開歸道遵照部議查明蟄失埽占工段丈尺確核各員應行分賠銀數具詳去後茲據該道詳稱中牟壩工原估正壩及上下邊埽並夾土壩共寬三十丈兩壩同時進占層土層柴如法加做嗣因水勢刷深節次加廂均蒙隨時陳奏在案迨二月初七日東壩上邊埽三十七占埽眼被浪衝刷過水橫串夾土壩前及正壩門占翻花不止適值黃水陡長風浪淘擊人力難施致將三十八占門占並三十六七占掣走初九日續蟄去三十四五兩占共計蟄失五占共長二十五丈六尺按照刷深水勢實在丈尺及彼時較量各埽實高水面四丈五尺核計其所用物料俱照祥工定價稽每觔例加價銀三釐六毫麻每觔例加價銀四分土每方例加價銀三錢餘俱照例開報統計共用工料例加價銀三十八萬四千六十七兩零內除加價銀二十五萬四千八百五十一兩零照東河向例攤徵歸款外所有例加價銀十二萬九千二百十五兩零遵照部議內分銷六銀七萬七千五百二十

九兩零另行作正造報其賠四銀五萬一千六百八十六兩零按照十成分賠繕具分賠銀數職名清摺呈請具奏前來臣等覆查無異謹將蠹失埽占丈尺並各員應行照例罰賠銀數核繕清單恭呈

清單

中牟大工東壩三十四占至三十八占共長二十五丈六尺正壩埽工寬十五丈上水邊埽寬七丈夾土壩寬一丈下水邊埽寬六丈夾土壩寬一丈共寬三十丈入水六丈九尺九丈三尺十丈五尺不等上面普律加廂高四丈五尺共用料物夫工銀三十八萬四千六十七兩五錢一分六釐內加價銀二十五萬四千八百五十一兩七錢一分一釐照例攤徵歸欵例價銀十二萬九千二百一十五兩八錢五釐遵照部議內除銷六銀七萬七千五百二十九兩四錢八分三釐作正開報外計賠四銀五萬一千六百八十六兩三錢二分二釐作十成分賠每成應賠銀五千一百六十八兩六錢三分二釐二毫 欽差前禮部尙書麟魁分賠一成銀五千一百六十八兩六錢三分二釐二毫 欽差前工部尙書廖鴻荃分賠一成銀五千一百六十八兩六錢三分二釐二毫 河東河道總督鍾祥

分賠二成銀一萬三百三十七兩二錢六分四釐四毫 河南巡撫鄂順安分賠一成銀
五千一百六十八兩六錢三分二釐二毫 掌壩文員分賠三成半銀一萬八千九十兩
二錢一分二釐七毫內前蘭儀同知張承恩分賠銀四千五百二十二兩五錢五分三釐
一毫七絲五忽前下南同知賴安分賠銀四千五百二十二兩五錢五分三釐一毫七絲
五忽前下北同知徐敬山分賠銀四千五百二十二兩五錢五分三釐一毫七絲五忽前
中河通王廣恕分賠銀四千五百二十二兩五錢五分三釐一毫七絲五忽 掌壩武弁
分賠一成半銀七千七百五十二兩九錢四分八釐三毫內前儀隴協備吳懷恩分賠銀
一千五百五十兩五錢八分九釐六毫六絲前蘭儀都司邱廣玉分賠銀一千五百五十
兩五錢八分九釐六毫六絲前江南桃北營守備周宜分賠銀一千五百五十兩五錢八
分九釐六毫六絲前下南協備張奇亮分賠銀一千五百五十兩五錢八分九釐六毫六
絲前曹河協備楊懷理分賠銀一千五百五十兩五錢八分九釐六毫六絲

道光二十六年十月諭銀貴病民所關匪細必應力求變通其尤甚者河工人員但知用
銀甚便總以搭錢爲難卽謂歲修工程及預購稽料土方等項責令以錢搭放恐致貽誤

要工此外俸廉盤費書吏倉役並雜交等欸何難量予搭放仍著各該河督按照前項名目悉心核議每年實可用錢若干分晰奏覆毋得固執成見仍以窒礙難行一奏了事尋河東河道總督鍾祥奏東河並無盤費一款請仍照舊章辦理惟土工有用錢成案嗣後請以錢三成搭放計每年估修土工以三十五萬兩爲率可搭用錢十五萬串以制錢一千五百文作銀一兩下部知之

道光二十八年十一月諭河工浮冒之弊人所共知本年已明降諭旨著戶部存記除例應發給銀兩外絲毫不准再撥自當懷遵計每年所撥銀兩儻力節浮費儘數辦工如果該廳等於例領正價之外並未絲毫糜帑三汛之後准該河督優加保舉嗣後河督處分仍照舊例分別漫口罰俸決口降留辦理毋庸離任其失事專汛廳弁從重治罪以專責成而杜挾制並酌添東河總督養廉共發給銀一萬兩優與正所以杜其濫取各廳員冗缺甚多著河南巡撫會同該河督酌議裁撤

道光三十年五月諭河務修防動欸甚鉅近來銀價增昂工料多係以錢折算爲數本有盈餘尤應力求撙節南河工用疊經嚴飭不准絲毫濫支東河事同一律著該河督飭屬

一體樽節辦理

咸豐四年正月王履謙奏河工錢糧東河每年不下一百四五十萬兩實在辦工不及十分之六等語諭長臻詳細查明應如何革除浮費俾錢糧皆歸實用安定章程具奏

咸豐五年六月因蘭陽三堡漫溢諭暫開捐例設立捐局無論銀錢米麵及土方稽料皆准報捐辦公需用錢即可勸諭民間捐輸銅劬設局鼓鑄以資支發

咸豐五年七月諭昨因蘭陽汎三堡漫溢諭令李鈞等趕緊堵合設法協濟并諭令桂良英桂崇恩查明被水災黎安爲撫卹因思河工漫口向來暫開捐例以濟要工現在軍務未竣各省捐輸迄未停止而部庫支絀亦無從籌撥朕夙夜焦勞念及小民蕩析離居難安寢饋該河督等具有天良於堵築漫口撫卹災民一切事宜更應早爲籌及斷不能以無款可籌遂至束手無策著李鈞與英桂崇恩悉心妥議於河南山東兩省設立捐局無論銀錢米麵及土方稽料皆准報捐米麵可備賑需土稽可供工用仍核計所捐之數奏請獎勵并著遴委委員分路勸諭紳商捐辦口糧接濟災民此外所屬各州縣如有可撥之倉穀亦可酌量動用總期被水災民不至流離失所方爲妥善至辦工需用錢文即可

勸諭民間捐輸銅劬設局鼓鑄以資支發

咸豐五年七月河南巡撫英桂奏現值秋水盛漲漫口處所亟須盤做裹頭以免再行刷寬前經蔣啓敷等趕緊廂護緣料物不齊且河水陡長隨廂隨塌東西兩壩相距已有一百七十餘丈而司庫支絀一時無款可籌正深焦灼旋准河督臣李鈞來咨撥節估計約需銀三萬餘兩已倡率各屬捐銀一萬五千兩其餘由蔣啓敷及失事各員王緒昆等先後賠繳即日購料接續前工趕期趕辦

咸豐五年十月諭近年以來軍務河工民生重困朕不惜蠲租發帑加惠黎元猶恐苛累之條蠲除未盡因念河南省有河工加價一款每年應征銀四十餘萬兩係從前馬營儀封漳沁等工用過土方各項加價在於地糧內按限攤征之款與錢漕正項本屬不同三十餘年積欠纍纍該省賦額甲於天下連年兵燹水災差役繁重而正供之外復有此項攤征朕軫念閭閻豈忍令其久爲民累所有此項河南省每年應征河工加價等銀著自本年爲始加恩豁免永不攤征俾小民得以專完正課如有本年已征在官者著該撫查明抵作今年正賦

咸豐七年奏准衝決隄工如係上年原塌處所除隄工照例賠修四成外其餘挑壩引河等工統令賠修四成

咸豐八年正月軍機大臣彭蘊章等會同戶部議奏東河鈔票酌改錢鈔成數得旨依議
河工撥欸既加實銀一成自應撙節支放究其本惟在地方官實收民鈔一面開設官號認真辦理則河工放欸或可稍增成數不致折耗過甚

咸豐十年議准河南省蘭儀以下乾河招墾舊河灘地分別等第征收錢漕另立灘租欸目每歲經徵完欠職名造冊送部具題考核

同治二年五月署河東河道總督譚廷襄奏稱竊照豫東黃河自咸豐五年由蘭陽北岸旁趨後下游乾河工程停辦而上游有河七廳隄段延長埽壩林立均屬最爲險要藉天塹以衛民生修守所關至爲重大嗣因司庫支絀未能照舊撥發經費始則搭用官票繼則搭用寶鈔迨因鈔價過賤不敷購料幾致貽誤工程遂定爲三成現銀三成半局鈔三成半生鈔除生鈔所值無幾外其局鈔係由錢糧搭收撥給河工按局鈔一千五百文抵銀一兩每局鈔一千取銀五錢核計每兩可得現銀七錢五分廳員辦工每百兩以三成

現銀三成半局鈔計算僅止實銀五十六兩二錢五分報銷則連生鈔統計在內徒有虛數並非全濟實用臣於上秋在山東巡撫任內兼署河篆查明文卷即擬變通舊案改發實銀祇因尙未勘工不敢輕率定議四月內臣交卸撫篆後奉命將河東河道署任事宜專心辦理當即欽遵馳抵開封工次適撫臣張之萬帶兵出省不及晤面當向函商覆以未曾親歷河干無從確指利弊囑與藩司王憲安爲斟酌臣知王憲曾任河廳河道情形熟悉公事極肯認真因將通歲工需與之約略籌計茲臣勘明上游兩岸水勢及工程情形並博訪詳諮始知河工有必不可少不可緩之需而辦理之是否不致虛糜仍視其人爲斷即如搶險夫工料物等項當安危繫於呼吸一刻不可暫停而夫工增值料戶居奇例價不敷隨時增長從前悉皆通融開報以致用數較距茲與該司道等熟商擬將搶險夫工料物預飭廳員早爲籌備不得臨渴掘井致令索價倍昂至河營武弁便於廂掃每當報險輒以危詞聳聽舊掃匯塌必須刷淨朽底補廂新掃從前物力充足不稍吝惜是以另案較多殊不知朽掃連底匯盡自應補廂若尙有根抵可資不必候其匯刷淨盡即應於上面加廂穩固既可惜料亦可護隄此外凡有可以樽節之處無不徧加訪察大

抵以減工爲省料以省料爲節費事屬相因惟工料總須實發現銀方可隨時應手况征收錢糧業已停止收鈔無可再撥自當一律更改不便雜以生鈔徒有造報虛數無補工需臣悉心籌酌擬請變通舊案改撥現銀核實辦理復查同治元年開歸河北二道屬另案磚石土埽工程請銷銀七十五萬餘兩搶修工程請銷銀十四萬餘兩二共銀八十九萬餘兩以三成現銀三成半局鈔核計共需實銀五十萬有零雖未由司全數撥給究有墊欠終須歸補今按各廳現在水勢及應辦工程情形通盤約計大加撙節每年尋常修守及偶爾搶險有實銀二十萬兩左右預備支發當可敷衍本年擬將原請例撥辦料銀六萬五千兩歲麻加價銀二萬七千餘兩全用現銀再於春伏二汛例撥防險銀三十萬兩內先撥實銀十一萬兩三項統算計銀二十萬兩有零其開歸河北兩道額征河銀除蠲緩及欠解外每年各收銀一萬餘兩及六七千兩不等向歸搶修案內發支應仍就數提用此外歷年備防搶險找補不敷等項均即歸併在內毋庸多設名目致滋牽混似此減之又減試辦一年果能勉力支持即可作爲額歲較之往年約計節省現銀二十餘萬兩至異常險工並非常有設或需項甚鉅另行專摺請旨酌提未撥防險銀兩以昭慎重

臣於河工素未閱歷不能深知底蘊所有修守一切惟有督令兩道及各廳員認真講求務期一一核實其平日奢糜浮濫惡習諄飭悉力屏除能盡一分實心自有可辦一分實事儻有不肖之員意存貪冒不知節慎卽行據實奏參斷不敢稍事姑容再本年應添防料磚石已於另摺奏請停緩計少撥司庫現銀四萬二千餘兩又歷年秋撥防險銀十萬兩亦擬臨時一併停緩計少撥司庫現銀五萬六千餘兩統歸樽節又前因新章未定料麻價並例撥防險均止由司先撥三成現銀旬餘以來黃沁節次報長瞬將交伏稽料磚石等物亟應趕緊購備臣一面咨明撫臣並行司提撥應用以免遲悞合併聲明

同治三年九月諭譚廷襄奏搶辦中河廳十三堡險工樽節估計需銀三萬餘兩查每年例儲春秋二汛防險銀三十萬兩上年僅撥銀十一萬兩節省銀十九萬兩請提撥現銀三萬兩俾資趕辦等語中河十三堡存灘被刷驟出奇險現雖搶辦漸臻底定而築埝修隄既據譚廷襄奏萬分緊迫自未便稍涉延緩致誤要需著張之萬督飭藩司於上年春伏二汛節省銀兩內提撥現銀三萬兩俾供支放

同治四年議准東河歲搶修及一切工程欸項均仍按銀錢各半放給

同治四年諭張之萬奏籌備上南祥河兩廳險要工程請酌撥節省防險銀兩一摺河南上南廳鄭州下汛等處本年疊出險工均經搶護平穩惟轉瞬春融水長隄埽塌蟄堪虞亟應預籌經費物料以濟要需現經張之萬於鄭州下汛十堡十一堡估需銀五萬餘兩祥符上汛十五堡估需銀四萬餘兩內力加核減必須添撥銀六萬兩始敷辦理要工所陳自係實在情形著吳昌壽按照該河督所請迅速飭令藩司於新章司撥二十萬兩外再撥節省防險銀六萬兩並前任河督譚廷襄奏准定章年前應撥料麻四成價銀一併勒限於年前全數解交張之萬俾得及時趕辦毋許稍有延緩其南岸下南廳及兩岸長隄各工並著張之萬隨時察看情形認真經理

同治五年奏准東河上祥兩廳工程緊要所有上南廳屬添撥銀五萬兩祥河廳屬添撥銀三萬兩在於歷年節省防險項下撥給

同治七年奏准上南等七廳酌加歲料價銀四萬八千七百餘兩以資津貼

同治七年諭本日據蘇廷魁馳奏黃河伏漲異常請飭豫撫撥款防秋並中河廳搶辦險工情形各摺片豫省黃河兩岸工程因歷年經費未充辦理久經竭蹶本年伏汛盛漲異

常七廳兩岸險工到處疊出中河祥河兩廳尤甚所稱稽料之艱餉需之絀自係實在情形現在伏汛未完秋期正遠若不亟籌餉需趕備稽料堵禦勢將不可收拾著李鶴年於豫省庫存項內無論何款立即籌撥開歸道銀五萬兩河北道銀四萬兩尅期交付俾資修守該撫務當顧全大局不可視爲泛常稍涉游移推諉貽誤干咎除分撥九萬兩外屆時儻遇險工再有不敷仍著該撫設法另籌隨時撥解並著蘇廷魁督飭開歸河北兩道率同各廳員認真趕辦各料用資秋汛修防並將中河廳屬中牟下汛三堡隄身趕緊設法搶護俾臻穩固

同治七年八月諭蘇廷魁李鶴年奏請撥款堵築榮工分流一摺所需工料銀九十萬兩現當應用緊急之時著戶部先行撥發庫銀四十萬兩其餘五十萬兩卽由戶部速撥有著之款以資接濟蘇廷魁等務當撙節動支不得任廳工員浮冒開銷致涉虛糜所稱此項用款俟截數後於各省支發各項內每百兩扣除二兩以資歸款之處著戶部酌議具奏 分見工程門

按是年十月胡家玉奏續請帑金又八十萬兩十二月曾國藩等會奏發帑已二百萬

兩此兩奏均見工程門

同治八年二月河東河道總督蘇廷魁奏稱竊查上南河廳榮澤十堡自上年六月二十八日漫口後奏明由司陸續撥銀六萬兩購備料物盤做東西兩壩裹頭埽段共用銀五萬三千九百五十七兩三錢九分一釐其幫寬壩基估築撐隄共用土方銀一萬二千五百三十五兩三錢又榮工堵築先後奏請撥銀一百七十五萬兩內已收到部撥銀一百萬兩截留楚餉銀二十一萬兩兩淮鹽釐銀十四萬兩閩海關銀八萬兩共已收銀一百四十三萬兩計未收閩海關銀十二萬兩江漢關銀五萬兩江海關銀十萬兩豫省折漕銀二十一萬兩統共未收銀四十八萬兩除應撥還截留部餉銀二十一萬兩實應找銀二十七萬兩查榮工東西兩壩自上年十月二十一日興工起至本年正月十八日堵合閉氣止隨後復按占跟追普加大土現已一律整齊高厚確核兩壩埽占土糧拋護碎石挑挖引溝共用銀一百三十二萬餘兩內除餘剩正雜料物值銀七萬三千餘兩應歸善後案內動用核銷外實請銷銀一百二十四萬七千餘兩臣督飭榮工司道詳細核計委已核實無浮自當飭將細數分別造冊詳送以憑復核準確奏送清單陳請核銷核以兩

次請撥之數計節省現銀二十七萬九千餘兩運用剩料物統計實節省銀四十五萬二千餘兩所有築工善後廳辦土埽及籌備料物並本年南岸三廳濱黃各工修守爲數甚鉅均不另請錢糧卽於節省項下督飭所委各員樽節確估統俟築工請款全數撥到分別趕辦儻有盈餘悉數奏請繳還部庫不任稍涉虛糜

同治八年二月河東河道總督蘇廷魁片奏稱再查善後工程已飭道督令廳委各員詳慎勘估務臻妥協臣約略核計增培順河埵加幫南鹹水旱土方約需銀八萬餘兩俟佔到再行復核具奏至北面普廂護埽所需正雜料物卽儘餘剩積麻動用至南北兩岸本年修守關緊要北岸已於例撥之外奏請添撥銀十四萬兩奉旨俞允欽遵在案南岸三廳工段緊要數倍北岸而大工之後料物昂貴尤非往年可比核計土兩壩非添撥銀二十餘萬兩益以常年額撥斷難布置且幫隄積料非於大汛以前趕辦完竣難資抵禦所賴築工節省之項可以籌辦儻能再有盈餘另行奏繳第查築工節省尙有賴撥閩海關銀五萬兩未經解到又原奉救撥豫省折漕銀二十一萬兩已經撫臣奏明無款可支若此款無著則工程關緊至要所短尙多不能不另請添撥以顧要工惟有仰求垂念

民依飭部臣於河南鄰近省分籌撥銀二十一萬兩限三月內全數到工俾趁大汛未交趕將各廳修守早爲料理完竣免至臨險棘手查上年榮工分溜刷沙無力河身淤墊倍甚現在全黃挽正各廳工程處處喫重臣以大工甫定尙抱隱憂不敢不切實陳請至兩岸常年額款並前請歲料加價及北岸添撥之項亦須早日撥發方能及時籌辦

同治八年四月河東河道總督蘇廷魁奏榮澤汛善後土工共估工十四段長七百六丈餘尺共土十九萬三千九百餘方連水戩共需銀八萬三千三十九兩零

同治八年七月河督蘇廷魁河南巡撫李鶴年會奏稱竊照堵築另案大工事竣後應先核明工段丈尺及工料土石銀兩分晰開單具奏再先造冊題銷歷經遵辦在案查同治七年上南廳屬榮澤汛十堡無工之處漫口經臣等奏明盤做裹頭埽段築做東西壩基添築撐壩進占抽溝約估積麻夫工請撥餉銀遴調官弁擇吉分別次第興工於同治八年正月十五日堵閉合龍穩固在案茲據原派總局司道轉據上南河同知將做過工段丈尺用過料土夫工石方銀兩造冊詳送前來臣等覆查榮澤十堡東西大隄盤護裹頭埽銀並就兩隄改築壩基東壩南面築做撐壩西壩南面隨埽幫寬兩壩分進埽占兼做

上水邊埽填築夾土壩正壩邊埽普律加廂西上邊埽外接廂雁翅東上邊埽外添廂魚鱗等埽又於雁翅魚鱗埽前拋護碎石東壩舊河北灘挑挖引溝等工所用椿草纜纜夫工碎石俱照例價開報其稽麻土方遵照奏准稽每觔例加價銀三釐六毫麻每觔例加價銀一錢挑溝每土一方例加價銀六錢六分壩工每土一方例加價銀一錢九分二釐並三錢五分及六錢不等以上各工共用工料土石例加價銀一百三十一萬三千五百二十一兩五錢八分四釐內例價銀三十九萬二千三十三兩七分三釐內分六成銀二十三萬四千一百三十九兩八錢四分四釐應照歷次大工之例作正開銷其餘四成銀十五萬六千九十三兩二錢二分九釐並加價銀九十二萬三千二百八十八兩五錢一分一釐應在於鹽釐加價項下彌補歸款以上各項銀數均經核實無浮再查臣前次具奏榮工撥款及用銀總數僅止聲叙兩次奏撥部庫各省關銀一百七十萬兩及上年十二月二十一日興工進占起至合龍止所用工料土石挑溝等項除去餘剩料物銀七萬三千餘兩外實請銷銀一百二十四萬七千餘兩節省銀三十七萬九千餘兩連餘剩料物共節省銀四十五萬二千餘兩者因彼時未將司撥銀六萬兩並裹頭壩基撐壩用銀

六萬六千四百九十二兩八錢八分一釐歸併核計之故茲將以前奏明由司商撥之欸計銀六萬兩加入連兩次奏撥共銀一百七十六萬兩再將盤做兩壩裹頭築做兩壩壩基撐壩等項逐一歸併確切勾稽實共用銀一百三十一萬三千五百二十一兩五錢八分四釐計餘剩銀三十七萬三千四百七十八兩四錢一分六釐連用存料物作銀七萬三千兩在內實共餘銀四十四萬六千四百七十八兩四錢一分六釐統計撥收用存銀數相符所餘之款仍照前奏撥歸築工善後各工並各廳常年修守案內動支

同治九年議准沿河州縣經征河淤等租均以八分爲率如解不及數者卽行查明分數分別參處又每年派撥民夫上隄積土防守險工應責成沿河州縣循照舊章如數派撥儻有包折等弊卽將該州縣嚴參至伏秋大汛遇有險工及堵築漫口之時購料僱夫責成該州縣剴切曉諭不得聽居民擡價居奇河工員弁亦不准抑勒苛派及諉過惟卸

豫河志卷十七 經費四

光緒元年三月河南巡撫兼管河道總督錢鼎銘奏稱竊照嘉慶二十一年准工部咨開凡河道另案工程無論題咨各案於三汛後將一年統用銀數彙奏一次並將上三年另案所用銀數多寡分晰比較以備查核等因嗣於道光八年十二月接准部咨奉上諭嗣後彙奏單內除歲搶修定額外凡一年另案工程俱入單內比較等因旋於十五年九月內復准部咨奏奉上諭嗣後彙奏清單務遵奏定期限無論奏咨各案彙爲一冊比較上三年之數原從清單而出毋庸分爲兩事致滋歧異等因十七年二月內又准工部咨奏奉上諭嗣後無論動用何款著一律歸入比較各等因查同治十三年分豫省黃河上游各廳奏辦另案搶險掃磚土石各工連十二年用存工料在內共合銀六十三萬三千六百九十八兩二錢六分三釐比較同治十二年分計多銀四萬三千四百四十三兩二分五釐比較同治十一年分計多銀十一萬五千五百五十八兩二錢四分八釐比較同治十年分計多銀六萬三千三百九十九兩三分二釐查十三年分黃河用數實因奇險疊出用料過多是以上三年均有加增再除添撥歷年節省防險銀及河夫銀兩並十二年

別存料物等項計實用司庫銀十九萬四千八百兩五錢四分六釐亦未逾新章准撥二十萬兩之數謹將用銀總數分別比較彙繕清單恭摺具陳

清單

開歸道屬 同治十三年分奏辦另搶土掃石各工共十五案共用銀三十九萬一千五百八十九兩二錢八分六釐 比較同治十二年分計多銀一萬三千七百九十一兩一錢七分九釐 比較同治十一年分計多銀八萬五千二百二十四兩二錢五分四釐 比較同治十年分計多銀六萬七千七十八兩二錢一分四釐

河北道屬 同治十三年分奏辦另搶土掃磚石各工共十九案共用銀二十四萬二千一百八兩九錢七分七釐 比較同治十二年分計多銀二萬九千六百五十一兩八錢四分六釐 比較同治十一年分計多銀三萬三百三十三兩九錢九分四釐 比較同治十年分計少銀三千六百八十八兩一錢八分二釐

按此本例奏錄一以見大凡而改道以後情形與前不同即爲光緒十六年改章之本

光緒元年七月護理河南巡撫劉齊銜奏稱竊照同治十年懷慶府屬之河內武陟二縣

徐保方陵等無工處所沁河漫口將勘辦情形及合龍日期經前撫臣李鶴年先後奏報並於勘估堵合摺內聲明方陵至徐保隄身卑薄之處甚多擬擇要培修另行估報等情在案嗣前撫臣錢鼎銘抵任飭據該府督同河武兩縣將沁河南北兩岸隄工擇節估計各該工段共需銀二萬九千四百餘兩而原估漫口工程約需銀三萬餘兩因遂加釐剔共止用銀一萬五千八百餘兩較原估節省銀一萬四千餘兩以全數撥支隄工尙不敷銀一萬五千三百餘兩奏懇動款給發欽奉諭旨允准遵即飭司籌款發交該管府轉給河武二縣按段修培各報工竣開具工用銀數呈請驗銷批行確核旋山臣在布政司任內會同河北道吳潮遂欸勾稽河內縣徐保漫口工用銀一萬十一兩三錢三釐六毫八絲武陟縣方陵漫口工用銀五千八百七兩一錢七分共銀一萬五千八百十八兩四錢七分三釐六毫八絲又增培沁河兩岸隄工河內縣用銀一萬五千二百九十三兩七錢三分五釐武陟縣用銀一萬四千一百七十三兩二錢一分一釐共銀二萬九千四百六十六兩九錢四分六釐統共請銷銀四萬五千二百八十二兩四錢一分九釐六毫八絲均係核實無浮援照河工例案彙案開單議詳呈請核奏前來經前撫臣錢鼎銘核明未

及具奏因病出缺臣覆加查核此案工程經前撫臣先後奏明發欵辦理檄飭河北道督同該管府縣實力興辦徐保方陵等處漫口於同治十年九月二十四五等日先後合龍其根築後戢補還大隄廂護各埽壩均各次第辦竣至增培河武二縣隄工亦於十一年六月二十及二十八等日一律告成查驗工堅料實並無草率浮冒惟所開土方料價核與例價不符因查歷辦成案挑河築壩工程例價不敷准開加價例價作正開銷加價攤征還款至沁工增培舊案亦係隨時察看工程緩急取土難易於例價外酌加津貼每方價銀至三錢四錢不等此案堵築漫口時值夫缺料昂且兩岸隄身內多積水外繞灘沙取土不易不得不分別照章加價酌予津貼以重要工惟加價攤征已於咸豐五年欵奉上諭永遠禁止其同治七年趙樊沁工加價按照祭工請以鹽劬加價還款而培隄津貼則歸捐補此次徐保方陵隄工動用津貼銀兩環沁居民力難報捐歸款自當變通酌辦茲查堵築徐保方陵沁河漫口工程銀一萬五千八百十八兩四錢七分三釐六毫八絲內分例價銀九千十三兩一錢九分七釐六毫加價銀六千八百五兩二錢七分六釐八絲又增培河武二縣沁隄工程銀二萬九千四百六十六兩九錢四分六釐內分例價銀

二萬四千四百四十四兩六錢九分八釐津貼銀五千二十二兩二錢四分八釐相應奏懇俯准將堵築徐保方陵等村沁河漫口及增培河武沁隄二共例價銀三萬三千四百五十七兩八錢九分五釐六毫照數作正開銷其堵口加價及培隄津貼二共銀一萬一千八百二十七兩五錢二分四釐八絲均請在於鹽餉加價項下彌補仍俟趙樊沁工借款補完後再行接續歸補以期庫款有着而免虛懸此項工需動用司庫地丁銀兩辦理應扣六分平銀另欸存儲至河內工需因取土過遠用料較多是以發辦價值較武陟爲大合併陳明

光緒元年八月河道總督曾國荃奏稱竊臣於立秋處暑時疊將黃河兩岸險要各工防護平穩並水勢過大廂修日久所需錢糧較鉅原請之欸難於敷用緣由約略陳奏在案查本年夏令以後各省之水皆大山東東阿縣疊次稟報大清河水陸續漲漫出槽平地水深三四尺至五六尺直隸東明縣稟報六月杪黃河水漫溢出槽平地一片汪洋此皆上游來源過旺下游河身不能容納以致四出漫淹下游如此則上游先受出山之水者情形之危險更可想見此黃河兩岸七廳所以險要環生搶救不遑而用款因之增益也

當水勢拍岸盈隄大溜南衝北射勢不能不撒手搶護斷不敢徒博節用虛名貽誤民生大計所需工料錢糧但求有可賒挪稱貸靡不百計搜羅應急迨事後詳細稽考實已爲數不貲再四思維必須酌添款項方能展布卷查同治二年河工用款定章以後無歲不生險工亦無歲不請添款或十餘萬二十餘萬至三十餘萬不等上年三次共請添銀三十八萬九千兩霜後上中等廳又生奇險復請添銀四萬雖其時河工用款業已截數奏明請歸次年核銷而究係當年所用之款綜計四次共用銀四十二萬九千兩本年添款經前河臣喬松年於上年冬間按照歷年初添舊案兩岸共請添銀二十六萬兩現在司庫支絀尙未全數撥清而統計兩岸七廳常年修守及搶險所用不敷甚多且汛期尙有五旬各廳工程如何仍難逆料茲據南北兩道先就以後別無意外險工估計稟請添撥銀兩接濟前來查所請之數較多臣復確切考核酌量刪減計南岸各廳非添銀八萬三千四百兩不敷應用北岸非添銀四萬五千六百兩不敷應用值此國用維難苟可量爲撙節何敢再請增益無如工程繁多錢糧祇有此數若不據實陳請不獨目前萬分掣肘將來亦無以責成工員認真辦工況此次續添連上冬所請本年之款共計銀三十八萬

九千兩與上年霜前用數相同惟有仰求飭下河南撫臣轉飭藩司再行設法籌撥銀十二萬九千兩務於霜清以前分發南北兩道俾臣得以督飭各員迅將現在積欠各項並秋汛應行防護事宜次第料理則通工幸甚大局幸甚奉上諭著劉齊銜督飭藩司於霜降以前趕緊如數籌撥以資修守

光緒元年十一月河東河道總督曾國荃奏稱竊照黃河工程關繫至重巡防修守最爲當務之急但非錢糧應手難期辦理裕如同治二年前河臣譚廷襄奏請兩岸歲修除河銀別留外每年司庫撥銀二十萬兩如遇非常險工再行奏提節省防險銀兩接濟改革以後用款支絀無歲不出險工無歲不請添撥蓋近年以來黃水旺盛非常挾沙而下水退沙停河身日漸淤墊高於隄外平地之處指不勝屈再遇長水中泓不能容納遂而北射南衝坐灣橫注現在霜清已過除飭廳妥慎防護凌汛外所有來年修守事務必須預爲籌備約核用項爲數較多據南北兩道援案稟請添撥款前來第值此制用維艱不得不力求節省查甲戌年初次請添銀二十七萬四千兩乙亥年初次請添銀二十六萬兩茲仍援照上年之案請添撥銀二十六萬兩分發南岸各廳十四萬兩北岸各廳十二

萬兩仰祈俯如所請飭下河南撫臣轉飭藩司年前先撥四成春汛再撥六成以便督飭道廳擇節動支趕辦土工購集正雜料物俾得禦險有資不致臨事掣肘

光緒元年諭黃河工程關繫緊要所有來年修守事務自應豫爲籌備著李慶翱劉齊銜飭令藩司照數籌撥於年前先撥四成春汛時再撥六成俾資應用

光緒二年十二月河東河道總督李鶴年奏援案請撥來年防險銀二十五萬兩

光緒二年奏准添撥銀二萬八千三百兩備修黃河兩岸要工

光緒二年覆准嗣後修辦咨案工程務將某年工程動用何年何省銀兩分案詳細聲叙以憑稽覈

光緒二年奏准黃河修守土工爲先現在開歸道屬上南中河下南三廳河北道屬黃沁衛糧祥河下北四廳共用例津二價銀四萬八千四百八十九兩有零均係極應辦理之工另案開銷

光緒八年六月河南巡撫李鶴年奏稱竊照懷慶府屬之河內武陟二縣境內沁河匯丹入黃水勢浩濶兩岸隄工每因風雨侵刷時需增培修整武陟地居下游爲沁黃交匯之

處自近歲趙樊郭村等處漫溢民間憂懼彌深情形尤關緊要前據調署武陟縣知縣唐元鑾具稟請修經臣飭司移行該管道府委員會同勘估得該縣沁河南岸自石荊起至方陵止計工十三段北岸自陶村起至木鑾店止計工六段需銀七千九百九十一兩餘以上各工實爲歷年風雨摧剝汎水淤墊以致隄身卑薄殘缺過甚若不乘時增培一遇大汎不堪設想均係擇其至要必不可緩之工所需經費亦係樽節估計減益求減並無浮冒茲據布政使覺羅成孚彰衛懷道陳寶箴核明會詳呈請援照歷屆成案奏明發款辦理等情前來臣伏查增培沁隄工程向係借動庫款工竣後在於河北三府屬攤征還項自咸豐五年奉旨永遠禁止攤征同治十一年光緒二五等年修培沁隄均經各前撫臣奏請動款給發欽奉諭旨允准在案此次武陟縣增培沁隄事同一律既據勘明委係必不可緩之工且將應需價值按照土方核其取土路近較易者給以例價隔水遠遠以及選淤極難倍難之處量予津貼力求樽節刪減無浮合無仰懇天恩俯念工程緊要准照歷屆成案在於司庫地丁項下先行動發興辦俾環沁居民得以捍衛有資臣因往覆核查大汎已屆不敢少涉拘泥業經飭司籌款並責成該道陳寶箴督率印委各員迅速

趕辦完竣核實驗收不任稍有草率偷減所動銀兩俟工竣飭造細數清冊據實報銷
光緒九年奏准沁河歲修銀二萬四千兩河內武陟二縣各一萬二千兩

光緒十年七月河東河道總督成孚片奏稱再今春到任後即赴兩岸周歷勘工因各廳
所辦正雜料物時逾桃汛尙未購齊據該廳員等僉稱奉准修工銀兩值庫款匱細撥領
逾期以致節節耽延未能如限完竣而其中虧折耗費尤以料欸爲大宗緣各廳需料自
三四百垛至七八百垛不等向於九月領銀發辦年底全完則所領價銀尙敷辦理今則
歲前款不應手購積無多迨至下年春間接辦鄉間存料已多半售作柴薪間有存料之
家明知河工搶險需用無不擡價居奇遂以兩垛之銀尙不敷一垛之用開採石方遠逾
數百里運費本極浩繁若採辦逾時水漲溜急挽運亦形艱阻工員責無旁貸莫不重價
招徠設法購辦以顧考成因而積負纍纍補苴乏術等語臣詳加訪察尙係實在情形然
溯本追源河員之累固由於領欸逾時辦公賠墊亦由於相沿積習浮用過多再四籌思
不得不籌畫變通以豫儲爲節省之計當一面商之藩司務將應撥工欸竭力設籌按時
撥解一面嚴諭南北兩道隨撥隨發勿稍稽時俾公事有所責成工員無所藉口並飭力

裁冗費消滴歸公不准稍有虛糜該司道及廳員等尙皆共體時艱悉照所議辦理故本年添款減而又減較之近歲所請之數節省銀四五萬兩然河工用款祇能杜其浮糜不能省其實用倘此後汛險工要需用較多仍當隨時據實奏陳續請添撥斷不敢以此時節省限後日之工需致有貽誤

光緒十年九月欽差孫毓汶烏拉布奏稱竊臣等於八月三十日行抵歸德接奉寄諭有人奏東河歲修銀兩由開歸陳許道等支領迨發交各廳有前五成後五成名目實計到工不及三分之二霜降後官幕各有分潤謂之霜酬偶有險工均另籌款此項仍飽私囊又有河夫銀一款近年工用亦從不需此等語著孫毓汶烏拉布確切詳查同治初年以來領款實數比較覈減奏明辦理等因欽此臣等抵汴後當卽咨行河臣分札開歸道陳彝河北道許振祿將同治元年以後至本年止領款實數縷晰單開並就現在工需嚴加覈減實可節省帑項若干又前後五成霜酬名目詳查聲覆旬日來屢晤河臣通籌細酌又面諭兩道等確籌覈減實數不得空言塞責去後茲據河臣縷晰咨覆並移送歷年領款清單歷任奏稿旋據該道等各按工款一切情形稟覆前來臣等詳加覈察據河臣咨

稱查河防經費歲有常經而工段險夷向無一定自咸豐五年銅瓦廂漫溢下游河涸工
停上游兩岸七廳各工仍照常修守時值軍需孔亟司撥艱難又兼搭用鈔票諸形竭蹶
同治二年經前督譚變通舊章減工節費停鈔用銀歲撥司庫實銀二十萬兩爲常年歲
修遇有異常險工另請添撥乃改章以後無歲不出險工即無歲不請添撥譚任即已添
欸未能照額辦理歷後各任均以工險費巨逐次添撥有案而所請添欸祇能擇要補苴
爲急則治標之計其殘缺應修未能兼顧者遂不免漸就廢弛下游河身日見淤高上游
工程益見喫重以致同治七年榮工失險堵築費至一百數十萬後此修防不得不慎益
求慎期保無虞工段日增用欸倍費此改章以來今昔情形互異難與同治初年用數同
日語也今春履任後深悉河工錮習嚴飭該道廳等力除積弊一切舊規冗費悉令逐欸
開報盡行革除伏秋兩汛沁黃異漲上南中河下北等廳迭生險要甚於往年而續請添
欸則較近兩年已減銀四五萬兩曾經奏明有案此項減用銀欸實已省存藩庫節用即
所以裕餉理固顯然此後逐年實力整頓如無非常鉅險自可尙能節省近年之費用繁
鉅實由於增埽之多非減埽不能節用現在督同道廳等籌議築壩減埽之法以期工堅

帑節無誤修防查兩岸歲修額欸二十萬兩南岸分撥六成計十二萬兩北岸分撥四成計八萬兩現飭該兩道悉心覈議南岸工繁酌減一成計銀一萬二千兩北岸工簡酌減二成計銀一萬六千兩自乙酉年爲始先行試辦又河銀一項係兩岸修工夫食專款歲收銀三萬數千兩分解兩道備支歲搶及墾夫工食茲飭亦自乙酉年爲始應發夫食仍於河銀項下動支每歲約用銀三四千兩其歲搶銀兩另於額添款內通籌下餘河銀不准擅動盡數移解司庫另行存儲俟霜降後核定存數奏明解部以昭核實所減額欸銀二萬八千兩儲存司庫一併奏明請旨辦理如此核實樽節共計籌出銀六萬兩又查前兩年添款俱請銀二十六萬數千兩本年續請已減銀四萬五千兩擬再將來歲工欸省益求省按照本年減請數目辦理合成前項共足十餘萬兩雖於餉需無補而竭盡圖維實已不遺餘力等語又據該道等稟同前請其前後五成及官幕霜酬等名目據該道等稟稱同治二年改章後因撥欸錢糧祇有此數而籌備一歲工需勢不能一總支領是以將各廳應辦料物各欸先行提發五成飭令分投購辦下餘五成存儲道庫俟交汛後隨時給發此前後五成之說所由來也現在各廳額辦工料俱令悉數購備司撥額欸隨到

隨發久已無此名目其添撥之款按工核用更無所謂五成矣又查各廳向有延請明白工程幕友幫同料理每值搶險艱蹈危異常辛苦霜清後該廳員略分廉俸以酬其勞爲數甚微又河工候補人員派委防汛者有酌發薪水銀兩由廳解道飭發或即以此項薪水認爲官給霜酬其實皆由各廳攤解并非出自公款等語以上兩款據該督咨覆該道等所稟尙屬實情各等語臣等伏查豫省黃河當銅瓦廂甫經決口建甌下瀉上游險工無多自咸豐六年至同治元年每歲三銀七鈔約銷款九十萬兩上下迨同治二年前河臣譚廷襄奏定額欸實銀二十萬兩工需頓減大半本年險工即請添撥其後按年增加至七年歲銷已用四十九萬迨榮工失事八年遂增至六十一萬自八年至今五十餘萬者五年八十餘萬者一年六十餘萬者十年合十六年之均勻牽算每歲總在六十餘萬之數查閱歷任河臣奏稿皆以定額不敷險工迭出情詞急迫一再請添至光緒八九兩年遂增至六十九萬推原其故原額核減較過隄壩要工不修近年山東下游逐漸淤高海口出水亦逐漸不暢險增費鉅年甚一年以臣等平素訪聞證之河臣現在咨覆尙屬實在情形即河員之偷減侵蝕不盡能工歸實用亦屬傳聞已久然欲於此權衡減額

酌定損過就中之數使帑項無虞濫費要工又不致疏防則非身親閱歷熟悉工程裁併得宜行之以漸有未敢輕爲臆決者臣等再三籌酌與其強劃定額後此不能照辦未免掩耳盜鈴轉不若逐漸減裁少一分之歲銷即多一分之庫儲較有實際現據該督籌議酌減明年歲需約十餘萬兩在積年有加無已之後驟去此數已不爲少此後若如所籌添壩減掃工堅帑省則按年撙節仍當日起有功相應請旨准照該督所請自明年爲始將籌減南岸一成北岸二成歲修額欸銀二萬八千兩先由司庫另欸存儲其河夫銀三萬餘兩亦解存司庫一俟冬間截數將減請之四萬五千兩由司庫節省防險項下提出連前兩項一併奏明請旨聽候部撥此外再有節省亦一併提存奏明候撥嗣後卽作爲定章每屆一年截數奏報一次如數年之後核減之實欸遂歲增多應由該督將認真督辦承辦之道廳奏請恩施酌予獎叙倘不肯河員狃於故習貪利侵欺罔知悛改卽嚴參懲辦庶在工咸知懲勸而積弊可漸挽回至前後五成官幕霜酬各事既據該道等查明現在并無此等名目該督咨覆屬實應請無庸置議

光緒十年諭自明年爲始將歲修減成等項銀兩均存司庫冬間截數奏明請旨候撥嗣

後作爲定章如數減之數遂歲增多將督辦承辦之道廳奏請獎叙倘有不肖河員狃於故習貪利侵欺立即嚴參懲辦該河督務當督飭各道廳將所籌添壩減埽認真經理以期工堅帑省

光緒十一年議准河工辦料到工委員盤查具結申送如有虧少著承辦秤收之員勒限分賠盤查之員儻有瞻徇照徇底例參處短少物料責令分賠儻盤查之後該員私挪變賣照侵蝕錢糧例分別治罪

光緒十一年議准河工分賠逾限未完銀兩奏明催追之日按照例限減半立限追繳三百兩以下勒限三箇月三百兩以上勒限半年一千兩至五千兩勒限二年五千兩以上勒限二年半一萬兩以上勒限三年二萬兩以上勒限三年半三萬兩以上勒限四年以次遞加有銀數在十餘萬兩外仍照每萬兩加限半年完繳均由該管上司承追再有遲逾本員參處承追官照不力例開參

光緒十三年河東河道總督成孚以常年工用不敷奏請添撥節省防險銀十萬兩○按奏撥此款在八月鄭工漫口之前

光緒十三年九月諭成孚倪文蔚奏會勘堵築事宜一摺據稱鄭州下汛十堡漫口督飭
工員竭力堵築已將東西兩壩裹頭護埽三十餘段州辦完竣現在盤築壩基購料興工
惟需欸甚急請籌撥等語鄭州決口後水勢直趨下游該處河工關繫數省民命若不亟
籌堵合爲害伊於胡底成孚倪文蔚當趁此霜清水落之時趕緊廣集物料將壩基等工
盤築堅穩節進占務期及早合龍以免遷延遲誤所需欸項著先由部庫提撥銀二百
萬兩尅日解往未到以前准其由司庫提欸應用仍著戶部陸續籌撥的欸源源接濟以
期無誤要需朝廷不惜帑金爲民捍患該督等務當嚴飭工員實心實力妥速辦理員弁
中有始終勤奮異常出力者准其從優保獎破格施恩儻敢草率偷減藉端牟利卽著分
別嚴行參奏按照軍法從事勿稍寬貸成孚疏防於前厥咎甚重儻不知愧奮糜帑無功
定即重治其罪決不姑容倪文蔚身任地方亦屬責無旁貸前因甫經到任從寬免其議
處該撫當激發天良同心協力速成要工慎勿諉卸干咎凜之

光緒十三年九月戶部奏稱竊查河南鄭州黃河漫口掣溜南趨仰蒙特頒內帑急賑災
黎迭次欽奉諭旨截留京餉以資賑撫復於八月三十日由軍機處交出軍機大臣面奉

諭旨此次河南鄭州黃河漫口所有搶辦河工及辦理災賑各事宜需款甚巨亟應豫籌的欸以濟要需著戶部悉心酌核妥議具奏欽此當經臣部議將各省洋藥加徵釐稅自今年正月以後除已由部撥各用不計外所有收數全行存儲以備防賑之用並聲明再由臣等將應減應停之項及變通則例再行分具條款奏明辦理奏奉諭旨依議欽此欽遵在案伏維黃流尙無歸宿汎濫之處必寬淹浸之日必久億萬生靈嗷嗷待哺現據河臣奏報口門刷至五百餘丈之寬則河口一日不堵民生一日不安即朝廷憂勤一日不釋現經欽奉諭旨令於部庫提撥銀二百萬兩尅日解往此後仍陸續籌撥工程浩大即使修防得手尅日奏功而五六百萬之鉅欸何從籌撥查歷次河工用欸皆以捐輸爲大宗現在海防捐輸擬改爲河工事例尙須詳細斟酌變通辦理另摺陳奏此外應籌欸項臣部再三集議既不便將一切支欸概行核減更不敢過事搜括累及小民際此時艱萬分焦急不得不於無可設法之中竭力籌畫惟有裁長夫停購買改米折調防營以及勸輸鹽當匯號各商捐輸集欸以佐經費之不足議擬各項辦法六條另繕清單恭呈御覽奉旨覽奏均悉裁撤長夫暨鹽商捐輸當商匯號交銀三條著照所請行餘勿庸議現籌

各款均非現銀恐停工待餉貽誤要需仍著該部於附近河南各省應行解部的款先行指明劃撥以期迅速應用俟所籌積有成數再行分別歸款○戶部原單不錄

光緒十三年九月戶部奏開鄭工捐例

光緒十三年九月戶部奏先後提撥庫存銀兩及截留京餉五百餘萬兩以濟鄭工

光緒十三年十二月署河東河道總督李鶴年奏請撥增培添築黃河兩岸殘缺卑薄隄埝攔戩等工銀十五萬兩分發南岸各廳銀九萬兩北岸各廳銀六萬兩

光緒十四年二月督辦工程禮部尙書李鴻藻署河東河道總督李鶴年河南巡撫倪文

蔚奏稱鄭工潰口之寬從來罕有原估照祥工成案請撥工款六百萬本從節減適值歲

歉料缺牛馬被疫車運艱難百物亦皆昂貴即以祥工比較稽料麻料兩大宗均加貴至

四成以上一切雜項大率類此委非估辦之時所能料及臣等雖力破積習凡事核實辦

理而通盤籌計實屬不敷臣等深知部庫支絀鉅款難籌但此次大工爲三省數十州縣

生靈安危所繫若不先事陳明一至工程喫緊之時而款項不繼益重貽誤事機之咎容

再督同鄭工總局司道逐細鉤稽確估短少之數另行奏請續籌添撥惟兩壩晝夜進占

日費數萬存款不過百萬上下其涸可待仍慮倉卒無以接濟擬先商由北洋大臣李鴻章息借商款一百萬兩由臣等察看工次緩急情形斟酌提用以備不虞是否有當伏候聖裁

光緒十四年四月戶部奏籌撥鄭工銀一百萬兩

光緒十四年七月督辦工程禮部尙書李鴻藻署河東河道總督李鶴年河南巡撫倪文蔚奏稱伏秋汛至兩壩埽占屢墊屢鑲款料將罄擬請停緩俟秋汛後接續趕辦續撥工款現計未解到者約有七十萬除應補還司庫墊款外兩起所存銀錢統計不及二十萬非豫爲籌計不足以資接濟此次工程始終以集料爲第一難事約計現在搶辦將來堵合所需尙多一俟新料登場即須廣爲購備此項已屬不貲開工後需費尤極煩鉅現存之款此兩月中已難支持斷不能更供秋後工料之用若俟臨時奏請又恐緩不濟急難免停待之虞惟有仰懇飭下戶部迅速籌撥銀二百萬兩以濟急需臣等深知庫款支絀部臣籌畫艱難奈因時勢所迫萬不獲已爲此再三之請不勝悚惶待命之至奉上諭據李鴻藻等奏伏秋汛至請停緩大工俟秋汛稍平接辦一招覽奏殊深憤懣自上年八月

鄭工漫口迭諭該河督等迅籌堵築先後發給工需銀九百萬兩朝廷軫念民生籌措不遺餘力乃該河督等遷延觀望節經嚴旨催辦至歲杪始行開工詎自上月二十一日西壩捆廂船失事阻礙不能進占據奏種種棘手情形若仍令勉強暫辦終歸無濟著准其暫行停緩一面固守已成之工一面添集料物俟秋汛稍平迅速接辦現已飭戶部迅籌鉅款接濟工需著李鴻藻將如何挑溜挖淤及添集料物各事宜認真速辦詳晰覆奏

見工程門

光緒十四年掌河南道監察御史劉綸襄奏稱竊臣恭閱邸抄伏讀初十日上諭如鄭工辦理失當情形已在聖明洞鑒之中惟以臣之所聞猶有不盡於此者臣維河南吏治之弊甚於他省巡撫倪文蔚蒞任之時正河工辦料之日朝廷嚴旨督催自宜設法變通以期迅速蕲事乃倪文蔚不問屬吏之賢否概以辦料委之州縣州縣復假手胥吏既不發價復多方抑勒小民深受其累遠方之人聞風而懼多將積料付之一炬以致購辦無從有誤人工推原其故倪文蔚實職其咎此其表率無能已可概見道員歐陽霖係河南獲咎之員其歷任州縣素著貪劣河南之人至今深恨惟奔競鑽營是其所長此次報捐之

欵非他卽河南黎民之脂膏也總辦稽料係河工要差乃倪文蔚不委他人而獨委一紳民交惡之劣員觀其借材他省一似舍歐陽霖別無可用之人者不知其貪汚性成一旦假以事權其侵吞浮冒何所不至謂非任用私人其誰信之似此庸闇徇私與成孚等厥罪維均僅予革留臣以爲未足蔽辜者此也辦河諸臣旣欲將黃河挽歸山東故道則開辦引河自屬要工宜如何詳細酌度認真經理乃不顧地勢之高下不計土方之多少竟以銀一百二十萬兩包與總兵崔廷桂辦理已屬駭人聽聞崔廷桂意圖自肥草率從事開河旣狹且淺河身高下迴殊未能一律剷平放流之後一二日全行淤墊大溜仍歸舊處致口門日漸刷深未能合龍大功敗於垂成朝廷之巨帑虛糜貪吏之厚貲坐擁臣以爲亟宜嚴懲者此也河工之刻扣侵吞向屬積習此次鄭工用欵宵旰焦勞於上臣工竭蹶於下承辦諸大臣宜如何激發天良認真節省近聞自河南來者言發欵雖九百萬之多到工者不過數成惟督辦大臣李鴻藻清操自矢其餘大小員弁無不坐享厚利人言藉藉似非無據臣思鄭工一日不停帑項必源源接濟若復恣其侵吞罔思變計誠恐朝廷之正供有常奸吏之貪囊無底卽庫欵充盈猶將不給況在支絀之時乎至督修兩壩

之大臣其功過原自易見如果工堅料實自能抵禦洪流若坍塌墊陷前功盡棄其罪亦何可姑容惟河工積習失事之後往往移東挪西以多報少借端請款肆行欺飾此次鄭工既據奏明僅餘六占未進六占之外皆已成之新工也前此工程浩大難以計核今則已有把握矣請飭下新任督臣吳大澂先行估計每占用銀若干兩六占共用銀若干兩預行奏明以杜挪借則發款庶有成數可稽不致盡爲虛糜至新工如有疏虞自應責令該大臣賠修以爲糜帑誤工者戒再臣聞河工薪水銀大臣每月千兩委員每月二百兩投効者至數百員之多以朝廷有用之款養各省庸濫之人百姓之饑溺誰拯冗員之酬參可鄙請飭下吳大澂破除情面嚴行裁減凡無要差者概行驅逐以省度支而杜冒濫光緒十四年陝西道監察御史燕起烈奏稱風聞鄭工舉事委員至一千餘員之多又聞前河臣成孚有賣給委劄之事以入資多寡定差優劣濫竽者四百餘人又外間傳言紹誠自河南匯銀四十萬來京衆口一詞似非無因今既大工已潰仰蒙嚴旨分別予以革職軍臺臣謂此莫大之恩也查鄭工決口傳聞在八百丈內外以一百八十丈一里計算寬尙不足五里何以動款至九百萬尙無成功應請按其當日所報大數統計已用多

少現存多少若款項業已告罄則以萬餘金進占一丈恐非情理所有其中有無弊端屈指可得概見修築隄埵有土方可估下埽排椿有料物可憑均不能十分懸遠伏願勅查確數如有侵欺重法卽隨其後此覈實之道期於懲一儆百者也

光緒十四年署河東河道總督吳大澂奏稱竊臣於光緒十四年八月初六日接准軍機大臣字寄欽奉光緒十四年七月二十七日上諭一道並抄發原摺二件命臣將兩壩及引河究竟因何貽誤實在情形並倪文蔚等被參各款逐一確查據實具奏仰見聖慈塵念河工力求整飭之至意臣到工之始一面察度河勢履勘壩工一面調閱案卷明查暗訪並與在工辦事人員反覆推求悉心考察知本年春夏之交河水甚平未能早蒔全功一由工段過長全溜圈注口門進占費力一由上年開工太晚料物未能應手之故當時札飭各州縣購辦稽料係按照道光二十一年祥工成案亦非倪文蔚一人之見惟地方州縣由撫臣督催較爲得力倪文蔚以辦料自任目擊河工待用情形嚴限趨催未免過於急切而州縣奉文促迫多派胥役四處搜求擾及窮黎勢所不免臣自歸德府進省沿途訪問亦有議及州縣辦料之艱難有欲速反遲之弊究竟何縣書差辦理不善何縣鄉

民受累亦不能確實指證其辦料遲延之州縣早經撫臣倪文蔚會同河臣李鶴年奏參在案現經臣出示曉諭專派委員自行設廠收買民料勿庸各州縣購運以後流弊自少民情或稍踴躍道員歐陽霖前在河南歷任州縣聲名平常因案鐫級此次河臣李鶴年撫臣倪文蔚會札委辦稽料自上年十一月到工往來周家口購運物料查無實在劣迹惟係指捐江蘇試用人員尙未到省既有人言藉藉應將總辦稽料一差即行撤去由撫臣咨回江蘇試用河北鎮總兵崔廷桂督辦引河經前河臣李鶴年撫臣倪文蔚於上年十二月會奏摺內聲明原估二千五百丈派令工賑營提督董明禮督率工夫興挑因係鄉居農民挑挖未能如式復經會檄河北鎮總兵崔廷桂督帶弁兵招募諳習挑河民夫到工改估引河共長三千丈分作九十六段空留引河頭三十丈以備臨時相機搶辦等語臣查總兵崔廷桂造報清冊內挑挖正引河及搶辦河頭共用銀六十三萬三千餘兩撥沙挖淤抽溝並搶挖川字河二道共用銀四萬五千餘兩練軍永固營勇丁口糧並發工賑營長把墩及一切雜款共用銀二萬四千餘兩統計不及七十萬兩原參撫臣倪文蔚以銀一百二十萬兩包興總兵崔廷桂辦理實無其事臣又派員乘坐小舟由引河頭

順流而下逐段測量現在河口最深之處八九尺至一丈不等以下或深四五尺或三尺五寸四十二三段閘河有淺灘水深二尺至四尺不等惟六十三四段水深至六七尺引河上下均有船隻往來行駛尙不致全行淤墊以後攔壩挑河仍當責成崔廷桂一手經理惟現值庫欸支絀之時不能不撙節估計總期引河深通寬闊而經費不致虛糜庶與公事有裨原參又謂大臣薪水銀每月千兩委員二百兩投効者至數百員之多當即行查鄭工總局茲據該局司道會稟光緒十三年大工興辦後曾經議照歷辦成案由五四經費項上開支公費嗣因督辦臣李鴻藻前署河臣李鶴年撫臣倪文蔚飭諭節慎工需一切不准開支並未支送公費銀兩督辦臣李鴻藻係照部章每日支銀七兩隨帶司員每員每日支銀三兩其餘調工委員薪水查照榮工成案稟明道員每月支銀一百兩知府每月支銀七十兩同通州縣每月支銀六十兩佐雜各員每月支銀三十兩投効人員均減半發給並無每月支銀二百兩章程其他省人員來工投効亦無數百員之多原參有謂成孚有賣給委劄之事以入資多寡定差委優劣濫竽者四百餘人查各衙門皆有劉稿存案臣調閱案卷前河臣成孚任內與撫臣倪文蔚會銜劄委文武員弁一百一十

人單銜劄委九十餘員大半河工候補及地方州縣佐貳間有本省在籍紳士其外省人員投效者甚屬寥寥並無四百餘人此外委員在工差遣有由各局各廠自行檄委之員有因趕辦夜工隨派之員皆與成孚無涉該前河臣身任大員受恩深重斷不致有賣給委劄之事自係傳聞之訛原參又謂外間傳說紹誠自河南匯銀四十萬來京一節臣在省城密飭署祥符縣知縣舒敏調取各票號匯銀總簿親自查閱僅日昇昌匯京銀四千兩存義公匯京一萬兩皆由河南匯至京城寶興隆金鋪欸目較鉅並無匯紹宅字樣此外亦無匯京鉅欸據各該號商人聲稱實無紹誠囑匯銀兩之事臣到工後又派員前往西壩銀錢庫守提該庫收支銀錢簿及日用流水各簿二十餘冊逐冊檢查核對所收銀數與藩庫發欸相符所發麻價料價及土夫錢文委員薪水均係因公動用並無紹誠挪用銀兩惟江蘇候補知縣蔣文海自二月十八日至七月初三日止共領料價銀二十萬二千餘兩本年所收民料價值參差易滋弊竇蔣文海所購稽料六百六十餘垛有無浮冒事後無從稽核臣查蔣文海爲紹誠親戚委以購料要差領支鉅欸未免不知遠嫌紹誠呈西壩委員清摺並無蔣文海銜名雖已撤差回省訪聞該員在工數月聲名甚劣跡

近招搖應否請旨將江蘇候補知縣蔣文海革職以示懲懲原參謂紹誠匪銀進京查無實據應請毋庸置議至上年拍險不力之署開歸陳許道李正榮雖經吏部照例議處惟前河臣成孚已獲嚴譴該前道仍復留工效力誠如聖諭僅予摘頂降調不足蔽辜應將前署開歸陳許道李正榮已革上南廳同知余潢請旨交部一併嚴議以昭炯戒上南營守備王炳業已病故應毋庸議從前在工差遣人員自奉旨停工以後業經前署河臣李鴻藻督令各局大加裁撤如再有可汰之冗員可省之浮費臣當破除情面竭力刪除以仰副聖主慎重工款之意

豫河志卷十八 經費五

光緒十四年八月署河東河道總督吳大澂片奏稱再前督辦臣李鴻藻等奏請添撥銀二百萬兩已蒙恩旨飭部籌撥臣到任以來查核前撥銀九百萬兩司庫所存無幾兩壩料墾亦將告罄保守已成之工每日仍須加廂加築計距霜清尙有一月所需稽料錢糧已形竭蹶臣與鄭工總局司道大員通盤核計合龍以前之料物固須先事預儲合龍以後之工程亦應兼籌並顧再四思維前請銀二百萬兩尙不敷用總須添請銀一百萬兩方足以竟前功而彌後患臣蒙聖恩特簡界以事權若再糜費誤工豈能當此重咎現議添築挑水壩疏濬引河皆必不可少之工但須料物應手工程堅固早一月合龍早省一月之工費所慮者各省解欸未能接濟河南藩庫亦無可挪墊此臣所日夜焦思而不能不鯁鯁過慮也現准部咨已撥銀一百萬兩擬請飭下戶部再行籌撥的欸銀一百萬兩期於霜降前撥解到豫以應急需其餘一百萬兩可否飭令各直省督撫臣暫行籌借無論何欸設法借撥趕於年內委解到工即以各省所收鄭工捐項抵撥歸還如捐欸不足請以本年各關所收洋葯釐金餘羨銀兩撥還各省墊借之欸在各直省督撫臣公忠體

國無不以豫省河工爲念既有指款可抵必能設法移緩就急俾臣得以早奏成功上紆朝廷宵旰之廛下慰皖豫災民之望大局幸甚

光緒十五年五月河東河道總督吳大澂河南巡撫倪文蔚奏修築廣武山黃門嘴山根柴苾大石壩一道共用土料碎石夫工等項銀八萬七千九百餘兩

詳見工程門

光緒十五年十月河東河道總督吳大澂片奏稱再查黃河南北兩岸伏秋大汛往往奇險環生而保護險工防患未然莫善於磚石壩埽臣深知其禦險得力立意於河歸故道後專派委員動撥善後工款採購磚石在各廳迎溜坐灣著名緊要處所添築壩工挑托溜勢本年秋汛期內上南河廳榮澤汛九十堡中河廳中牟下汛三五堡下南河廳祥符上汛黑垆工祥河廳祥符上汛十五六堡下北河廳祥符下汛頭二堡先後河勢喫重大溜左衝右突各廳搶廂埽段幸保無虞賴有各道壩工爲之擎托蓋護藉免棘手化險爲夷此保護之得力確有明驗除將所做段落另行查明附片具奏外伏查壩工當溜之所新築基址入水未深總須接續加拋三五年後方能到底堅實各廳應領歲修項下購石無多其勢不能撒手拋用本年善後工款業已告罄核計所短尙不甚鉅暫行挪動南北

兩道征存道庫已丑年河夫銀兩湊資辦理惟此項河銀前於光緒十年仰蒙欽派大臣來工查辦核減歲欸奏明提解藩庫廳候部撥動用原爲撙節浮費起見現在壩工林立工欸不敷與其另請找撥不如借動河銀以後逐年加拋用石較多亦恐難乎爲繼合無籲懇鴻慈俯念工關緊要自己丑年爲始准將兩道河銀留歸工用專指添辦磚石儲備加拋新壩列入另案報銷不與各廳工欸牽混庶工歸實用費不虛糜而壩工有此專欸不致日久衝塌前功全棄如五年以後新修各壩一律堅穩或溜勢外移無須加拋磚石屆時再行體察情形奏明停止河夫銀兩仍飭提解藩庫

光緒十五年十二月河東河道總督吳大澂河南巡撫倪文蔚奏稱竊照歷屆堵築漫口另案大工應將各項工料價值查明奏報繕送清單以憑將用過錢糧核實造冊請銷節經遵照辦理在案伏查此次堵築上南河屬鄭州下汛十堡石家橋漫口大工據鄭工總局司道將前項做過土埽磚石暨挑挖引河各工動用銀兩細數造冊詳請奏送清單前來臣等確切覆查通工做過土埽磚石各工共用銀九百五十一萬三千六百四十五兩九錢四釐挑挖引河各工共用銀一百四十五萬三千三百三十兩三錢二分一釐以上

前後統共工用銀一千九十六萬六千九百七十六兩二錢二分五釐遂款釐剔鉤稽均係實工實用毫無浮糜

光緒十五年十二月河東河道總督吳大澂河南巡撫倪文蔚奏稱查明堵築鄭州大工做過各項工程約核用銀總數土埽磚石各工總共約用銀九百五十一萬三千六百四十五兩九錢四釐引河各工總共約用銀一百四十五萬三千三百三十兩三錢二分一釐二共應歸正案約用銀一千九十六萬六千九百七十六兩二錢二分五釐均係實工實用核實開支並無絲毫浮糜下餘應存銀兩除提辦預修土工榮澤搶險廣武山壩工節次動用外悉數撥歸善後就款辦工能否不出範圍容再隨時陳奏惟查此次辦理鄭州大工工程之浩大時日之久長料土之昂貴實與歷屆情形迥不相同所用物料物廉則比較同治七年榮澤大工每筋用銀一錢今每筋用銀六分節省十分之四而稽則非常之貴榮澤興工每垛不過用銀一百七十兩今每垛貴賤均牽需合銀二百七十兩比較榮澤大工加費不及十分之四蓋因開廠伊始每垛料價雖祇用百餘兩而附近之料稀少一經收買即已蕪束全無十三年十二月間本工採購每垛價值已放至三百餘兩山

東遠料來工每垛合銀五百兩曾經前署河臣李鶴年奏明有案迨至次年四五月間搜羅至千里內外之料每垛放價竟至六百兩之多實爲從前大工所罕有上年秋間臣大澂蒞任後適值新料稍有刈獲極力收縮每垛仍需銀二百餘兩所以前後通扯每垛確核銀二百七十兩此外穀草每束銀五釐四毫纏每套銀二分七釐纜每條銀二分二釐五毫核與例價相符惟椿木每根腳價銀八錢二分五釐至二兩二分五釐土工每方價銀四錢至五錢六分拾挑引河頭每方合銀七錢雖比榮澤大工價值略有加增實緣工作繁要人夫飯食過昂勢不能不優給價值俾資果腹而免渙散誤工

光緒十五年十二月河東河道總督吳大澂河南巡撫倪文蔚片奏稱再查鄭工堵合案內先後收到部庫暨由部指撥各省關協解來工銀一千萬兩內除湖北應解廣西轉撥河工一欸係屬湘平折合庫平計短銀四百九十九兩一錢九分又奉天協解到工一欸係屬藩平折合庫平計短銀七百六十三兩四錢三分除短平外淨計收到撥欸銀九百九十九萬八千七百三十七兩三錢八分又兩次收到由津息借商欸銀二百萬兩內除一百萬兩係屬行平折合庫平計短銀三萬一千一百九十五兩五錢五釐除短平外計

收到借款銀一百九十六萬八千八百四兩四錢九分五釐二共淨計收銀一千一百九十六萬七千五百四十一兩八錢七分五釐再加安徽省協濟料價銀一千兩制錢五千串一四合銀三千五百七十一兩四錢二分八釐各員報捐工款銀三萬七千兩連前線共實收到工銀一千二百萬九千一百十三兩三錢三釐每百兩應再申出市平銀二兩歸入正款作收計共應申市平銀二十四萬一百八十二兩二錢六分六釐統共應歸正款作收銀一千二百二十四萬九千二百九十五兩五錢六分九釐內除堵築漫口大工做過土埽磚石以及挑挖引河各工計歸正案用銀一千九十六萬六千九百七十六兩二錢二分五釐提辦預修土工用銀十五萬兩專案搶辦漿澤汛險工用銀十三萬五千五十一兩九錢修築廣武山黃門嘴壩工用銀八萬四千九百八十五兩三錢三分六釐撥給接辦電線工程用銀二萬兩計尙應存銀八十九萬二千二百八十二兩一錢八釐現在悉數撥作辦理各廳善後工程採買塞門德土添築各廳磚石壩工歸還訂購鐵路電燈價值運腳保險以上通盤確切計算尙不敷用而爲數不至甚鉅應請俟善後用款一併截清後即在開歸河北二道徵收河銀項下通融挹注以資找發清款理合聲明

光緒十六年二月戶部咨爲附奏事河南司案呈內閣抄出河東河道總督吳奏查明鄭工堵河案內收支銀欸數目一片光緒十五年十二月二十八日奉硃批該部知道欽此欽遵抄出到部相應恭錄硃批移咨河東河道總督遵照至原奏內收欸項下部庫及各省關並兩次息借商欸安徽省協濟銀兩制錢合銀各員報捐工欸除短平外共收庫平銀一千二百萬九千一百十三兩三錢三釐每百兩應申出市平銀二兩歸入正欸作收共市平銀二十四萬一百八十二兩二錢六分六釐統共應歸正欸作收銀一千二百二十四萬九千二百九十五兩五錢六分九釐本部查前項鄭工收到各欸核與原撥報收數目均尙相符至應申市平銀兩前據河督附奏鄭工需用員弁吏役薪工紙張等項雜用援案請扣經費將例扣減平一項免扣經本部議覆准其在於支發工欸項下照案每用銀一兩統扣銀五分四釐俾作經費此項提扣經費銀兩合計爲數甚鉅工竣之後應將扣過經費餘存銀數提歸正項另行開單奏報至例扣減平准其免扣惟查平工案內支發工需每銀百兩均扣市平銀二兩歸入正項作支並將收支工料銀數日期隨時報部奏准行知在案今該督將應扣市平銀兩照案申入正項作收所有扣支五四經費銀

兩未據奏報應令河東河道總督轉飭趕緊詳細查明開單奏報又支款項下堵築漫口大工做過土埽磚石挑挖引河各工用銀一千九十六萬六千九百七十六兩二錢二分五釐查此款應俟工部核覆准銷後再行查核又提辦預修土工用銀十五萬兩專案搶辦榮澤汛險工用銀十三萬五千五十一兩九錢修築廣武山壩工用銀八萬四千九百八十五兩三錢六釐撥給接辦電線工程用銀二萬兩查撥給電線一款係電商借用五年攤還之款已歸另案辦理至提辦預修土工係十四年黃河工程確核數內動用之款搶辦榮澤汛險工修築廣武山壩工應俟該督題銷工部核准後再行核辦惟廣武山壩工銀數核與該督前奏確核動用銀八萬七千九百二十餘兩之數不符併令該督查明聲覆又存款項下計尙應存銀八十九萬二千二百八十二兩一錢八釐據稱現在息數撥作辦理各廳善後工程採買塞門德土添築各廳磚石壩工程歸還鐵路電燈價值運脚保險以上通盤確切計算尙不敷用而爲數不至甚鉅請俟善後用款截清後即在開歸河北二道徵收河銀項下通融挹注找發清款等語本部核算支存款內比新收少開銀三分併令查明聲覆再查上年十一月間本部會議河督請留兩道河銀添辦磚石接

續加拋案內准將己丑年兩道河銀留歸工用此後不得再留河銀行知該督在案所有兩道河銀一欸仍令該督遵照奏案辦理至善後工用採買塞門德土鐵路電燈二項動用銀兩數目前據奏咨報部二共用銀七萬數千兩其餘添築各廳磚石等項數目未據該督將收支工料銀數日期隨時報部併令該河督轉飭遵照光緒十三年十月間本部奏案趕緊報部查核可也

光緒十六年二月兼署河督倪文蔚奏廣武山黃門嘴山根柴苴大石壩常年修防應須購備碎石加拋填墊壩餒殘缺每年飭撥經費銀五千兩專作廣武山壩工歲修之用

光緒十六年三月工部片奏稱再閏二月十三日內閣抄出兼署河督河南撫臣倪文蔚奏稱接管卷內據鄭工善後局司道稟稱前河臣試用塞門德土先在旅順借撥三千桶復購三千六百桶計連水旱脚價銀九萬二千二百餘兩但灌用塞門德土係屬創辦河工并無成案可循應請另册開報又鄭工善後應用料麻土方各價尙多居奇勢不能以常年例價責之工員承辦援案量予加增計稽每觔發銀三釐二毫麻每觔發銀三分六釐土工分別水旱每方發銀五錢至六錢五分不等先行奏明等因一片

光緒十六年閏二月初十日奏硃批該部議奏欽此欽遵到部臣等查外洋塞門德土歷辦河工從未購用例所不載無案可循今鄭工拋築磚石壩塚灌用塞們德土所需腳價本應同壩工一併報銷以便稽考惟此項塞們德土係仿灌漿之法應用該署河督原片所稱不能按方勻銷洵屬實在情形臣等公同商酌擬請如所奏另冊開報應令該河督轉飭詳細造冊送部核銷毋稍含混此次試用塞們德土是否確有明效尙難逆觀如行用不能經久不得率行購用致河工增一鉅費至請將鄭工善後各工需用稽蔴土方各價量予加增一節雖係援案辦理第查同治八年榮工善後稽料每觔發銀二釐六毫今請將鄭工善後應用稽料每觔發銀三釐二毫較之成案每觔增銀六毫以垛計之每垛合增銀三十兩綜計所費爲數不少似此逐漸增加未免太無限制臣部礙難議准除蔴土價值核與成案尙無浮多應如所奏辦理

光緒十六年五月工部奏稱四月初二日內閣抄出兼署河東河道總督倪文蔚奏稱豫省黃河南岸上南河廳屬鄭州下汛十堡河工光緒十四年十二月二十日奏報合龍所有做過各項工程段落丈尺約核用銀總數以及詳細清單業經先後奏報在案茲據鄭

州善後總局司道將前項各工用款核實造具細數清冊詳請核明奏銷前來查堵築口門做過土埽磚石各工總共應銷銀九百五十一萬三千六百四十五兩九錢四釐挑挖引河各工總共應銷銀一百四十五萬三千三百三十兩三錢二分一釐統共應請銷銀一千九十六萬六千九百七十六兩二錢二分五釐逐款確切勾稽詳細覆核均與原奏清單計數相符委係實工實用毫無浮冒等情一摺奉硃批該部議奏欽此四月二十九日冊圖咨送到部臣等督飭司員詳加綜核查冊開殺草纓纜樁木磚石夫價七款共請銷銀五十一萬五千六百七十二兩三錢一分悉與例價相符營麻土方兩款比例價稍有浮多較榮工成案 麻計尙少銀六十三萬五百十二兩四錢七分土方夾土壩搶挑引河攔黃壩三項計多銀二萬二千二百四十二兩四錢六分八釐五毫壩基引河兩項計尙少銀三十一萬二千九百五十兩零二錢五分三釐二毫以上各款雖較例案互有贏縮尙不致大相逕庭惟稽料一項較例價爲數既懸核與榮工成案計尙多銀二百六十四萬五千零七兩三錢六分一釐二毫查此項物料節經該河督奏稱開廠伊始每垛合銀百餘兩十三年十二月放至三百餘兩山東遠料每垛合銀五百兩次年四五月間

每垛放至六百兩現在前後通扯每垛合銀二百七十兩等語是當時籌料情形均經奏明有案應否一併准銷之處伏候聖裁臣等未敢擅便再查歷屆大工例應銷六賠四此項工程仍應照例辦理

光緒十六年九月戶部奏稱河東河道總督許振傑奏查革河南河工積弊改章設局保險節費一摺光緒十六年八月二十二日奉硃批著照所請該部知道欽此欽遵由內閣抄出到部據原奏內稱河工重在保險先保險而後減費人所共知豫省河工欸項名目糾紛有所謂額欸者有所謂奏添節省防險者有所謂另案磚工埽工土工石工者約計每年報銷六十餘萬司庫或遲之又久而撥給有事不爲先時之備無事可使中飽之私今擬改定章每年請欸卽以六十萬兩爲率尋常搶險不必加添將各種名目概行不用特定名曰歲修額欸六十萬兩內四十八萬歸七廳赴司分四次支領另提十二萬設一河防局由委員赴司領取總求涓滴歸工如復有弊該河臣願獨承其罪並稱給事中張廷燎奏河南河工積弊宜革請酌提一成爲各衙門辦公之需查河南督撫兩道七廳共十一衙門自幕友委員差官至胥吏外工走卒月領口糧者不下數千人計非七萬五千

金不敷請以此垂爲定額等語臣等伏查豫省河工同治二年間前河臣譚廷襄奏定歲修款目不過二十萬兩未幾而歲修之外復請加增添撥每年多寡無定自光緒十年欽差孫毓汶烏拉布查辦河工奏明節省以後每年歲修及添撥銀兩或四十餘萬或五十餘萬極多者方至六十萬今該河臣請以六十萬定爲歲修額數較近年用過數目並未裁減且有加增在該河臣統籌全局重在保險掃除積弊獨任其難業經奉旨允准臣等自應欽遵辦理原奏聲稱尋常搶險不必添撥各種名目概行不用改定河工歲修六十萬兩一切布置當已裕如自不得再有加添之款其公費銀七萬五千兩即由六十萬額款內支給該河臣每年既有此的款搶險各工自當益加穩固此後隨時有可減省之處亦應據實奏明以節經費並請飭下河東河道總督慎選廉介之廳員力杜折扣之陋習於歲額既不能議減則保險必責有攸歸毋恃改章轉生他弊是爲至要奉諭著依議行

光緒十六年九月護理河南巡撫廖壽豐奏河內武陟二縣沁河歲修各款銀一萬二千兩發交紳董具領每年十月先發五千兩採辦磚石正雜等料預爲儲備次年正二月間發銀四千兩以備春鑲築隄並添購物料雇募夫工餘銀三千兩四五月間撥發以備伏

秋防汛等用有餘留次年備用不足設法籌墊定爲歲額免造冊報銷

詳見工
程門

光緒十六年十一月工部奏稱內閣抄出河東河道總督許振禕奏稱鄭州合龍後增培土工廂做護埽用銀總數經前署河臣倪文蔚於本年三月奏報在案茲將做過善後各工據詳請奏前來臣等確切覆查通共做過土埽各工共用銀五十一萬五百六兩四錢八分八釐上南中河下南祥河下北五聽新建磚石壩工共用銀四十四萬七千四百四兩三錢三分七釐逐款勾稽均係實工實用毫無浮糜除飭造冊另摺奏銷外查前准工部咨令將料價悉心刪減行據鄭工善後局司道詳稱善後所用稽料委係實用實銷無可再減惟有仰懇恩施飭部照准理合繕單會同護河南撫臣廖壽豐恭摺具陳等因光緒十六年九月十七日奉硃批工部議奏單併發欽此欽遵到部臣等查鄭州辦理善後各工曾經前兼署河臣倪文蔚將用銀總數奏報在案今單開做過土工二十四段補廂護埽三十段托壩二道共用銀五十一萬五百六兩有奇拋築磚石壩埽十九道共用銀四十四萬七千四百四兩有奇查前項工程動用土方彙核兩款核與奏定價值相符磚石夫工三款亦與例價符合惟稽料一項先經前兼署河臣倪文蔚奏請每劬發銀

三釐二毫當經臣部以同治八年榮工成案每觔發銀二釐六毫已較例價浮多此次鄭工善後稽價比較榮工又復加增綜計爲數甚鉅是以奏令刪減今查單開所用稽料比較榮工成案核計加銀四萬七千四百七十餘兩雖據河臣許振禕奏稱委係實用實銷無可再減惟與例價成案均有未符臣部未敢率准相應請旨飭下該河督仍當悉心刪減以重帑項

光緒十六年十二月河南布政使司廖壽豐開歸陳許道蔭保南汝光道朱壽鏞詳稱本年十二月十一日蒙札開光緒十六年十二月初四日准河南撫部院裕咨光緒十六年十一月二十四日准工部咨都水司案呈本部議覆東河督奏鄭工善後做過土埽各工銀數開單具奏一摺光緒十六年十一月初七日具奏本日奉旨依議欽此相應抄錄原奏恭錄諭旨行文河南巡撫欽遵查照可也計粘連原奏一紙等因到本部院准此相應咨會請煩轉飭查照辦理施行等因到本部堂准此除行藩司遵照辦理外行道官吏查照事理即便遵照會同藩司朱道馮守等妥速查明核議具覆以憑核辦計結單一紙等因蒙此遵查工部議駁摺內聲明所用稽料比較榮工核計加銀四萬七千四百七十餘

兩與例價成案均有未符仍令悉心刪減緣由伏查鄭工甫竣新工綿延六百五十九丈北臨大河南靠深潭柴土尙未凝堅形勢岌岌可慮善後工程必須撒手趕辦儻彼時稍一遲延新工設有不測關係匪輕不得已遂定每垛放價至一百六十兩前蒙憲台一再駁斥行令核減業將辦料棘手緣由迭次稟明在案茲奉部議引榮工善後爲斷竊查榮工漫口二百丈有零大工用料四千九百餘垛善後用料僅五百餘垛鄭工漫口五百四十丈大工用料二萬八千餘垛善後用料一千五百餘垛丈尺料數大相逕庭當此次善後採料之時承大工昂貴之後附近之料早經萃束無遺又與各廳歲料同時並購取多用宏則料販居爲奇貨求之遠道則運費無不加多此今昔不同之實在情形也查歷稽成案善後料價無不隨本屆大工爲低昂榮澤大工料價銷銀一百六十兩善後銷銀一百三十兩所減不足二成鄭州大工料價銷銀二百七十兩善後請銷一百六十兩計所減已在四成以外實已竭力撙節並未稍涉浮糜本司道往覆函商惟有仰懇俯念鄭工善後工艱料貴與榮工善後情形迥異奏請仍照前冊如數准銷實爲公便

光緒十六年護理河南巡撫廖壽豐奏於孟縣新莊下首起至小金隄西頭大王廟東止

拋築石壩四道石梁六箇大王廟西建築攔河埝一道並培修接築隄工銀八萬九千兩
光緒十七年四月河東河道總督許振祿奏稱竊查豫省黃河南北兩岸伏秋大汛遇有
搶辦工程向於司庫撥銀應用歷經前河臣撫臣於嘉慶十年及二十一年議請每年先
在地丁項下提銀三十萬兩以備搶險之需俟將次用完再行體察情形預爲籌計尙應
添撥若干一面會核專奏一面行司提取備用道庫如有墊欠敷不於霜後奏撥還欸久
經遵辦在案伏查黃河歲修經費除撥用歲料例價歲蘇加價並司庫例儲搶險銀三十
萬兩外尙有奏請防料磚石及添備秋汛防險等項設在不敷墊用准於奏送清單後另
請找撥清欸迨咸豐五年蘭陽三堡銅瓦廂失事下游乾河各廳工程停辦而上游雖止
七廳工段修防仍關緊要祇以庫欸支絀搭放鈔票辦公倍形竭蹶同治二年前河臣譚
廷襄籌議減工節省停鈔用銀請將添撥防料磚石秋汛防險等欸概行停止各廳每年
尋常修守奏定由司准撥銀二十萬兩有奇其兩道額徵河銀仍准歸搶修案內提用若
遇異常險工方准專摺奏提歷年節省防險銀兩辦理洎光緒十年經欽派大臣議減工
欸奏請自乙酉年爲始將司撥額欸二十萬兩南岸酌減一成北岸酌減二成計准減工

欵祇撥十七萬兩有零而兩道徵收河銀不准動用按年解司報部餘仍循照舊章奏蒙
俞允欵遵飭辦各在案茲查光緒十六年分豫省上游七廳另搶掃磚土石各工已將動
支銀數核明共用銀六十二萬二千一百四十六兩八錢五分二釐內動用光緒十五年
存工石值銀五百五十七兩七錢五分九釐又存工稽值銀六千二十兩又存工磚值銀
一百三十三兩六錢七分又用十三年祥河廳存石值銀八十兩三錢八分三釐又祥河
下北兩廳存磚值銀一百二十兩六錢二分四釐奏撥辦料銀六萬五千兩歲蔴加價銀
二萬六千六十四兩又撥用司庫春伏二汛防險銀八萬三千六百四十八兩二錢五分
又奏提節省防險銀四十四萬五千兩以上統共合銀六十二萬六千六百一十四兩六
錢八分六釐現除南北兩岸上游各廳存石值銀五百九十一兩五錢三分七釐存稽值
銀二千二百四十兩存磚值銀一百八十八兩七錢三分四釐留工備用再除彌補已丑
年工用不敷銀一千八百五十六兩三錢六分六釐又除墊發專案採辦南岸三廳碎石
不敷銀三百七十九兩六錢計本年工用不敷銀七百八十八兩四錢三釐內除南岸三
廳墾葦草刀工共用銀五百六十二兩五錢七分一釐係在河銀項下支發外計不敷銀

二百二十五兩八錢三分二釐已由該道捐廉彌補統計連十三年留工磚石並十五年留工料物在內共用銀六十二萬二千一百四十六兩八錢五分二釐撥支銀數相符核計提用司庫並奏添節省防險銀四十四萬五千兩實用司撥銀十七萬四千七百十二兩二錢五分再除存工未用石碇磚共銀三千二十兩二錢七分一釐計實用司撥銀十七萬一千六百九十一兩九錢七分九釐較之奏定章程有減無增

光緒十七年五月河南巡撫裕寬奏孟縣黃河添築磨盤石壩挑溜護壩銀三萬兩

光緒十七年十二月河東河道總督許振祿奏稱竊維黃河歲修之費本國家一大漏卮從來有日增無日減即今歲稍減來歲必復加增以爲險工無定朝廷以其關係民生而不惜帑項部臣以其尙合例案而不事苛求故積弊日深馴至耗費益繁辦工益絀此臣所以亟議改革也原改革之意臣實欲收其權而任其責向之可委過於道廳營汛者今則臣獨任之若有疏虞臣將何所逃罪然而不敢避也臣不甚知治體請以家事例之如人家有大興作主計畫者自必以省費爲先以圖成爲要又凡能省費者必易圖成何也將爲一定之工必籌一定之費先事詳思臨事竭力其所省者耗費非正費也耗費一省

工用歸實故易圖成夫黃河天險臣豈不知責備至重臣豈不畏而必限定額欵力求保固者誠亦審度河勢稽核工程以爲如此則辦工不致竭蹶可以從先事而爲補苴遇險有所取資不敢作危詞以瀆聖聽以臣默計所定六十萬之欵其實每歲所必不可省者四十八萬耳至提歸河防局之十二萬今年霜清時實餘出六萬兩臣盡以買石加拋至於來年必更得力此十二萬兩滑滴到工即臣前奏所謂新增之補益也向年用欵亦有此數未聞於歲修之外復有片石寸土到工則今此十二萬兩堆積料石衆目共覩遇險不至張皇辦公有所取給名非節省而實則由節省而出也大約如此補益五六年後每年復可節省五六萬兩不等但須悉如今此辦事積久自可有餘又河工每當大汛不能無險險亦不定生於何處然未有先事而不見萌兆者臣旣以核實工作責之廳員營汛復於河干另設一監工局終年駐得力委員於其中巡視兩岸遂處勘估以數萬金爲先時之籌備復留數萬金爲臨險之搶救似乎有險亦無他虞又河工往年報銷院道庫儲任之凡冊籍由廳呈道由道呈院由院奏咨部臣不甚議駁以其悉合則例庫儲之所以挾制上官者在此其所以作弊取利者亦在此究竟所報悉是虛假但求合例不復核實

計每年報銷開支用欸二萬數千兩臣去歲改章亦經官吏力以公用爲言提存二萬兩所以暫爲提存者實欲省出此二萬兩再歸入防河工用耳夫臣既不用庫儲一切改易舊轍事事核實則與往年大不相侔即按之工部舊例誠恐亦稍不合仰蒙天恩憐臣之拙信臣之愚臣敢據實報銷不爲劣員劣募挾制而於公家用欸實多益出二萬兩是河防局明定十二萬兩今則添爲十四萬兩以之搶補險工豈非大益此等有裨實用想部臣素識大體維持圖計亦必不以臣言爲謬抑臣更有請者向來河督不任修防瑣務故報銷由廳詳道由道加印今則各處工作皆由臣主持緣是遇險先搶往往先辦工而後行文此後報銷擬請專歸臣衙門用印辦理不由道廳轉折既可省費亦易核實惟向例霜清以後全工就閒今則河防局正在委員四出購石買土監工局正在監理各廳廂掃添壩工作正忙用數未定若如往年循例報銷反蹈懸空欺飾之咎必俟年終工役完固石料用定先查細賬次驗工程再爲核實報銷年內時日無幾萬趕不及歷經奏展有案合無仰懇天恩俯如所請展限至來年三四月開再爲辦理以臻周妥並請此後無論何項送部冊結圖幅就用臣關防印信以省糾纏而歸核實奉硃批著照所請該部知道

光緒十七年十二月河東河道總督許振禕片奏稱再臣前將河防改章試辦大致就緒現擬核實報銷援案展限繕摺具奏後茲查黃河各應每年估辦搶修埽工例係動支兩道額徵河銀發辦同治二年經前河臣譚廷襄籌議黃河減工節費章程請變通舊案改用現銀摺內奏明在案嗣後搶修用銀本有定額并不具奏按刷墊加席埽段原舊丈尺造報將工名段落隨時奏明未經奏明者不准報銷並將用銀數目一律歸入比較覆因黃河搶修工程向係十月咨估來年四月報銷並不具奏工段既經隨時奏明所用銀數列入比較則加廂高深必須列入清單照另案埽工分別題估報銷其搶修工段册仍照常例咨部各等因先後陳奏歷經遵照各在案嗣於光緒十年欽差查減工欸案內將兩道徵收河銀不准動用按年解司報部奏蒙俞允欽遵飭辦亦在案所以近年各應搶修工程均在另案項下通融發辦而本年搶修工程既無欸支發自應停辦其照例咨部工段册亦應停止上年臣因遵旨查革河工積弊摺內奏將額欸奏添節省防險另案各積名目概行不用擬定歲修額欸六十萬兩本年業已照辦工欸名目既經議改所有從前奏報另案搶修工名段落土方價銀數各案應請一概免造以符案欸照歲修磚埽工加

廂補廂拋護碎石增培土工等款目奏送清單以歸畫一毋庸照另案搶修舊案辦理

光緒十八年河東河道總督許振禕奏稱竊臣前於十六年八月奏定黃河兩岸歲修額款以四十八萬兩概歸七廳赴司支領辦工而另提十二萬兩設立河防局委員監辦據實開單報銷仰蒙恩准欽遵試辦在案行之一年大致就緒而河流仍在中泓此皆仰託聖主洪福百靈效順臣暨在工員弁幸免愆尤無任感戴緣微臣改辦初意實以四十八萬兩爲保常以十二萬兩爲防變論各廳員承辦常工僅限四十八萬似乎竭蹶然非提出此十二萬兩實不足爲防變之資臣知河防關係鄭重而國家帑項亦甚艱難故應極爲愛惜撙節使其涓滴到工以爲先事培補今自改辦以來各道廳咸能兢兢守法料堦多積而觔兩加增埽段多廂而工用歸實已將前弊悉除至河防局則遵照定章不令一錢入門領款即逕送工次或交委員即帶銀上山買石所有另設監工局者不過免其河干露宿有屋棲止得以朝夕相視河流而籌拋石加埽而已至動用夫工銀錢令其將價值實用細數隨時揭示張貼蓋人言可畏不如是則難保無造言生事之人亦難保無失算浪費之事有此上下交核弊何從生茲皆尙能勤慎趨公足以仰紓宸厪臣維從古治

河實無良策若使定一規條可以一勞永逸不復有危險之驚及年年節省不至撥鉅款之用則自聖朝垂統二百數十年以來未曾及此而謂臣之庸陋驚鈍敢以是欺飾於君父乎當改章時約有二說其一因裁革浮冒太多衆怨所叢設詞誣毀以爲專擅自用必至潰裂此爲妄圖報復不足計較其一謂河工險變無定何得遽定額款敢任責成恐爲鹵莽之大言未有可憑之實據此爲關切時局尙非泛言然微臣實感激恩隆思圖報於萬一若謂以專擅而甘履危險不顧大咎臣雖至愚亦不出此至謂實心實力實工實用亦遂擲付東流於河務毫無所益者臣亦未敢信也臣總以恪遵聖訓先事預防爲務故不得不愛惜此十二萬兩以爲補偏救弊之用請縷晰言之夫河流遷徙無定南岸告警則北岸必鬆推之北岸亦然又推之大江支河亦然凡南岸傾塌則北岸必生沙洲未有能使兩岸無事者此從古如斯也去歲河歸中流臣飭工員加拋榮澤大壩力與水爭始能挑溜遠去遂歸中泓然究竟不敢過挑若過挑則北岸又生大險矣又南北兩岸尙多有將來可畏而必生之險此時不敢動工者蓋平時淺水廂埽築壩一經大溜頃刻即行漂散必待大溜冲散庶可將石料相爭盤壓到底故雖有石料亦不能先期動工也又若

大溜正冲而始報險請款買石購料則往返非月餘不辦其水之淘深已不下十數丈矣
擋柱甚難耗費數倍故不得不於平時而籌存石料也凡河防局監工局之設皆以爲此
也款不入局則無可侵蝕之地石論筋兩則無可爲侵蝕之物臣之所以敢任責成上對
聖明者在此定計每年有險則用此保工有餘則概以買石愚拙之見亦能如此而已今
據河防局呈據承辦監工委員等造具報銷冊詳請奏咨前來查上南河廳屬鄭中汛修
築楊橋順河長埧土工二段共長四百八十三丈共用銀四千九百九十七兩三錢七分
六釐鄭州下汛十七堡下首廂做護埧八段共長八十一丈共用料物夫工銀二萬六千
九百六十四兩七錢二分榮澤大壩九堡並十一堡拋護石埧二道共長十四丈一尺共
用石三千九百九十三方七分共用石方銀二萬七千九百三十九兩九錢二分五釐以
上上南河廳屬歲修土埧石共三案統共用銀五萬九千九百二兩二分一釐覆加查核
俱係實工實用亦與原報數目相符又臣於霜降安瀾摺內曾奏請上南中河下南下北
祥河五廳各有廳行添護壩埧估計需採購山石一萬方交候補通判黃履中承辦當時
衛糧報工之稟未到而石方運送遠近之費亦未核定是以僅撥銀五萬數千兩比飭先

行購石以免冬乾水涸運送維艱旋奉諭旨著分飭該道廳等認真防護並令派出之員將上南廳廳行採購石方添築壩埭工程限年內一律辦竣毋稍疏懈等因轉行欽遵在案茲據採購石方委員黃履中稟報迅即赴山開採陸續起運計運到上南中河下南衛糧祥河下北六廳共堆成碎石九千九百三十餘方均點交監工委員並各該廳驗收所有不敷銀兩即由臣在四十八萬內提出二萬兩以清石價訖經監工委員在兩岸各工緊要處所相度機宜分別逐工監拋據各該廳查明造具印冊稟送前來查上南廳屬鄭州上汛頭堡桃園將軍廟迤上拋護石壩一道共長九丈共用石三千五百十三方二分共銀二萬四千八百五十八兩一錢七分七釐中河廳中牟下汛五堡拋護石壩一道共長八丈二尺共用石二千七百八十八方共銀二萬二千一十四兩四分八釐下南廳祥符上汛二十二堡舊二壩迤上拋護石壩一道共長六丈四尺六寸共用石一千四十三方二分九釐共銀八千八百六十三兩七錢九分二釐衛糧廳陽武汛十七堡同石壩尾土壩頭拋護石埭一段共長五尺共用石二百九十七方共銀二千二百一十一兩四錢六分一釐祥河廳祥符上汛十五堡魚鱗壩迤下空擋拋築石壩一道共長七丈六尺共用

石一千二百十六方共銀一萬一千四百二十五兩五錢三分六釐下北廳祥符下汛二堡逸下順隄拋護石壩一道共長五丈一尺共用石九百九十四方五分共銀九千九百四十一兩二分二釐以上六廳拋辦碎石工段共六案計山價歸濟源鞏縣兩地分採不同其運送各廳遠近船費不同至冬杪水涸另換剝船亦頗加費共用石方銀七萬九千三百一十四兩四分七釐覆加查核俱係實工實用均與原報銀數相符

一

二

三

四

五

六

七

八

九

十

豫河志卷十九 經費六

光緒十八年四月河東河道總督許振偉奏稱竊臣於三月十二日准工部咨具奏東河修防事宜請防流弊一摺並抄錄原奏恭錄諭旨等因咨行到臣伏查原奏稱今年實餘六萬兩來年即可少撥六萬兩不得以歲請額欸爲定數此誠慎重帑項之至意也但部臣主於惜費亦必不忘防險微臣則主於防險其實兼寓惜費臣改革一摺請歲額六十六萬兩爲數本不寬餘並聲明尋常小險不另請欸以臣之愚所以敢任此艱鉅者總以整躬率屬實心實力實用實銷使先事豫防四時有不斷之工作以收曲突徙薪之效去歲試辦之初仰賴聖主鴻福河流順軌爲邇年所僅見故臣得以節省欸項儘數購石加拋河工積疲已久譬之元氣虛弱之人非漸次培修難資捍禦鑲埽爲一時之計石工爲不朽之基用一錢必有一錢之益而其費先雖較埽工爲特多後實較埽工爲特省惟兩岸應辦之工實屬不少若欲同時並舉不但臣不敢請此鉅欸且有必待河溜逼射方可拋石築壩者故非一時所能辦成亦非一時所能盡省也惟冀事機順手逐年節省逐年擴充將來石壩愈多鑲埽自少增卑培薄永固金隄此卽臣培養元氣之說也亦卽臣節省

經費之策也河流善變自古已然設遇三汛盛漲疊出險工則河防局十二萬兩竭力支持已屬不易若復核減額款臣又安能赤手空拳爲未雨綢繆之計乎設以工款拮据致生意外之虞臣之獲咎固不足惜其如下游數百萬之生靈何此額款萬不可核減之實在情形也原奏又稱河工向有分賠之例應將河防局辦工委員銜名隨時咨部此亦綜核名實之至計也臣竊以銜名之報與否與分賠之例殊不相妨臣所轄黃運兩河文武廳汛升遷調補向無隨時咨報工部之事河防局及監工委員事同一律臣署委札昭然設使咎干分賠一經查取職名斷不能幸逃法網此又銜名之無庸隨時咨部乞部臣稍爲寬假以歸簡易者也總之部臣之意重在守法故於法密之又密而惟恐其疏微臣之意重在任人故於工慎之又慎而必求其穩與其牽義拘文貽誤於事後不若竭誠據實瀝陳於事前臣與部臣慎工惜費之意大概相同雖目前稍有變通而其相與維持防河大局則一也硃批著照所請工部知道欽此

光緒十八年十月河東河道總督許振禕片奏稱再現准工部咨覈覆豫省河防局十七年承辦工料銀數又嗣後工需請歸入比較各摺片恭錄諭旨咨行欽遵查照前來查光

緒十六年改章原奏歲額六十萬兩以四十八萬歸各廳員承辦另提十二萬兩歸河防局籌添料石先事豫防由臣主之原請開單報銷在案今工部責令分案題銷並繪具圖說取具印委切結一併送部查核此爲慎重公欸起見在部臣主於守法援引舊例施之於尋常歲辦之工自屬可行而於臣今日所提十二萬之數則似有未明其意者請敬陳之臣愚以爲河工天險特法不如用人如以特法論則從來所辦報銷例案工部知之河工亦知之故自每年添欸及鄭工報銷之千數百萬未聞其不合例也如以用人論則臣近年來改章從事比年大險橫生亦均次第搶補幸奏安瀾至添料添石固有不盡合例者矣臣於四十八萬之報銷則悉照部章至另提十二萬兩則必開單者此誠有實在情形不敢一字欺飾也原臣設立河防局初意厥有二端一則恐廳員之遇險推諉藉口無錢無料故提此鉅欸爲先事豫防之資一則恐廳員之不實不盡故添委官紳爲臨時匡救之用而限此十二萬兩祇准纖悉到工不准絲毫入局並不准於此間支薪水此河南官紳吏民罔不知之即如今歲之得保鉅險就買石一欸已用過十一萬數千餘兩其餘則補鄭工金門沉裂之隄總計不過兩事此不能分案題銷者也又多方買石隨處搶堵

險未平則必加拋險已過則即停止此不能繪圖貼說者也且以所用各員而論凡不諳
修守精神稍懈之員隨時斥去至所用本地各紳其身家性命皆在隄下稍不盡心禍且
先及故雖有河防監工名目實則扶助廳員之所不及河防者防各處之險監工者監各
處之工人不一處事無定所板蓬遷轉日在風沙泥水之中既無呆辦之工即不復頒給
印信又此款十分之九皆付買石責臣可矣於委員監工者無與此不能取具印委切結
者也臣愚陋無知只能據實辦理可否籲懇天恩憫臣才短心誠不以文義相難俯准仍
照改章原奏河防局十二萬兩歸入據實開單報銷辦理敕部少從寬假之處出自高厚
鴻慈河工幸甚大局幸甚十七年河防局報銷已仿照奏銷成案隨摺另送銷冊咨送部
科在案核與具題隨疏揭送部科冊結無異再每年河防局工需請歸入比較一層自廳
即照部咨辦理合併聲明奉硃批著照所請該部知道

光緒二十年六月河東河道總督許振璋片奏稱再從前黃河一交大汛即迭報險每以
請添款項爲言而各廳所存料物實皆寥寥無幾不足以供修防細推其弊均由層層剝
削所致故臣奏定新章以四十八萬兩歸廳員自赴司庫支領責成各廳工員承辦歲修

諸事核實雖大險不准請添以十二萬兩歸入河防局承領責成監工委員專辦碎石補偏救弊雖局用不准開支行之數年所存料石遂處堆積終年做工故終年無險人人自稱爲寬綽有餘也惟臣此舉甚不便於劣幕蠹吏而於兩道庫官座吏尤屬罷失脂膏目下庫款不入道庫則道庫所收者僅止各縣報解河夫銀一欸而年終即當解司候部提撥因之該書吏復暗行埋伏以爲日久政懈可以乘間冒領故臣於去歲附奏將開歸道庫存記留待彌補之七萬四千兩概行銷除並請勅部立案凡從前河院兩道各應所存檔冊凡有涉往來支發概行銷除凡各衙門所存從前批稟均作爲廢紙在案現在開歸道一律斬斷葛藤而河北道庫復聞暗有存記墊支浮記銀一百萬一千餘兩者此時雖不敢言他日必圖盜竊臣昔曾爲河北道未聞有此且稱爲自光緒十七年起至十九年止歷年臣已來豫何得膽大僞造竟至於此本應嚴辦姑念得自傳聞訪查未有確據且官非一任從寬免行追究今河北道岑春榮到官未久亦請嚴杜積弊臣飭其調查私冊概行焚燬仍遵前旨嚴行禁絕嗣後豫省管河各衙門不得復立前後交代名目亦不得捏飾從前墊發名目如敢乘便圖利無論何年竊發即當從嚴參處

光緒二十一年奏添築澤縣廣武山柴苾大壩及搶護民堰埽工添築壩埽歲修銀一千兩

光緒二十三年奏蘭儀縣境老河身內築做攔黃土壩拋護磚石銀二萬六千五百兩四錢五分三釐土方例價銀二錢一分六釐磚方例價銀六兩石方例價銀十兩二錢九分六釐並自戊戌年爲始每年歲修銀五千兩

光緒二十四年於蘭儀縣黃河南岸攔黃土壩上游薛庵一帶搶拋石埽四箇銀五千兩
光緒二十五年正月直隸總督咨開據長蘆鹽運使萬培因詳稱奉督院札准河南撫院裕咨開據豫省河工歲料幫價一欸專賴各鹽商息銀發辦內兩淮承領本銀五十萬兩長蘆承領本銀四十萬兩山東承領本銀十萬兩按月一分生息遇閏加增其生息銀兩歷年解到無多積欠甚鉅茲委員前往長蘆守提相應咨請查照希即轉飭運司迅將各商欠解新陳生息銀兩勒限嚴追點交委員星馳押解來豫以濟工用等因轉行到司奉此又於同日准河南布政司咨會前因該委員業已到津卷查光緒十一年二月間奉前督院札准戶部咨開議覆河南奏通核豫省司庫出入妥籌解部裕餉銀兩一摺抄錄原

奏咨行遵辦抄單內開蘆商每年實解豫省河工料價生息銀八千兩前因扣還勝營協餉每年祇解銀四千兩該撫聲稱現計扣還僅欠銀一千三百餘兩來年可以扣清擬於前項提出銀四千兩解部存儲一節查此項本係按年該商實解之款今每年專提銀四千兩解部洵爲核實辦法應令直隸總督轉飭該運司自光緒十一年起將前項解豫銀八千兩內提出銀四千兩徑由長蘆按年解部無庸再由豫省收到轉交以省周折等因歷經各前司遵照部議將應解徵起光緒十年至光緒二十二年分豫省料價息銀八千兩內提出四千兩就近由長蘆徑解部庫抵作豫省裕餉之款其餘銀四千兩發交河南委員具領管解赴豫交納在案查蘆商應交此項料價息銀從前原係承領帑本各商完交嗣於道光二十八年欽差王大臣查辦鹽務因原領帑本各商多已參革逃亡款歸無着將每年應徵料價息銀攤歸通綱按引完交自道光二十八年至今均係現商攤捐名實久不相符况歷年以來商情艱窘此項息銀係代遠年叁商攤賠更難照數清交今奉札飭屢經本司嚴行催迫僅徵完光緒二十三年料價息銀八千兩內提出銀四千兩自應遵照上屆成案就近由蘆徑解戶部作爲豫省籌解裕餉之款其餘銀四千兩照數點

交河南委員具領管解赴豫交納應請咨明豫省仍以八千兩作收以清欸目其餘各商未完息銀容俟徵有成數再行續解等情相應咨明

光緒二十五年十一月河南巡撫裕長奏孟縣小金隄被衝卸一百一十丈議隨坦加餉一律補齊並在隄外擇要酌拋石壩三道石垛十二箇在東河河防歲修節省項下撥銀三萬兩興修奉准

光緒二十五年蘭儀縣薛庵一帶續修土石壩垛並加添人字壩加拋舊石工程方價銀一萬五千兩

宣統元年九月河南巡撫吳重熹奏稱竊查豫省黃河工段綿長昔年祥牟榮鄭決口輒糜帑千數百萬始克底績自鄭工以後前河督臣許振禕深悉舊弊掃除更張奏明歲修之欸額定六十萬兩以四十八萬兩歸各廳專辦歲修工程即於該欸內酌提各河署公費以資辦公另設河防局以十二萬兩作為辦石防險之用切實核發嗣前撫臣錫良因新案賠欸數鉅期迫復奏提防河經費十萬兩湊撥應用以四十一萬兩為歲修費各河署公費仍前支給以九萬兩歸河防局辦石並將工款從嚴裁汰歲歲比較歷有節存臣

上年到任後又於八廳歲修及河防局辦石項下節省銀二萬五千餘兩均經撥還藩庫是豫省河工固已事事核實絕無浮冒二十年來歲慶安瀾從未失事未始非許振禕規定經費工歸實際暨歷任河撫臣實力整頓之所致也議者僉謂未定公費以前豫河時有失事自定公費迄今河工安靜者二十年是修守既有把握款項又不虛糜自應率由舊章未便紛更滋弊然當清理財政之際必得剔清欸目針孔相符始足以昭核實而垂久遠查歷年報銷仍遵部章程式與實用之欸多不相符即十一署公費原定七萬五千兩不敷應用盡人皆知且以此項公費及各項用欸悉融銷於辦料之內向未據實造報揆諸事君勿欺之義實有未安臣去年九月抵任後正值部議清理財政之始即欲深究用款與銷案不同之故以定辦法而戊申歲案業已辦定未便議更且非詳查各署各工情形無以悉其底蘊自春徂夏遇事勤求並飭南北兩河道時歷河工悉心稽覈臣復再四考詢始得梗概竊謂清理河工款項必以實報實銷爲第一辦法至所定額欸歷經前河臣節次減發已不敷用惟念國計艱難正臣子效忠之日苟有可裁可減即一絲一粟亦所不遺今擬先從臣署將各項支欺竭力刪減並將全工歲支各款切實酌裁查臣署

除支巡撫養廉銀一萬兩外別無津貼向由河工年支津貼銀一萬二千兩自河督歸併撫臣兼辦後將河督養廉銀裁去添支公費銀一萬八千兩又奏銷幕友修金火食霜酬節禮及文案內委薪水火食暨戈什親兵摺差巡捕稟號書役一切人等共年支銀一萬九千四百餘兩此外別無進欸茲擬於以上各欸內裁去銀一萬二千兩零又藩司署內向由河工年支津貼銀六千兩房庫書吏年支紙筆飯食銀一千二百三十兩今布政司朱壽鏞亦請將此欸悉數裁去至開歸陳許鄭道署支發各欸向較河北道爲多今該署道于滄瀾請裁去銀二千三百四十兩又八廳公所經費及他項雜支每年裁去銀六千七百四十八兩並將向年協助各學堂善堂諸費銀二千五百三十六兩一律裁撤飭由藩司另籌撥濟以上每年共裁減銀三萬八百五十五兩零至八廳公費及應用各款業經迭次核減實無浮濫未便輕減致誤要公經此次切實核減之後如無意外工程約計無閏年分每年河工歲修各欸共需銀三十三萬三千四百九十餘兩以歲領銀四十一萬計之約餘銀七萬六千五百餘兩應請作爲預備金以爲特別搶險之用並各項不時之需其所餘銀兩每年霜清後卽發銀行生息毋庸解歸藩庫以省周折再歷年河工用

餘繳還藩庫銀四十八萬八千七百八十九兩零除奏明動用銀十二萬九千九百五十九兩零外歷年湊撥新案賠款山東河工等項動用銀二十八萬一千四百七兩零截至本年八月底止實存銀七萬七千四百三十一兩零亦請作爲特別預備金仍存司庫以爲有備無患之計至河防局所領之九萬兩爲辦石之用尋常搶險皆恃乎此歷年用款之繁簡視乎險工之多寡殊難預計嗣後當切實核發如有所餘亦發銀行生息歸入預備金內報部立案查河工每年截款向以霜清之月爲止現在瞬屆霜清今年應發各款早經支發未便更張應仍照向章辦理擬自本年十月初一日起悉照此次減定數目核發至每年河工各款報銷擬核開簡明清單奏咨查核免造冊結開說應懇俯念此次清理河工款項係掃除數百年舊習切實核減確定實用之數無有絲毫浮混此後每年報銷請敕下農工商部勿構成案照單准銷俾糾葛一清眞際乃見以仰副朝廷備重河防綜核名實之至意

宣統元年九月河南巡撫吳重熹片奏稱再臣此次清理河工各款始悉成案相沿歷年報部不但所銷與所用不同並所銷之數與所用之數亦不脛合現當整理財政之際自

應破除成例無論何種款項均當和盤托出不得稍有隱匿查河工霜清之後所廂新掃最易見蟄每屆冬令動須加廂其時次年新料尚未辦齊驗收照例不准動用不得不將當年舊料酌留別存以備緩急而免誤工至次年春汛查明如有餘賸即作抵新料將各應應領料價照扣此項扣存之款每因上年霜清業已被數報銷未便再繳司庫即行發商生息留備特別搶險之用歷年存數多寡不等亦有舊料用盡並無餘存者現在統核存款計存商號銀九萬兩又購存鐵路股票汴平銀四千兩申合庫平銀三千九百十三兩零共存庫平銀九萬三千九百十三兩零此所銷之款多於所用之款而歷年積存銀兩未便繳還司庫之實在情形也如此辦理已成河工習慣雖未奏咨有案臣澈底清查並無弊竇且以各應用廢舊料作抵新料照扣應領料價尤爲核實辦法未便更張轉滋流弊應請嗣後仍將此項餘款發商生息一併作爲預備金以爲特別搶險之用惟須按年報部以期眉目益清涓滴有着

宣統元年九月河南巡撫吳重熹片奏稱再河工經費關係帑項固已力加撙節以杜虛糜惟任用人員亦宜察度情形略加體恤以期共奮事功俾收實效查八廳工員雖年支

公費九萬數千兩而所用之款亦甚浩繁如幕友薪修必得從優致送以及熟悉工程之弁丁夫役又必養以厚糈有工之際添派工役偶出險工放價重賞尤無限制凡所開支皆取給於公費之內至料價一項向係各廳包辦每垛三萬五千斤除另給雜料夫工銀二十五兩外准領稽價銀五十五兩不得請益近年火車運麥出境農人種麥者多種秫者少故料價日貴麻葦兩項價亦加增廳員購買時有賠累非量加體恤無以贍其事畜即無以策其事功然因此盡撤範圍准以市價開報恐開冒濫之端應明定辦法如遇料價平和之歲仍照向章辦理儻值料缺價昂應准各廳據實稟請加價每垛仍不得過六十兩之數庶於體恤之中仍示限制之意此項加價銀兩應於豫備金內提用豫河尋常用料每年不過一千垛左右卽照每垛加價五兩亦只需銀五六千兩是增款有限而各工員仰體皇仁必當益圖報稱似於工務不無裨益河工營汛終日奔走河干最爲勞苦一遇出險奮命搶堵直以血肉之軀與水相搏性命在呼吸之間是以部章河工搶險與軍營前敵同膺優保而營汛各員弁所有養廉俸薪爲數甚微實無以資溫飽向於歲修土工項下酌量勻給津貼惟人數較多仍屬不敷贍養且非核實之道自應酌盈劑虛明

定津貼之數以清界限而恤勤勞現飭各廳詳查薪津實在數目妥爲籌議應如何酌加之處俟有成議再行奏咨立案似此略加調劑俾該弁兵等辦公有資無虞竭蹶庶可收羣策羣力之效至河工應用磚石有豫防險工者有臨時搶險者關係均極重要近年以來用石較多山空洞深椎鑿工鉅加之鐵道路工橋工需石尤多價乃翔貴惟燒磚之費較石爲鉅故仍多用石而少用磚然遇工段緊要應用磚石之處仍應分別酌辦未敢惜費誤工惟有嚴飭河防局力求核實並由臣不時遴派廉正之員考求磚石實價如局員稍有浮冒即行據實嚴參以杜效尤而重工款

宣統元年十月河南巡撫吳重熹咨度支部農工商部文開竊照本部院具奏清理河工欸項各摺片內有議加營汛文武員弁津貼一條當卽札飭開歸河北二道會議去後茲據詳稱伏查營汛各員都守等每年養廉俸薪馬乾等項除減折外實領銀不過二百兩協備等每年所領不過百餘兩千把總等每年不過七八十兩分防等兩項則祇二十餘兩俸廉甚微出力爲最文汛廉俸亦祇百兩上下故各廳分給三成土工以爲津貼然聚之則較多分之則見少必須贍其身家然後能用其死力文汛奔走河干同一清苦雖責

在彈壓與奮身作工者稍有區別亦應同邀恩施現考向分土工三成係合一廳文武汛弁員名數分作十成計營官每人二成汛官每人一成額外每人半成仿此變通酌加似爲平允統計豫懷兩河營都司守備協備共八員每員擬加津貼銀八十兩共銀六百四十兩文汛直隸州判以下武汛千總至分防外委等共三十六員每員酌加津貼銀四十兩共銀一千七百二十八兩額外外委二十四名每名加給津貼銀二十兩共銀四百八十兩統計加給營汛津貼每年共需銀二千八百四十八兩至力作兵丁每遇搶險奮不顧身其危險殆難言狀是以搶護喫緊之際隨時由各應優加犒賞卽院道臨工亦時有賞資但所領餉銀戰兵每名每月祇領七成實銀一兩七分有奇守兵每名每月祇領七成實銀七錢六分零爲數過微平日不足以贍其身家而辦工則以性命與水相搏情殊可憫現擬一體酌加津貼用示體恤惟通工共計戰守兵丁一千二百五十六名人數衆多勢難徧及擬專就搶圍力作兵丁酌量加給津貼用資激勵其看守料石巡查隄壩搜捕穽鼠遞送文報及駐守無工各堡兵丁仍應舊章辦理不另加給津貼以示區別而昭平允計應加津貼戰守兵丁共五百九十二名每名給銀四兩每年共需銀二千三百

六十八兩於伏秋大汛辦工之時分作兩次發給並將兵丁姓名發給銀數隨時榜示成使周知其向由廳員發給飯食犒賞仍照舊優給以資其生不得以此影射統計兩岸八廳所屬營汛兵丁每年共需加津貼銀五千二百一十六兩至向分三成土工銀六千六十兩仍照向章提給嗣後八廳土工按照七成銀數實估實辦擬俟奉部覆准之後合所加銀兩妥爲區分垂爲辦公定額該員弁等得此津貼益當動於職守奮力自效實於修防大有裨益等情繕摺會詳前來本部院復查該道等議給營汛員弁兵丁津貼銀兩爲數尙屬無多於體恤用人之中仍寓撙節錢糧之道至辦工兵丁一體加給津貼亦係體恤力作之人鼓勵修守起見自應照准此項銀兩擬請卽於歲修餘款內動支每屆霜清核明用數據實開報相應繕摺咨送

宣統二年正月農工商部奏稱竊照道光十五年七月奉上諭嗣後河工奏銷銀數著工部按照所開報銷冊逐款勾稽將每年動用各款開具簡明總數於年終彙奏一次以重度支而昭核實等因欽此又光緒十八年閏六月經前工部具奏嗣後河防工需自廳一律歸入比較奉旨依議欽此欽遵各在案茲據河南巡撫兼管河工事務吳重熹奏宣統

元年分豫省黃河兩岸八廳歲修河防工需比照上三年節減數目繕單具陳一摺宣統元年十一月十四日奉硃批該部知道單併發欽此欽遵鈔出到部查單開宣統元年分豫省黃河兩岸八廳辦過埽磚土石各工共用銀三十四萬五千三百四十七兩四錢二分七釐比較光緒三十四年分計少銀四萬六千四百六十九兩二錢九分八釐比較光緒三十三年分計少銀四萬七千三百四十兩九錢九分九釐比較光緒三十二年分計少銀四萬九千七百六十三兩九錢七分三釐又河防項下辦過石工共用銀九萬二千二百三十三兩七錢五分九釐比較光緒三十四年分計多銀八千六百九兩六錢九分比較光緒三十三年分計多銀八千二百四十九兩五分七釐比較光緒三十二年分計多銀七千三十二兩一錢五分臣等伏查豫省黃河修防經費經前河臣許振禕奏定自光緒十七年爲始每歲以六十萬兩作爲定額以四十八萬兩歸廳辦工另提十二萬兩爲河防保險之用迨光緒二十八年又經升任撫臣錫良因新約賠款數鉅奏明提存銀十萬作爲賠款之用每歲支銀五十萬兩作爲定額以四十一萬兩歸歲修以九萬兩專辦石工歷經按年報銷有案今據該撫奏稱宣統元年黃河兩岸歲修埽磚土石各工共

用銀三十四萬五千三百四十七兩四錢二分七釐內除採割隄葺草刀工銀五百六十二兩五錢七分一釐向由河防另欸項下支發外實動用司庫歲修額欸銀三十四萬四千七百八十四兩八錢五分六釐又河防項下拋辦石工動用司庫銀九萬二千二百三十三兩七錢五分三釐等遂欸勾稽動支銀數相符擬准如所請辦理至原奏內稱歲修節省銀六萬五千二百一十五兩一錢四分四釐應發銀行生息作爲河工預備金以備緩急之需及石工項下不敷銀二千二百三十三兩七錢五分三釐由歷年餘存備防項下動用應由該撫報明度支部查核其是年兩岸八廳河防辦過各工奏銷銀數由臣部另摺核覆具陳再豫河工需用欸向係比較上三年數目報部核覆現經該撫將每年刪減定數目核所有比較上案一節嗣後應照依臣部會同度支部議復無庸循例奏報以省繁牘合併聲明

宣統二年度支部農工商部奏稱內閣鈔出河南巡撫吳重熹奏清理河工欸項切實裁減核定數目一摺又奏用人購料籌議營汛津貼及分別採辦甄石一片又奏河工歷年報銷餘存欸項發商生息一片宣統元年九月十四日奉硃批該部議奏片二件併發欽

遵到部當經臣部電催該撫行取詳細清單去後嗣准該撫將立案清單津貼數目先後咨送臣等伏查豫河各工自光緒十六年前河督臣許振禕奏定歲額六十萬兩每年節省自四五萬餘兩至八九萬不等實祇用五十餘萬兩二十七年前撫臣錫良始於六十萬額欸內奏提新案賠欸銀十萬減爲歲額五十萬兩近年每屆仍節省二萬數千兩實祇用銀四十七萬餘兩至於各項公費河臣許振禕雖有督撫等十一衙門擬請以七萬五千金作爲定額之奏而歷屆報銷祇有稽料與土方石方碎石三項從未將公費列入開支是該撫所謂融銷之弊已屬顯而易見今就原奏各摺片詳細稽核每年總數係仍照五十萬額欸計算除磚石支用九萬外其餘四十一萬兩據稱核實開支每年辦公購料共需銀三十三萬三千四百九十餘兩約可盈餘銀七萬六千五百餘兩查該撫咨送預算清單各廳物料夫工共銀八萬四千六百六十六兩六錢六分六釐土工共銀二萬零二百兩公費共銀九萬九千四百兩撫署行政費銀三萬七千四百九十兩開歸道署銀二萬五千一百七十七兩河北道署銀二萬二千四百七十二兩八錢雜支銀四萬四千零八十六兩聲明內有計開之欸遇閏照加統計歲需銀三十三萬餘兩爲數不爲不

鉅而用於土方稽料者乃轉寥寥無幾未免工料少而經費多惟積弊相沿已非一日臣部清理財政原奏亦經聲明既往之弊不加追究查出之欸仍可留存等因奏奉俞允通行遵照在案今該省河工既據該撫於陋規等款裁去銀三萬餘兩又將歷年積存舊料變抵銀九萬餘兩和盤托出尙係遵照臣部定章辦理所有豫算支用各款並俟本年十一月實行之處應請暫行照准其稽料翔貴之年每壕至多加銀五兩據奏每年不過五千兩營汛員弁兵丁分別給與津貼據單開每年共銀五千二百十六兩亦請暫行照准至河工節省向繳藩庫此後新章每年節省銀七萬六千五百餘兩並辦石餘欸請作爲豫備金發銀行生息又原存藩庫節省銀七萬七千四百三十一兩零請作特別預備金仍存司庫歷年已銷未用舊料變抵銀九萬三千九百十三兩零並以後此項餘欸請仍發商生息均暫准如所奏辦理惟前項節省銀兩仍應各歸各案按年將收支數目分晰造冊報部即有特別工程亦應先將估需銀數詳細咨部以憑核辦其司庫歷年節存四十八萬八千餘兩一欸除十二萬九千餘兩係屬奏明動用外其餘二十八萬一千餘兩臣部並無該省咨報提用案據清單內亦未敘明年月且河工額欸已提新案賠欸十萬

何以節省款內又復頻年湊提該款本爲豫河緩急之需何以又作東河之用應飭藩司查明原案並將歷屆提欸報解各項卷宗全行鈔錄彙造一冊送部備核河工各該廳局應造報告清冊並令遵照定章將光緒三十四年分調查報告彙送清理財政局呈部辦理至每年報銷請免造冊結圖說之處農工商部查向例河防用欸每年於霜清後撮其總數併比較上三年數目一體開單奏報由臣部稽核覆奏現據該撫將所用工欸核實刪減自可無庸比較惟每年核覆數目總以此次奏定銀三十三萬三千四百九十餘兩爲斷其河防局所領九萬兩專爲辦石之用自應仍遵舊案辦理至請免造冊結圖說一節查臣部核銷工欸向以磚石土方工價爲衡今該撫奏稱照單准銷免造冊結圖說不但無憑考核亦恐別滋流弊嗣後每年歲搶修工程應造冊結圖說擬令改用表式將所用工料丈尺做法詳細開列仍取具印甘各結隨案咨送並嚴飭開歸河北二道認真督辦力求樽節仍須於工竣奏報後將所填表式印結一併隨案送部以憑核辦恭候命下即由臣部行知河南巡撫遵照辦理

論曰河工經費屬於平時者曰歲修曰搶修曰另案屬於臨時者曰大工歲搶修有定額

其有不敷而專請者則爲另案另案雖無定額而仍爲歲款故必列三年比較之數大工合龍事非恆有視役之難易爲斷不入比較者也又有津貼幫價專案提撥節省諸名目其他瑣細者尙多不足縷舉惟河夫銀兩爲專款餘則皆撥自藩庫大工則嘗屬於部撥故其爲目往往不同或隨事而爲之名而綜其大要則歲修搶修另案大工四者而已實則另案即搶修之不敷者而另案搶修皆爲歲款雖三仍一則平時者歲修也臨時者大工也河隄之役初沿明故出之於徭者居多發帑蓋無幾故順治初封邱金龍口大王廟之決總河楊方興塞之工六七年始竣費銀不過八十萬而六十餘萬捐之於民歲修如派夫如柳束如運料更強半資之民力每年且有協濟南柳銀南之事至雍正之時徭之裁免者已多矣然每歲搶修之費不過五萬兩左右而普律加幫大隄所用亦不過五十餘萬自是而後設官旣多河事日棘費乃頓增然乾隆時大工雖有用銀至二千萬者其役蓋絕大兼徙隄徙城非後之僅僅合龍一事可比而黃沁兩河歲搶修之額豫撥自司庫每年僅七萬兩合之河夫銀兩諸款當亦不逾十萬兩左右嘉慶時歲搶修之款始也三四十萬自十一年以後乃增至一百餘萬雖不逮南河歲款三百萬之鉅然亦足駭詫

矣咸豐時三銀七鈔以軍興之際本非定制至同治時以二十萬爲歲額然奏請添撥初則每年無慮二三十萬至八年以後歲額添撥兩者並計恆至六十餘萬或乃有八十餘萬者故光緒時有六十萬之額定大工合龍最後者爲光緒時之鄭州其款乃至一千三百餘萬視道光時之中牟大工又過之然鄭工牟工皆南岸未可援北岸之工並論其數固未減也邵陽魏氏嘗言河費矣曰靳文襄承明季潰敗決裂之河八載修復用帑不過數百萬康熙中堵合中牟楊橋大工不過三十六萬其時全河歲修不過數十萬金蓋由河槽深通而又力徵之役沿河協貼物料方價皆賤工員實用實銷故工大而費省乾隆四十七年蘭陽青龍岡大工三載堵閉除動帑千餘萬外尙有夫料加價銀千有一百萬應分年攤徵其時帑藏充溢破格豁免而自後遂沿爲例攤徵僅屬空名每逢決口則沿河商民且預囤柴草倍昂錢值乘官急以取利是爲一大竇然乾隆末大工雖不派夫而歲修搶修另案兩河尙不過二百萬及嘉慶十一年大庾戴公督南河奏請工料照實價開銷其所藉口不過一二端而攤及全局於是歲修搶修頓倍歲修增而另案從之名爲從實開銷而司農之度支益匱是爲二大竇魏氏之言既然然河患頻數民力有限攤徵

不過虛存其名於實無補隨時蠲緩與爲休息德意至深所以至咸豐時乃永免加價銀矣時價開銷亦不得不然之事民生日艱物力日罄乘急取利又非令所可禁當乾嘉之時已難比康雍之例價況在道咸以後乎故如土料諸價或一倍以至數倍不等豈皆出於浮冒哉時有不同耳然則費之屢增而未已也烏足怪哉故奉新總河之請以六十萬爲定額也舉歲修拾修另案一切駢指枝拇之足以淆惑視聽者概掃除之而納之於一固亦窮則變變則通之道也今取河南布政使司光緒十三年五月所列關於東河收支各款一一著之以見改章之所依據計收欸河營朋建大建每月銀四十三兩三錢六分小建每月銀五十六兩九錢二分四釐河營曠俸曠廉無額河夫銀兩三萬八千七百二十七兩四錢九分五釐支欸歲料例價銀十七萬三千七百八十四兩添撥節省防險銀二十五萬兩各河廳歲料幫費銀一萬六千三百五十兩河內武陟二縣歲修沁隄工料二萬四千兩河督養廉銀六千兩河南省照半除軍需三成及扣平實支銀一千九百七十四兩開歸陳許道養廉除軍需二成扣平及攤捐實支銀二千四百四十三兩四錢三分九釐彰衛懷道養廉除軍需扣平及攤捐實支銀二千六百五十兩四錢上南下南祥

河下北黃沁衛糧中河七廳同知通判養廉除軍需一成扣平及攤捐共支銀四千餘兩
懷豫二河營官十九員戰兵一百四十四名守兵一千一百一十二名俸薪馬乾餉米除
朋建減平及暫停三成實支銀一萬四千八百六十一兩三錢三分六釐河營官弁養廉
額支銀一千八百二十三兩五錢按七成支發各汛掃夫沁河長夫工食銀四百二十兩
南岸鄉徭堡夫工食銀三百餘兩其中惟歲料例價各河廳歲料幫費經欽差查辦核減
河夫銀兩由南北兩道撥歸司庫非十年前之舊制河督養廉仍以六千兩爲額非道光
後一萬之數或加廉不由豫支乎而河夫銀兩自十五年始則仍留工爲添辦磚石之用
不復撥歸司庫至六十萬歲額則專屬之黃河修防凡沁隄工料與黃沁兩河官弁兵夫
養廉俸薪馬乾餉米工食皆不在內蓋河勢無恆苟無備禦不虞之需以應變於臨時則
必至搶攘而無策往者皆險工既出總河專疏上陳待報可始能得款失事大半由此久
遠者不必言同治時之榮工則軍興後欸乏之故也光緒時之鄭工則查辦後費減之故
也迨其漫決則所費者視所減者以千百倍計之而未足以償至是而悔之亦無及矣故
奉新總河之奏請改章也明定發欸之期使辦料不至後時而辦工不至乏用復歲有所

餘以待一旦自是以來遂無河患後雖減款十萬改歸新案賠款固是移緩以濟急要亦夙儲之已充不然以錫公之淵識偉畫又豈肯孟浪出之嗚呼臨渴掘井之爲固非人定勝天之計矣

豫河志正誤表

誤 正 卷 數 頁 數 行 數 字 數

適民 民適 十四 四 一 十八

接 按 十四 四 八 十四

如 加 十四 八 廿三 廿八

合 今 十四 八 廿四 廿二

全 完 十五 十八 十五 十二

加 如 十五 十九 十四 卅

即用 用即 十六 二 廿五 廿六

預 須 十六 三 廿三 廿二

徒 徒 十六 六 十五 八

兩 銀 十六 七 廿五 卅

距 鉅 十六 十四 九 廿三

屈 屈 十六 十六 四 卅四

運 連 十六 十七 一 十九

銀南	卷	座	數不	空白	核	聽	空白	息	廳	界	難
南銀	參	庫	不敷	急	麻	廳	霖	悉	聽	界	規
十九	十九	十九	十八	十八	十八	十八	十八	十八	十八	十八	十七
十一	四	三	九	八	七	七	六	四	二	一	三
廿一	十一	三	五	十五	廿五	十八	八	廿二	二	七	廿四
廿四	廿三	廿六	廿五	廿五	廿五	十六	九	卅三	十五	十七	卅